

SOTA INSOLAT NEN SAN MATEO JA MAYPANGKEP NI KABEBIYAG TAN TORO NEN JESUCRISTO

Sota tonton ni naypolipoli-an nen Jesucristo

¹ Si Jesucristo, poli nen David tan si Abraham. Nem wára pay iray eshom, jet sajay iray ngaranganan sha:

² Si Abraham, ama nen Isaac; jet si Isaac, ama nen Jacob; jet si Jacob, ama nen Joda, asan wára pay iray potot to ja agi nen Joda.

³ Jet si Joda nen Tamar, anak sha si Piris nen Sara. Jet si Piris, ama nen Isrom; si Isrom, ama nej Aram.

⁴ Si Aram, potot tos Aminadab; si Aminadab, ama nen Naason; si Naason, ama nen Salmon.

⁵ Jet si Salmon nen Rahab, anak sha si Boos; jet si Boos, inesawa to si Ruth et anak sha si Obid; jet si Obid, ama nen Jesse.

⁶ Si Jesse, ama nen David ja nan-ari, jet si David, inpotot tos Solomon. (Say ina nen Solomon sota istay asewa nen Orias.)

⁷ Si Solomon, ama nen Roboan; si Roboan, ama nen Abias; jet si Abias, potot to si Asa.

⁸ Si Asa, ama nen Josapat; si Josapat, ama nen Joram; jet si Joram ama nen Osias.

⁹ Potot ngo nen Osias ma si Joatam; si Joatam, ama nen Akas; jet si Akas, ama nen Isikias.

¹⁰ Jet si Isikias ama nen Manasis; si Manasis ama nen Amon, jet si Amon ama nen Josias.

¹¹ Jet si Josias potot to si Jikonias, tan wára pay iray a-aki nen Jikonias. Sajay iren a-aki nen Jikonias, pati si-kato, nay-anak ira nonta timpon in-ilaw sha sota toon i-Israel ja maybedod shima dogad ja kowan sha ey Babilonia.

¹² Idi nonta wára ma ira shi Babilonia, waray inpotot nen Jikonias ja inpanngaran to ni Salatiil, jet si Salatiil, inpotot to ngo si Sorobabil.

¹³ Naytoltoy ja naypolipoli ira jay jet si Sorobabil, ama nen Abiod. Si Abiod i ama nen Iliakim; si Iliakim, ama nen Asor;

¹⁴ si Asor, ama nen Sadok; si Sadok, ama nen Akim; si Akim, ama nen Iliod;

¹⁵ si Iliod, ama nen Eleazar et si Eleazar ama nen Matan. Si Matan ma i ama nen Jacob.

¹⁶ Jet si Jacob, potot to si Jose et si-kato may maka-asewa so nen Maria ja engi-nak so nen Jesus, ja inewagan sha met laeng ja si Cristo.

¹⁷ Jet sajay iren nanpolipoli, manshoki so nen Abraham ingkato so nen David, sampolo tan epat ta apo. Jet manshoki mowan so nen David ingkato nonta timponindaw sha so nonta tood Israel shima dogad ja kowan sha ey Babilonia, sampolo tan epat mowan na apo. Manshoki mowan nonta wára ired Babilonia ingkato ngo nonta inkay-anak nen Cristo, sampolo tan epat ta apo mowan.

Sota inkay-anak nen Jesucristo

¹⁸ Iyay i shoki-an ni inkay-anak nen Cristo. Nonta aneng pay laeng nga may-enak si Cristo, si Maria ja mengi-nak ali son si-kato, naykari

ja esaw-en nen Jose. Jet si Maria, nonta eg ira pay laeng nan-asewa nen Jose, na-amta-an ey malokon. Nem sotan na dokon to, in-iyan gayam ni Ispirito Santo nen Apo Shiyos.

¹⁹ Nem si Jose ja naykarin mengesawa so nen Maria ali, kowan to ey eg to itoloy ya esaw-en si Maria. Nem piyan ton dibas i pesing ton mengisi-jan, ta eg to koston mebebaingan si Maria. Si Jose, na-anos sa daki, isonga sajay i kowan to ey pesing to.

²⁰ Nem idi sajay i toka nemnemnema ja kowan to ey dag-en to, nanpa-sas i anghil nen Apo Shiyos shi kokokip to, ja kowan nonta anghil son si-kato ey, “Jose ja poli nen Ari David, kareka manshanag ja mengesawa so nen Maria, ta sama dokon to, Ispirito Santo nen Apo Shiyos i engi-jan so.

²¹ Say i-anak to ali, daki et say ingaran mo son si-kato, Jesus (ja say olog to, mengisedakan), ta si-kato diy mengisedakan ira nonta too to say eg ira meshosa pangkep ni basol sha.”

²² Sajay ya emin i epasemak say mayto-to-wa sota kowan ni para padto nonta bayag da ja esel nen Apo Shiyos,

²³ ja kowan to ey, “Wara aliy balasang ja enshiy dakin en imaro-arol so, nem on-anak ali. Say i-anak to ali, daki jet say ingaran sha so nontan na i-anak to ali, si Emanuel.” (Say olog niyay ya ngaran shi esel ira ni Hodiyo, “Si Apo Shiyos, wara son si-katejo.”)

²⁴ Jet idi bimangon si Jose, pinati to sota inkowan ni anghil nen Apo Shiyos shi kokokip to et inesawa to si Maria.

²⁵ Nem eg to ineshol si Maria nonta maramen malokon. Jet idi nay-anak sota dokon nen Maria, inpanngaran nen Jose ni Jesus sota nga-nga.

2

Sota totoon nankedaing ja edapod bedalan

¹ Jet nontan na inkay-anak nen Jesus shi Bitlihim, ja sakop ni Jodia, maramen si Hirodis i ari. Idi nontan, waray mimotok shi Jerusalem ja toon nankedaing ni bisto ni talaw ja edapod bedalan.

² Jet sha inbaga ey, “Towa sota nga-ngen nay-anak ja ari ali ni Hodyos? Inon-an miy inbo-day nonta talaw shi bedalan et si-katoy engamta-an mi so ey nay-anak. Dimaw kami di say kami manshedjaw so nontan na nay-anak ka ari.”

³ Idi inamta-an nen Ari Hirodis iyay ya kowan sha, ngaaw i dekna to, jet angken pay sota ira emin na tood Jerusalem.

⁴ Jet si Ari Hirodis, sina-nop ton emin sota ira apo ni papashi tan sota emantosho ni dinteg ni Hodyos et insho-petan to ira ja kowan to ey, “Towa kariy koston kay-enakan nonta naypadto nonta bayag da ey mengitoshay son si-katejo, ja ibetkag kono ali nen Apo Shiyos?”

⁵ Jet inkowan sha son si-kato ey, “Shi Bitlihim ja sakop ni Jodia i koston kay-enakan to, ta si-kato met i naysolat ja kowan nonta para padto nonta bayag da, ja esel met laeng nen Apo Shiyos,

⁶ ja kowan to ey, ‘Say Bitlihim, shima dogad ja sinekopan ni poli nen Joda, ootik nga agpayson siyodad no may-inges shima emin na kait ton

siyodad nodtan met laeng nga dogad. Nem maybidang ey epateg ta si-kato aliy kedepo-an nonta mengitoshay ni took ja i-Israel.' ”

⁷ Jet nontan ma si Ari Hirodis, inpa-odop to ira ngo sota nankedaing nga too ja edapod bedalan. Jet insho-petan to iren pasiya nonta a-abos sha no pigan i inbo-day nonta talaw wa inon-an sha.

⁸ Jet inbetkag to ira shi Bitlihim ja kowan to ey, “Eti, daw kayo ngarod, singpet joy anap nonta nga-nga, jet no sepolen jo, ipa-amtayo ali son si-kak. Say ondawak ngo ja en manshedjaw son si-kato.”

⁹ Idi itenengan ira niya toon nankedaing iya kowan nen Ari Hirodis, dima-jat iren ondaw shi Bitlihim. Jet sota talaw wa inon-an sha alid bedalan ja edapo-an sha, epangdo ey si-kara shima dogad ja dawán sha, jet nan-akad ira ingkatod simalsheng sota talaw. Jet pintek ton kosto sota kawad-an nonta nga-nga.

¹⁰ Idi inon-an shen simalsheng sota talaw, ebadeg i imdeng sha.

¹¹ Simekep ira nodta baley et inon-an sha sota san-ina. Jet sota ira toon nankedaing ja edapod bedalan, nantalimokod ira ja nanshayaw son si-kato. Jet inbo-day sha sota inta-jon sha ja nankebanol ja i-akan sha so nonta nga-nga, ja balitok, tan sota emanseng-ew wa kowan sha ey insinso, tan mira.

¹² Idi imakad ma ira, apil i shindan sha tep waray inpa-amta nen Apo Shiyos son si-kara shi kokokip sha ey eg ira kari manshedan shi baley nen Ari Hirodis.

Inpabono nen Hirodis i dakin a-anak, nem indisi sha si Jesus

¹³ Idi naksheng den dimaw ira jay ya too, sota anghil nen Apo Shiyos, nanparang so nen Jose shi kokokip to ja kowan to ey, “Bangon ka et ibtik mo ita nga-nga tan si ineto shi Egypt. Jet pan-iyang kayo nin shiman ingkatod ekak ikowan ey on-etan kayo mowan. Ta si Hirodis piyan ton pa-enap ali iya nga-nga ja kowan to ey bono-en to.”

¹⁴ Jet si Jose, idi bimangon, inda to sota nga-nga tan si Maria nontan na dabi met laeng et inbakwit to ired Egypt.

¹⁵ Jet nan-iyang ired man ingkatod etey si Hirodis. Wara si Jesus shi Egypt nin say metongpal sota kowan ni padto nonta bayag da, ja esel nen Apo Shiyos met laeng, ja kowan to ey, “Shi Egypt aliy edapo-an ni anak ko, ja inedjaban ko so di.”

¹⁶ Idi inamta-an nen Hirodis ey nandibas ira sota nankedaing nga too, kowan tod nemnem to ey, “Endedamsis sha gayam sota inbilin ko nontan!” Jet ebadeg ga pasiya ma i bonget to. Inbetkag to ira sota solsharo to ja memono ni emin na nga-ngen daleki shi Bitlihim ja mantaw-en ni showa ono ekolang, ingkato nodta dogad ja nandi-mot shi Bitlihim. Ta say kowan nonta nankedaing nga too, inon-an sha sota talaw nonta showen tawen den edabas.

¹⁷ Sajay i kaytoshongan nonta padto nen Jeremias nonta bayag da ja kowan to ey,

¹⁸ “Waray naytenengan ja makedsang i ngognog to shi Rama. Si-kato si Rakil, ja toka ira

nengnengisi sota annak to. Eg to koston ma-adok tep na-enshi ira da sota annak to.”

¹⁹ Jet idi etey si Ari Hirodis, nanparang mowan sota anghil nen Apo Shiyos so nen Jose shi kokokip to nonta wára ired Egypt, ja kowan to ey,

²⁰ “Bangon ka et alam ita nga-nga, tan si ineto, jet akad kayo ma shi Israel. Pesed ma niman tep sota kowan to ey memono so nita nga-nga, etey da.”

²¹ Jet si Jose bimangon et inda to sota nga-nga, tan si Maria et nay-oli ira ma shi Israel.

²² Nem idi inamta-an to ey si Arkilao ja anak nen Hirodis i naysa-dat so nen ameto ja man-eshi shi Jodia, timakot si Jose ja ondaw shiman. Binanshaanan mowan ni anghil shi kokokip to ey angken eg metodoy shiman no diket ondaw et shi ili ni Galilia.

²³ Jet siya, dimaw ired man et nan-iyang ired ma siyodad ja kowan sha ey Nasarit. Sajay i edaga say metongpal sota naypadto nonta bayag da ja kowan to ey, “Si-kato, mayngadnan ey i-Nasarit.”

3

Intoro nen Juan ey ibebawi ni totoo i basol sha

¹ Nontan na timpon wares Jesus shi Nasarit, waray toon emantoshon shima sakop ni Jodia ja nay-arawi shi kad-an ni totoo. Jet say awag sha so nontan na too, si Juan ja para bonjag.

² Say kowan to so nonta ira totoo ja dimaw nodtan, kowan to ey, “Baliwiyo i ngaaw wa wared nemnem jo, ta sota pantoshayan nen Apo

Shiyos ja naypadto nonta bayag da, shanshani ma.”

³ Saja si Juan, si-katoy kaytoshongan nonta padto nen Isaias nonta bayag da ja kowan to ey wara aliy toon ikeljaw toy esel to shima dogad ja nay-arawi shi kad-an ni totoo, ja ikowan to ey, “Pansagana kayo ta shanshani ma aliy imotok nen Apo! Singpet joy shalan na pan-akshan to!”

⁴ Say baro nen Juan, nagshengan: sota na-abel la bowek ni animal ja kowan sha ey camel i toka osala bengat, ja ebalkesan ni kolti. Jet nagshengan ngoy toka kena, ja shoron tan shanom ni dinowan.

⁵ Sota ira tood Jerusalem, tan eshom ma toon nanbaley shi probinsiya ni Jodia, tan sota ira toon nanbaley ja nay-esop shima ebadeq ga pa-dok ja kowan sha ey Jordan, ireka manisina-dat ja ondaw son si-kato.

⁶ Inkowan shen emin i basol sha say pekawanan ira nen Apo Shiyos; isonga binonjagan ma ira nen Juan.

⁷ Nem idi inon-an nen Juan ira sota Parisiyo, tan sota ira Sadosiyo, ja emandaw son si-kato, ja kowan sha ey ira manpabonjag ngo son si-kato, kowan nen Juan son si-kara ey, “Si-kayo, singa oleg i ogadiyo! Say kowan jo emo, mebedin na disi-an joy penosa nen Apo Shiyos no manpabonjag kayo bengat?”

⁸ Nem enshi! Mesepol la ma-sas shi ogadiyo ey inbebawi jo sota basol jo.

⁹ Karejo panshingan sota kowan jo ey si-kayo ket poli shakejo nen Abraham. Enshi, eg on-anay iyay! Tep si Apo Shiyos, mebedin ton osalen i

bato ja palsowa-en ni too jet ikowan to ey poli nen Abraham.

¹⁰ Jet niman, waray naysagana ja may-eshig ey wasay ja maywa-tek nodta damot ni kakadasan na eg ondames ni mapteng. Sajay iren kakadasan, mebetang et maypool shi apoy.”

¹¹ Jet kowan pay nen Juan ey, “Nem si-kak, dimawak ali ja shanom i inpamonjag ko son si-kayo, ni inpanbebawi jo, nem waray ondaw alin maysa-dat son si-kak ja ebadbadeg i panakabalin to nem say si-kak. Jet ekak pay maykeshi ja angken baga-en to koma ja mengkal ni sapatos to. Sotan aliy onbonjag son si-kayo ni Ispirito Santo nen Apo Shiyos, asan pay ya apoy.”

¹² Jet si Juan, in-arigan to ira, ja kowan to ey, “Sotan aliy may-eshig ey mengita-nil ni bekas shi taap. Sota bekas, isingpet tod tado-an, nem sota taap, ipool tod apoy ya emanshedang ni olay ja eg ma-ma-shep.”

Binonjagan nen Juan si Jesus

¹³ Nontan, edapo ngod Galilia si Jesus ja ondaw shima kawad-an nen Juan, say en manpabonjag ngo son si-kato shima pa-dok ja kowan sha ey Jordan.

¹⁴ Nem si Juan, istay en-asneng, ja kowan to so nen Jesus ey, “Si-kak komay ondaw son si-kam ja manpabonjag; aliwen si-kam et ngo mowan i ondaw alin manpabonjag son si-kak!”

¹⁵ Nem si Jesus, simongbat ja kowan to ey, “Eti, dagam et niman. Bonjagimak ma. Mapteng i itongpal ta so ni bilin nen Apo Shiyos may-pangkep niyay.”

Jet si Juan, timolok.

¹⁶ Idi ebonjagan ma si Jesus, kima-jat ta shagos nodta shanom et nay-inshas ngon edo-katan i dangit. Jet inon-an toy Ispirito Santo nen Apo Shiyos ali ja singa inges toy itsora ni kalopati ja emandespag alin onsepa son Jesus.

¹⁷ Jet nontan met laeng, wára aliy esel nen Apo Shiyos ja edapod dangit ja kowan to ey, “Si-kam i Anak ko jet ensemble taka, tan si-kam i naka pandadsaki.”

4

Pineshas nen Satanias ja panbesol si Jesus

¹ Idi naksheng ja ebonjagan si Jesus, intorong ni Ispirito Santo ja ondaw shima dogad ja arawid kawad-an ni too, say peshasen nen Satanias shiman ja panbesol koma si Jesus.

² Jet nontan si Jesus, eg eng-engan ni epat ta polon akew, tan epat ta polon dabi, tep epaladoy kepemeshas nen Satanias. Jet idi naksheng iyay, na-agang si Jesus.

³ Jet si Satanias, dimaw ja kowan to so nen Jesus ey, “No agpayson anak toka nen Apo Shiyos, ikowan mo iren ja bato ey manbedin ira ni tinapay.”

⁴ Nem si Jesus, simongbat ja kowan to ey, “Enshi, tep say naysolat nonta bayag da ja bilin nen Moises, kowan to ey, ‘Aliwén na mekan ni abos i panbiyag ni too, no diket manbiyag ni sanseskey ja esel nen Apo Shiyos ja ikowan to.’ ”

⁵ Idi naksheng iyay, indaw nen Satanas si Jesus shi Jerusalem, ja kaibilang nen Apo Shiyos ja dogad to, jet to inpa-tok nodta Timplo.

⁶ Jet kowan to so nen Jesus ey, “No agpayson anak toka nen Apo Shiyos, pan-ekas ka. Say kowan met ni naysolat nonta bayag da, kowan to ey, ‘Ibilin nen Apo Shiyos so nonta anghil to ey ajowanan shaka.’ Isonga eg ka mesekitan. Tan say kowan to pay, ‘Egni-an shaka ni takday sha, say eg mesekitan i sedim ni bato.’ ”

⁷ Simongbat si Jesus et kowan to ey, “Enshi, ta say kowan mowan ni naysolat nonta bayag da, ‘Karam pedpeshasen si Apo Shiyos, ja kowan mo ey ma-sas ka no agpayso i kowan to.’ ”

⁸ Jet si Satanas indaw to mowan si Jesus shima kakedjangan na shontog et inpa-sas ton emin i ilid ja dobong, tan sota kamapteng sha.

⁹ Jet si Satanas, kowan to pay so nen Jesus ey, “Emin ira jay, i-akan ko son si-kam no si-kak i pantedimokoshan mo ja panshedjawan.”

¹⁰ Simongbat ngo si Jesus, ja kowan to ey, “Ki-nan ked jay Satanas! Say kowan ni esel nen Apo Shiyos ja naysolat nonta bayag da, kowan to ey si-kato bengat i panshedjawan mi tan pansilbi-an mi.”

¹¹ Idi naksheng nga pineshas nen Satanas si Jesus ja istay piyan ton panbesol, indekjas to ma. Jet sota anghil, dimaw ira di son Jesus ja sha in-aknan ni kompormin kasapolan to.

Inshogi nen Jesus i obda to

¹² Nontan ngo ma, naybalod si Juan ja para bonjag. Idi inamta-an nen Jesus, imoli ma shi Galilia.

¹³ Indekjas toy Nasarit et nan-iyang shi siyodad ni Kapirnaom ja naykilig shi baybay, ja istay sakop ni Sabolon tan Niptali.

¹⁴ Sajay i edaga say metongpal sota inpadto nen Isaias nonta bayag da ja kowan to ey,

¹⁵ “Shima Galilia ja petek ni baybay tan she-mang ni pa-dok ja kowan sha ey Jordan, ja istay sinekopan ni poli nen Sabolon tan Niptali, si-katoy naydaokan ira nonta aliwen Hodiyo,

¹⁶ jet shiman, sota ira too ja may-eshig ey edabi-an ja imekok shima embolinet ta shalan, singa waray on-an sha alin maniyal la silew ja menidew son si-kara. Jet angken sota ira toon patey i istay toshongen sha, singa ewa-wa-an ira.”

¹⁷ Jet manshoki ma nontan na timpo, nantoro ma si Jesus, ja kowan to ey, “Baliwiyo i ngaaw wa wared nemnem jo, ta sota naypadton pantoshayan nen Apo Shiyos, shanshani may timpo to.”

¹⁸ Idi sakey ya akew, eman-ekad si Jesus shima kilig ni baybay shi Galilia et inon-an to sota san-agi ja si Andres nen Simon. (Si Simon, Pedro met laeng i shaka penge wag son si-kato.) Shaka pan-itekna sota embanaw wa balshe shi shanom, tep nigay i shaka panbiyagi.

¹⁹ Jet si Jesus, kowan to son si-kara ey, “Kay-olop kayo son si-kak et panbedin takejo ni took, jet mengolnong kayo ngo ni too ja itod-an

jo para son si-kak. Aliwá malen sota pengolnong ni nigay i obdayo.”

²⁰ Jet idi inkowan nen Jesus iyay, indekjas nonta san-agin shagos sota embanaw wa balshew sha et si Jesus i nay-olopan sha.

²¹ Intoloy shen nan-akad et wára pay i inon-an shen san-agi ja anak nen Sibidi, ja si Santiago nen Juan. Wara ira nodta bangkara ja shaka pansingpeta sota balshew sha, jet wára ngo si Sibidi ja amesha nodtan. Jet si Jesus, tinewal to ira sota showen san-agi ja manbedin ni too to.

²² Jet nontan met laeng, indekjas sha shagos si amesha tan sota bangkara, jet eki-odop ira son Jesus, jet nanbalin ma iren too to.

²³ Si Jesus, pinasiyal ton emin i sakop ni Galilia, jet nantoro pay shima sa-nopan ira nonta Hodiyo nodta dinadawan to. Inpalewag tod man sota mapteng nga shamag maypangkep ni pantoshayan nen Apo Shiyos. Jet angken sota ira toon ekalkalasiy sakit sha, inpamapteng to ira.

²⁴ Isonga nontan, eshamag iyay shi intiron sakop ni Siria, jet indaw sha ali son si-kato sota ekalkalasiy sakit sha, pati sota ira emankelshas tan sota eg makakeykey i bakdang sha. Tan angken pay sota ira eman-engaw ja kawad-an ni dimonyo. Jet si Jesus, inpamapteng to ira jay ya emin.

²⁵ Jet eshakel iray toon pasiya ja emay-odo-odop son Jesus: iman i edapod Galilia, Dikapolis, Jerusalem, Jodia, tan shima dogad ja baliw ni pa-dok ka Jordan.

5

¹ Jet nontan, idi inon-an nen Jesus ira sota es-hakel la too, eniyed nodta shontog. Idi timongaw ja esagana men mantosho, nay-eshom ali ira sota too to.

² Jet inshogi ton nantoro son si-kara ja kowan to ey:

Sota bindisiyon nen Apo Shiyos

³ “Si-kayon maka-amta ey ebadeg i kasapolan jo son Apo Shiyos, bindisiyonan shakejo nen Apo Shiyos, tep mayda-kam kayod pantoshayan to.

⁴ “Si-kayon emandeshingit, bindisiyonan shakejo nen Apo Shiyos, tep si-katoy mengkal ali ni daringit jo.

⁵ “Si-kayon ekombaba, bindisiyonan shakejo nen Apo Shiyos, tep si-kayoy onkon-od niya dobong.

⁶ “Si-kayon makapipiyan ja mandeka nonta ka-aporbali nen Apo Shiyos, bindisiyonan shakejo nen Apo Shiyos, ja mepnek kayo di.

⁷ “Si-kayon manangaasi, bindisiyonan shakejo nen Apo Shiyos, tep si-katoy mismon mengaasi son si-kayo.

⁸ “Si-kayon poro mapteng i wared nemnem to, bindisiyonan shakejo nen Apo Shiyos, ta mismon asen jo ali si Apo Shiyos.

⁹ “Si-kayon emengi-kan ni talna, bindisiyonan shakejo nen Apo Shiyos, ta si-kayo sota may-bidang ali ey annak nen Apo Shiyos.

¹⁰ “Si-kayon pinedigat ni kait jon too kabol ni dingka-an jo so nonta ka-aporbali nen Apo Shiyos, bindisiyonan shakejo nen Apo Shiyos, ta mayda-kam kayo shi pantoshayan to.

11 “Si Apo Shiyos, bindisiyonan shakejo no somangen shakejo ni kait jon too, ja kompormiy ikokowan sha, angken enshiy basol jo, ono bebaingan shakejo, ono pedigaten shakejo tep too takejo.

12 Pan-imdeng kayo no sajay i mepesamak son si-kayo, ta ebadeg i naytalo shi dangit ja kon-oren jo ali. May-inges kayo nodta ira para padto nen Apo Shiyos nonta bayag da, ja pinedigat ngo ni too nontan da, jet may-inges kayo nodta kon-oren sha.

Sota kay-eshigan ni asin tan silew

13 “May-eshig kayo ey asin ja emengi-kan ni mapteng shiya dobong. Nem no ma-omas i pait ni asin, ja entamnay ma, eg maymowan. Jet enshi may silbi to, may-ibong sotan ja angken kegkegtinan ni too.

14 “May-eshig ey singa si-kayo sota silew ja ondawag niya dobong. Jet sota ili ja naypa-tok shima shontog, eg mebedin na mesa-dinan, ema-sas ni olay i itsora to.

15 No bilang ey waray kingki ja inparedang ni too shi naydaem ni baley, simpri eg mesa-keban, no diket maypa-tok shi ekayang, say sota emin na wared baley, asen shay dag-en sha.

16 Inges niyay koma ngoy pesing jon menidew ni nemnem ni too shiya dobong. Isonga eg jo sa-dinan i silew jo, no diket ipa-sas joy mapteng nga ogadiyo, say asen ni totoo. Jet say ishayaw sha si Apo Shiyos ja Amejo ja wared dangit.

Sota maypangkep ni bilin nen Moises

17 “Aliwén jo ipangkep koma ey dimawak ali ja en mena-dat nonta dinteg ja para son si-katejo, ja in-awat nen Moises nonta bayag da, ono en mena-dat nonta inkowan ira nonta para padto met laeng nontan da, no diket dimawak ali say amta-an joy koston olog nonta inkowan sha nontan da.

18 Ikowan ko et i podno son si-kayo. No wára pay laeng iya dangit tan dobong, eg mepokaw i angken sakey ya ko-nit shima dinteg ja in-awat nen Moises ingkatod metongpal la emin.

19 Waray eshom ma in-awat ton bilin ja kowan jo ey aliwén pilit ta pati-en, nem say podno, sota eg memati ni angken sakey so ira niyay ya bilin, tan mengitosho ni kait to say eg sha ngo pati-en, si-kato aliy ka-otikan i shayaw to shi pantoshayan nen Apo Shiyos. Nem sota mengonod so ira nonta bilin ja in-awat nen Moises, tan mengitosho so ni eshom, si-katoy mandesin aliy shayaw to shi pantoshayan nen Apo Shiyos.

20 Mesepol la may-enam i ogadiyo shi bilin nen Apo Shiyos, ja aliwén inges to ira sota Parisiyo tan mamaistoro ni dinteg. No eg mandesin i pengonod jo nontan na bilin nem say si-kara, eg mebedin na mayda-kam kayo shi pantoshayan nen Apo Shiyos.

Sota maypangkep ni panbenagan ni bonget

21 “Amtayo met sota kowan ni bilin nonta bayag da so nonta ira apo tayo da ey eg ira memono, ta sota onbono, meshosa met laeng.

²² Nem say kowan ko son si-kayo, angken sota toon mengibonget bengat ni kait to, wáray ikaro to son Apo Shiyos. Jet sota toon memebaing ni kait to, mas embelbel-at pay i ikaro to. Jet sota toon kowan to so ni kait to ey maypowisha koma son Apo Shiyos, dilikaroy kasesaad to, ta shi impiyarno i toshongen to.

²³ Isonga no bilang ey marama ja kaka mengileton shima Timplo para so nen Apo Shiyos, jet wáray nemnemen mon eg kosto ni kait mo son si-kam,

²⁴ taynim nin sota moka pan-idaton jet daw ka so nontan na too, mo tabtabal say man-inawatan kayo. Asan kaka may-oli et mo itodoy sota daton mo so nen Apo Shiyos.

²⁵ “No bilang ey wáray mengireshom son si-kam shi oskaro, pakikajem ka et ja shagos son si-kato no maramen tokaka pan-i-ilaw shi oskaro, say eg toka i-awat nodta kowis. Say sota kowis ngo, eg toka i-awat ngo nodta kowadja ja mengibedod son si-kam.

²⁶ Podno iyay ya ikowan ko son si-kam. No wára ka ma shima badoran, eg ka onbo-day ingkatod bayshan moy oltimon sintimos ja inotang mo.

Sota maypangkep ni pemii

²⁷ “Amtayo met sota kowan ni bilin nonta bayag da ey, ‘Kareka memii.’

²⁸ Nem say kowan ko pay son si-kayo, sota toon ngaaw i pangkep to so ni biin asen to bengat, nanbasol ja singa emii, ta say wáred nemnem to, ngaaw.

²⁹ No bilang ey sota kanawan na matam i mengi-kan ni panbesolan mo, okit mo, et ibong mo. Mapmapteng ja wáray ma-kal la parti ni bakdang mo ja emengi-kan ni panbesolan mo, ey say sota wáren emin nem ondaw ka shima impiyarno ja meshosa.

³⁰ No sota kanawan na takday mo i mengi-kan ni panbesolan mo, potol mo et ibong mo. Mapmapteng ja wáray ma-kal la parti ni bakdang mo ja mengi-kan ni panbesolan mo, ey say sota wáren emin nem ondaw ka shima impiyarno ja meshosa met laeng.

Sota panbenagan ni pengisi-jan ni asewa

³¹ “Wara pay i naysolat ja dinteg ja kowan to ey, ‘Sota dakin mengisi-jan ni asewa to, mesepol la mengemag ni solat ja isepa to so nonta asewa to, et si-katoy pengamta-an ey koston insi-jan to sota bii.’

³² Nem say ikowan ko pay son si-kayo, sota dakin mengisi-jan ni asewa to, ey eg ekileki sota bii, si-katoy engi-kan ni nanbasolan nonta asewa ton bii. Jet sota mengesawa ngo nontan na biin naysi-jan, nanbasol ngo ja singa emii.

Sota maypangkep ni sangba

³³ “Amtayo met sota naysolat ja dinteg nonta bayag da so nonta ira apo tayo da ey, ‘Kareka manki-nat ni karim; isonga, no wára inkarim son Apo Shiyos, ja tinaksholan mo ni sangba, kenshat ta tongpalen mo.’

³⁴ Nem say ikowan ko pay son si-kayo, aliwén kayo mansangba so ni kompormi. Aliwén kayo

mansangba so ni dangit, ta say dangit, si-katoy kawad-an nen Apo Shiyos.

³⁵ Aliwén kayo mansangba so niya dobong, ta si-katoy kepanbagto-i ni sedi nen Apo Shiyos. Aliwén kayo pay mansangba so ni siyodad ni Jerusalem, ta si-katoy inbilang nonta Kangeto-an na ari, ja si Apo Shiyos ey siyodad to.

³⁶ Tan aliwén kayo mansangba so ni toktok jo shorog, ta angken na sakey ya bowek shi toktok jo, eg mebedin na panbedin jo ni oban, ono pa-onong jo ni olay ya etoling.

³⁷ No wáray mansedodsod son si-kayo, karejo i-eshom i sangba shi 'Owen' ono 'Enshi', ta sota songbat ja onsolok shi owen ono enshi, si Satanas i edapo-an to.

Ngaaw i bales

³⁸ "Amtayo met sota kowan sha ey, 'No ngarantoy dingkara son si-kam, ibedes mo ja inges to ngoy inpasing sha son si-kam, nem karam debasen: no matam i sinekitan sha, shi matesha ngoy ibalesan mo so, kasta met no shi sangim.'

³⁹ Nem say ikowan ko son si-kayo, no wáray makedsel, aliwén kayo mekibekal son si-kara. No bilang ey wáray menengpel ni kanawan na tamil mo, itodok mo pay ya angken pinshowa-en tod piig.

⁴⁰ No bilang ey wáray mengodop son si-kam ja ondaw shi oskaro say kowan to ey al-en toy barom, itodok mo pay ya angken al-en toy jakit mo.

⁴¹ Tan no bilang ey wáray memidit son si-kam ja kowan to ey mo itolod shi showen kilomitro,

angken pay ya onsolok i pengitodoran mo son si-kato, ja epat ta kilometro.

⁴² No wáray manbeka son si-kam, i-kan mo son si-kara i piyan sha. Tan no wáray kowan to ey memodod son si-kam, pabodorim.

⁴³ “Amtayo met sota kowan sha ey, ‘Semek moy kait mo et angken okesen mo sota makakontra son si-kam.’

⁴⁴ Nem say kowan ko son si-kayo, sota makakontra son si-kayo, semek jo kari, tan irewáti jo son Apo Shiyos sota ememedigat son si-kayo.

⁴⁵ Ta no sajay i pesing jo, ingesen joy ogadi nen Apo Shiyos ja Amejo shi dangit. Ta si Apo Shiyos, nan-i-inges sa mapteng i toka pesing so ni angken sipen too, inges to no mapteng i aramid to ono ngaaw. Nan-inges ja toka peskit i akew shi kad-an sha, tan inges ton toka pa-oshan.

⁴⁶ Mesepol la ensemek joy makakontra son si-kayo, ta no bilang ey say ensemek jo bengat ket sota toon ensemek shakejo ngo, enshiy jo kon-oren son Apo Shiyos. Ta sotan met laeng i kepesing ira nonta para singil ni bowis ja kowan jo ey enshiy kenshat sha.

⁴⁷ Jet no bilang ey say joka bengat tetbala ni kosto ket sota kagajem jo, enshi met laeng i jo kaydesinan so nonta ira karakdan na too. Ta sotan met laeng i kepesing ira nonta toon enshiy Shiyos sha.

⁴⁸ Mesepol la enshiy pankodangan ni ogadiyo ja inges toy ogadi nen Apo Shiyos ja Amejon wáred dangit.

6

Sota pesing ni tolong

¹ “Eg mesepol la ipa-sas joy mapteng nga aramid jod karakdan, ja kowan jo ey say i-etek shakejo nonta mengesas son si-kayo. No sotan i pesing jo, enshiy jo kon-oren ja i-akan ali nen Apo Shiyos ja Amejo shi dangit.

² “Isonga si-kayo, no bilang ey wáray tolong nga i-akan jo shi eshom ma too, eg mesepol la pa-amtayo shi karakdan, ja inges to sota kepesing ira nonta toon emengipa-sas ni mapteng nga aramid sha say eg amta-an ni karakdan ey ngaaw i nemnem sha, no wára ired sa-nopan tayon Hodiyo onono angken shima kalsaren eshakel i too. Ta say wáred nemnem sha, piyan shen ishayaw ira nonta toon mengesas son si-kara. Nem podno iya ikowan ko son si-kayo. Sota ira toon sajay i itsora ni aramid sha, enshiy isobadit nen Apo Shiyos son si-kara, ta singa inewát sha lay konkona sha nonta in-etek ira ni totoo.

³ No bilang ey mengi-kan kayo ni tolong jo shi kakaasin too, eg mesepol la pa-amtayo iyay ja joka dagdag-a. No mebedin koma, angken sota kanigid ja takday jo, eg to amtay inpangi-kan nonta kanawan na takday jo.

⁴ Mapteng no sotan na tolong jo shi eshom ma too ket eg amta-an ni eshom, ta si Apo Shiyos ja Amejo, amta ton emin i joka dagdag-a, jet si-katoy mengi-kan ni konkona jo.

Sota maypangkep ni panshewat

⁵ “No manshewat kayo so nen Apo Shiyos, eg jo onoran sota kepesing ira nonta toon

emengipa-sas ni mapteng nga aramid sha say eg amta-an ni karakdan ey ngaaw i nemnem sha. Say pipiyan sha ja panshéwatan son Apo Shiyos, shima sa-nopan, ono shima kalsara ja karakdan ni too say asen ira nonta eshakel la too. Nem podno iya ikowan ko son si-kayo. Sotan iren too, enshiy isobadit nen Apo Shiyos son si-kara, ta singa inéwat sha lay konkona sha nonta in-etek ni totoo ira.

⁶ No manshéwat ka so nen Apo Shiyos, say pesing mo, daw ka shima kowadtom et pandekeb ka, asan ka manshawát so nen Apo Shiyos ja Amam. Jet si-kato, wára nodtan na kowadtom ni moka panshéwat ni abos mo, jet si-katoy mengi-kan ni konkonom.

⁷ “No manshéwat kayo so nen Apo Shiyos, aliwén sota enshokey ya esel ja enshiy silbi to i jo ikokowan, ja inges toy kepesing ira nonta pagano no manshéwat ira nodta sinan shiyos sha. Tep say wáred nemnem sha, no ishokey shay shawat sha, itenengan kono nonta shiyos sha.

⁸ Eg jo onoran sotan na shaka pesing, ta sota Amejod dangit, angken nonta eg jo pay laeng inkowan son si-kato, amta to i emin na mesepol jo.

⁹ Isonga no manshéwat kayo, inges niyay i pesing jo:

“ ‘Si-kam ma Amemi ja wáred dangit, si-kam koma i mayshedjaw ni olay.

¹⁰ “ ‘Sota pantoshayan mo, pasebim koma ali, jet sota piyan mo, si-katoy medeka shiya dobong, ja inges to ngod dangit.

¹¹ I-kan mo koma sota kenen mi ni inakew.

¹² Si-kam i memekawan son si-kami ni nanbasolan mi, ja inges toy mika pemekawan ni kait min too ja wáray nanbasolan sha son si-kami.

¹³ Karam itolok koma ja manbesol kami, no diket si-kam i mengiredan son si-kami say eg kami manbesol.'

¹⁴ "Agpayso iyay ya ikowan ko son si-kayo. No pekawanan jo sota ira toon wáray nanbasolan sha son si-kayo, si Apo Shiyos ja Amejo shi dangit, si-katoy memekawan ngo son si-kayo.

¹⁵ Nem no eg jo pekawanan ira sota toon wáray nanbasolan sha son si-kayo, si Apo Shiyos ja Amejon wáred dangit, eg shakejo ngo pekawanan shi basol jo.

Sota maypangkep ni pengibiyang ni pangan

¹⁶ "Jet, no ibiyang jo nin ja eg mengan pangkep ni pamatiyo, eg mesepol la pa-amtayo shi eshom ma too, ja inges toy kepesing ira nonta toon mengipa-sas ni mapteng nga aramid sha say eg amta-an ni karakdan ey ngaaw gayam i nemnem sha. Emedew shi dopara ey si-kara, inbiyang sha nin i pangan sha maypangkep ni pamatira. Nem podno iya ikowan ko son si-kayo. Sota ira toon sajay i itsora ni aramid sha, enshiy isobadit nen Apo Shiyos son si-kara, ta singa inewat sha lay konkona sha nonta in-etek ira ni totoo.

¹⁷ Nem si-kayo, no ibiyang jo nin i pangan maypangkep ni pamatiyo, sagaysay joy bowek jo, tan pansha-dop kayo, say sota inpangibiyang jo so ni pangan maypangkep ni pamatiyo, eg medew.

¹⁸ Mapteng no say maka-amta bengat ket si Apo Shiyos ja Amejon wáred dangit. Ta si-kato,

wara met laeng shita kad-an mo ni abos mo, jet si-katoy mengi-kan ni konkona jo.

Sota koston pannemnem ni too ja pengosal to ni kokowa

¹⁹ “Aliwén sota kokowa shiya dobong i jo kamkamkaman na olnongen, ta sotan iren kokowa, kesheshala ni bigis, kesheshala ni dati, tan kaibetik ni emengibot.

²⁰ Nem say nemnemen jo et, sota pesing nga mengolnong ni kokowayod dangit. Ta shiman, enshiy onsharal so ono onkibot so.

²¹ Shi dangit komay wa-wa-shen pengolnongan jo ni kokowayo, ta sota kawad-an ni kokowayo, si-katoy wared nemnem jo ni olay.

²² “Sota mata, si-katoy may-eshig ey silew ni bakdang. Jet no mapteng i moka pengesas ja pesing mo ni kokowam, may-eshig ey napnoy bakdang mo ni dawag.

²³ Nem no ngaaw i moka pengesas nontan na kokowa, ja piyan mon sinopen ja para son si-kam bengat, may-eshig ey emin na parti ni bakdang mo ket wared embolinet. Jet no ma-enshiy istay dawag ni nemnem mo, may-eshig ey embolinet ngon emin i kawad-an mo.

²⁴ “Say too, eg mebedin na showay pansilbi-an to. No ensemek to sota sakey, okesen to sota maykadwa; no ishayaw to sota sakey, bedawen to sota maykadwa. Isonga eg kayo mebedin na mansilbi son Apo Shiyos no pilak i wa-wa-sha son si-kayo.

Karekayo manshanag ni kompormi

²⁵ “Isonga say ikowan ko son si-kayo, aliwén kayo meshanagan ni panbiyag jo: no ngarantoy kenen jo, ono inomen jo, ono ibaro jo. Ta say biyag tan bakdang, epateg nem say mekan tan baro.

²⁶ Idmang jo kari ira ja titit ja emantejatejab shi naykayang: eg ira manmoda ono mengepit, ono mengitdo ni apit shi sarosal. Nem si Apo Shiyos ja Amejon wáred dangit, si-katoy ememekan son si-kara. Jet si-kayo, mas epateg i biyag jo nem say sota ira titit.

²⁷ Sota joka panshanshanag, eg to met peshokey i biyag jo ni angken ootik.

²⁸ Apay nga sota ibaro joy joka panshanshanagi? Asas jo kari ira sota sabsabong shima shontog; nemnem jo kari no toway toka pesing nga manbiyag. Eg met man-obda ono mengebel ni baro,

²⁹ nem iyay i ikowan ko son si-kayo. Angken si Ari Solomon ja kabaknangan nonta bayag da, emin sota osal ton nankemapteng, eg sha pay ingesen i kamapteng ira nima sabsabong.

³⁰ No si Apo Shiyos ket eg to i-oway sota edet shima shontog ja wára niman et no kabasan ket maypool shi apoy, sinto pay kayo mangon too to ja i-oway to. Isonga eg tokejo baybay-an. Si-kayo, ootik eshan i pamatiyo, isonga kayoka meshanagin pasiya.

³¹ Karekayo meshanagan ja kowan jo ey, ‘Towa emoy pengal-an da ni i-ala ni mekan?’ ono, ‘Towa emoy pengal-an ni i-ala ni ma-inom, ono ibaro?’

³² Tep si Amejon wáred naykayang, amta ton

emin i mesepol jo. Sota ira toon enshiy pamatira son Apo Shiyos, anam shen si-karay manshanag ni panbiyangan sha, aliwén si-kayo.

Sota pantoshayan nen Apo Shiyos i nemnemen

³³ “Nem say epateg jen mesepol la nemnemen jo, sota pantoshayan nen Apo Shiyos, tan sota mapteng ja piyan ton dag-en jo. Jet no sajay i pesing jo, emin na banag ja kasapolan jo, i-akan to.

³⁴ “Karekayo manshanag niman maypangkep ni ma-onod alin timpo, ta shi ma-onod alin timpo, si-kato ngoy pannemnem jo ni mesepol jo no onmotok sotan ali ngon akew. Sota problima niman na akew, si-katoy nemnemen jo bengat; eg jo i-eshom i problima ja onsabi nem kabasan.

7

Aliwén en damsisen i eshom

¹ “Karejo nemnemen i nankamali-an ni eshom ja si-katoy pengikowanan jo ma ey ngaaw ira, say eg ngo ikowan nen Apo Shiyos ey ngaaw kayo.

² Sota wáred nemnem jo ja joka pesing nga mandokod ni kowan jo ey nankolongan ni eshom, si-kato ngoy osalen nen Apo Shiyos ja pandokod to ngo ni nankolongan jo.

³ Apay nga sota ootik ka naybosi shi mata ni kait mo i moka iningning, ey si-kam ma mismo ket eg mo nemnemen ey ebadeg i naypadkal shi matam?

⁴ Na-alas ja mo ikowan so ni kait mo ey a-kalen mo sota naybosi shi mateto, ey si-kam ket ebadeg i naypadkal shi matam ma shorog.

⁵ Ngaaw ita moka pesing ja moka idibak i ngaaw wa nemnem mo! Ekal mo nin sota mismon naypadkal shi matam say kosto may pan-esas mo, et say asen mo men pasiya ja a-kalen sota naybosi shi mata ni kait mo.

⁶ “Nem mesepol la asen jo nin i pengipiyalan jo so ni inbilin nen Apo Shiyos, ta aliwén anam ni toon singa asoy ogadi to. No ipiyal jo son si-kara sota inbilin nen Apo Shiyos, sekitan shakejo et bengat. Kasta met no wáray ensekig ga too ja singa keshel i itsora to, angken eg jo ngo ipiyal sota ebanol la maypangkep ni pantoshayan nen Apo Shiyos. Ta no sajay i pesing jo, singa joka pan-i-akan shi keshel sota ebanol la para alkos ni baro ni too. Jet sajay ya ebanol, kenshat ta damsisen mango ira nonta keshel iyay et pan-ikatin sha bengat.

Ma-ekan si Apo Shiyos

⁷ “No wáray mesepol jo, si Apo Shiyos i panbeka-an jo, jet i-akan to. No eg kayo on-ekdas ja manshéwat son si-kato, ewáten joy mesepol jo. Panogtog kayo nin et idokatan tokejo.

⁸ Ta emin ira sota manbeka, ono manshéwat son Apo Shiyos, si-kara ngoy mengéwat ni medepo son Apo Shiyos. Jet emin ngo iray menogtog, si-karay maydokatan.

⁹ Arig toy san-ama. Wara ayay inon-an jon nga-nga ja no manbeka so nen ameto ni tinapay ket bato i i-akan nen ameto?

¹⁰ Ono kaspangarigan ey sota anak to ket manbeka ni piskaw, apay oleg i i-akan to aya?

Enshi, say i-akan nonta ama so ni anak to, sota mapteng nga ibaga to.

¹¹ Si-kayo, angken ngaaw i aramid jo, amtayo met ja mengi-kan ni mapteng nga ibaga ni anak jo. No satan i wára son si-kayo, mas pay ya amta nen Apo Shiyos ja Amejod dangit ja mengi-kan ni mapteng nga banag so nonta emengshaw son si-kato ni kasapolan to.

Sota sakey ya epateg ga bilin

¹² “Sota piyan jon pesing ni kait jon too son si-kayo, si-kato ngoy pesing jo nonta eshom. Ta si-katoy wáred ma naysolat ta bilin nen Apo Shiyos, tan si-katoy kowan ira nonta para padto nonta bayag da.

Sota arig ni edipit ta shalan

¹³⁻¹⁴ “No sota maypangkep ni pengitoshong jo shi biyag ja enshiy to engintegan, may-eshig shi sakepan ja edipit. Nem sota embanaw wa sakepan, inam-ay ya panshalnan, isonga eshakel i kaonsekep nodtan. Nem sotan i mengitoshong shi kesheshalan. Sota sakepan na edipit, edigat ta panshalnan, nem sotan i mengitoshong shi biyag ja enshiy to engintegan. Aliwén eshakel i kaonsekep shi edipit, nem si-kato komay seskepen jo.

Sota arig ni mola tan sota dames to

¹⁵ “Tanshaaniyo sota kowan sha ey para padto kono ira nen Apo Shiyos nem o-owap i shaka ikokowan. No wára di ira, singa maronong ira nem mareshal gayam ira ni pamatiyo.

¹⁶ Sajay ira, say pengamta-an jo no to-to-wén para padto ira, asas jo nin i shaka dagdag-a. Say kay-eshigan ni pengamta-an jo ni itsora sha, inges to sota mola. Aliwén shi sebit i ka-epitan ni kowan sha ey obas, ono sota kowan sha ey higos. Eg ondames i mola ni dames ni sakey ya kalasi ngon mola.

¹⁷ Sota molen mapteng, mapteng i dames to, nem sota molen ngaaw, ngaaw ngoy dames to.

¹⁸ Sota molen mapteng, eg ondames ni ngaaw; kasta met sota ngaaw wa mola, eg mebedin na ondames ni mapteng.

¹⁹ Jet emin na molen eg ondames ni mapteng, mebetang ira jay jet maypool shi apoy.

²⁰ Sajay iray kay-eshigan ni too. Ma-amta-an i itsora ni too no bidbiren i shaka dagdag-a.

Sota mayda-kam shi pantoshayan nen Apo Shiyos

²¹ “Isonga aliwén emin na too ja mengewág ey apo towak ket mayda-kam shi pantoshayan nen Apo Shiyos. Nem say mayda-kam, sota mengonod ni piyan nen Amak ja wáred dangit.

²² No ka-onoran alin akew, eshakil i mengikowan ey, ‘Pangaasim Apo, engitoshokami met ni esel nen Apo Shiyos et inkowan mi pay ey si-kam i engibetkag son si-kami. Inosal mi pay i ngaran mon engipabtik ni dimonyo so nonta ira toon eman-engaw, tan eshakil pay i milagron kaskasshaaw ja dingka mi ni in-osal mi so ni ngaran mo.’ Sajay i idason sha ali son si-kak.

²³ Nem say isongbat ko son si-kara, 'Eg takejo am-amta, ki-nan kayod jay! Ta si-kayo, ngaaw i aramid jo nontan.'

Sota arig ey showen engitowen ni baley to

²⁴ "Sota toon ontongpal niyay ya intenengan ton inkowan ko la, si-kato sota may-eshig ey toon waray nemnem to. Sajay ya too, may-eshig ey intowen toy baley tod naypilmin bato.

²⁵ Jet idi imoran ali, nandayos, nem pesed ja eg na-an-ano. Angken shimagem ni makedsang, ja sini-bok to sotan na baley, eg eto-dang, ta naytowen i tokod to nodta bato.

²⁶ Nem sota toon itenengan to bengat i inkowan ko, ja eg to pinati, may-eshig ey toon enshiy am-amta to. May-eshig ey intowen toy baley tod ma sharat.

²⁷ Jet idi imoran ali, et nandayos, shinepos to sotan na baley. Eshagem pay sotan na baley jet kolpin etowang."

Emin iyay, sajay i intoro nen Jesus so nonta ira too to nonta wara ired shontog.

Embelbel-at i toro ngo eshan nen Jesus

²⁸ Jet idi naksheng nga inkowan nen Jesus iyay, nasshaaw ira sota totoo nontan na inpangitoro to.

²⁹ Ta say itsora ni toka pengitosho, wara et ngo mowan i kepengipateg ni too nonta toka pan-itoro nem say sota toro nonta sigod ja emengitosho son si-kara, ja maistoro ni dinteg ni Hodiyo.

8

Inpamapteng nen Jesus sota ebayabayang i bakdang to

¹ Idi shimalong si Jesus nodta shontog, eshakil la pasiya ira sota toon imonod son si-kato.

² Jet nontan, waray toon dimaw ali son si-kato ja ebayabayang i bakdang to. Sotan na too, nantalimokod shi sango-an nen Jesus ja kowan to ey, "Apo, no piyan mo, pamapteng mo iya bakdang ko, say eg sha-ak seskigen."

³ Jet si Jesus, inojad toy takday to et pinishat to sotan na too. Jet kowan nen Jesus son si-kato ey, "Siya piyan kon onmapteng ka." Jet nontan met laeng, mimapteng nga shagos sota bakdang to.

⁴ Jet si Jesus, binidin to sotan na too ja kowan to ey, "Karam ikokowan iyay so ni eshom, no diket pandiritso ka et ja ondaw shima pari. Ipa-sas mo ita bakdang mo son si-kato, ja mimapteng ma. Jet pangidaton ka nonta kowan nen Moises shi dinteg ey maydeton son Apo Shiyos, say amta-en ni karakdan ey si-kam, enshi may bayang mo." Kowan nen Jesus.

Inpamapteng nen Jesus sota baga-en ni solsharo

⁵⁻⁶ Idi emanmotok si Jesus shi Kapirnaom, en inaspol nonta kapitan ni solsharo ni Roma, jet kowan nontan ey, "Pangpangaasim apo, emansekit sota baga-en ko. Eg makakeykey i bakdang to jet emandikat ta pasiya. Imed baley ko niman."

⁷ Jet si Jesus simongbat ja kowan to ey, "Ondawak da et nak pemapteng."

⁸ Nem sota kapitan ni solsharo, simongbat ja kowan to ey, “Nem si-kak, ekak maykeshi ja ondaw ka shi baley ko. Angken on-anay sota esel la ikowan mo et onmapteng ma sota baga-en ko.

⁹ Amtak ta paras ko ey angken esel bengat, kaon-anay. Ta si-kak wáray apok, jet wára ngoy solsharo ja intorayan ko. No ikowan ko nonta sakey ey ondaw, pati-en to, jet no tewálen ko sota sakey, ondaw ali. Kasta met sota baga-en ko, no ikowan ko son si-kato ey, ‘Obdam iyay’, dag-en to.” Kowan nonta kapitan ni solsharo.

¹⁰ Idi intenengan nen Jesus iyay ya kowan nonta kapitan ey sota esel nen Jesus i on-anay, nasshaaw wa pasiya si Jesus. Jet kowan to nonta ira eshakil la toon imonod son si-kato ey, “Istay sota Hodiyo et koma i makedsang i pamatira son Apo Shiyos, nem enshiy nak inon-an son si-kara ja maka-inges ni pamati niyay ya aliwén Hodiyo et ngo mowan!

¹¹ Ikowan ko son si-kayo, eshakil aliy medepod emin na sakop niya dobong, ja angken aliwén Hodiyo, jet si-karay ontongaw wa mekilikob so nen Abraham, si Isaac, tan si Jacob shima pantoshayan nen Apo Shiyos.

¹² Nem sota ira Hodiyo ja istay inpata-nil nen Apo Shiyos ja mayda-kam shi pantoshayan to, si-kara et ngo mowan sota pedaw to met laeng shima embolinet. Jet shiman, mannengnengis i wáred man, tan panngedetngat shay sangi sha ni daringit sha.”

¹³ Jet si Jesus, kowan to so nonta kapitan ni solsharo ey, “Eti akad ka, medeka sota kowan mo ta emati ka.”

Jet sota baga-en nonta kapitan, mimapteng nga shagos nonta mismon inkowan nen Jesus iyay.

Inpamapteng nen Jesus i eshakel la too

¹⁴ Jet si Jesus, dimaw shima baley nen Pedro jet simbi ton emansekit sota inepo nen Pedro ja bii. Epaladoy petang ni bakdang to.

¹⁵ Jet si Jesus, pinishat toy takday nonta emansekit jet na-kal la shagos i sakit nonta bii. Jet nontan met laeng, bimangon na shagos et inkamakaman to ira.

¹⁶ Idi mama-shem mala, eshakel ira di sota eman-engaw wa kawad-an ni dimonyo, ja indaw ni kait sha son Jesus. Jet si Jesus, esel bengat i inosal ton engipabtik so nonta dimonyo so nontan iren too. Tan inpamapteng to pay ira sota emanpansekit.

¹⁷ Sajay i edaga ta say metongpal sota inpadto nen Isaias nonta bayag da ja kowan to ey, “Si-kato aliy onsakbat so ni digat tayo, tan mengkal ali nonta sakit tayo.”

Sota ira toon kowan sha ey may-odop ira son Jesus ni olay

¹⁸ Idi inon-an nen Jesus sota eshakel la toon nandikmot son si-kato, inkowan to so nonta too to ey, “Eti, ondaw kito shima piig ni baybay.”

¹⁹ Jet nontan, waray dimaw ali ja maistoro ni dinteg ni Hodiyo, ja kowan to son Jesus ey, “Maistoro, angken toway dawán mo, mekidawak son si-kam.”

²⁰ Jet si Jesus, simongbat ja kowan to son si-kato ey, “Pannemnem ka nin, ta saja obdak, edigat. Onito pay sota atap pa animal, tan titit, ta

waray koston shaka pan-ini. Nem si-kak, enshiy koston baley ko ja pansalshengan ko.”

²¹ Jet wara ngoy sakey mowan na too nen Jesus ja kowan to ey, “May-odopak ni olay son si-kam Apo, nem nak nin isingpet si amak.”

²² Nem si Jesus, simongbat ja kowan to ey, “Kala et, olay ngo ira sota toon eg sha amtes Apo Shiyos ja mengisingpet nonta etey. Maybidang ey etey ira, jet anam shen mengibka ni etey ya too.”

Inpalsheng nen Jesus i makedsang nga shagem man makedsang nga shadoyon

²³ Jet idi nandogan si Jesus nodta bangka, ja onda-jat ma, nay-olop met laeng sota too to.

²⁴ Jet idi nonta wara ired ma baybay, ebigen kimesang i shagem nodta baybay, tan makedsang ngo i shadoyon shi baybay, isonga sota bangka, shanshanin sa-neben ni shanom. Nem si Jesus, en-amis i ogip to.

²⁵ Sota ira too to, sha binengon si Jesus, ja kowan sha ey, “Apo! Isedakan jokami! Shanshani kiton metey!”

²⁶ Jet si Jesus, kowan to son si-kara ey, “Ngantoy! Apay entakot kayo? Ara kayon too! Ootik eshan i pamatiyo!”

Si Jesus, imetan et inkowan to nonta shagem tan baybay ey onsalsheng ira et timalna men pasiya sota baybay.

²⁷ Jet nasshaaw ira ja too to ja kowan sha ey, “Ngaranto emoy saad niyay ya too? Toka pesalsheng iray shagem tan shadoyon et shaka pati-a!”

Inpabtik nen Jesus sota dimonyon pimeket shi showen toon eman-engaw

²⁸ Intoloy shen bimaliw et mimotok ira nodta dogad ja kowan sha ey Gadara. Jet waray showen too ja en nay-aspol so nen Jesus. Sajay iren too, ireka man-engaw tep waray dimonyon pimeket son si-kara, jet say shaka pan-i-iyani, shima kamposanto. Isonga enshiy emanshedan nodtan tep ireka mengila-kad.

²⁹ Jet pimekis ira ja kowan sha ey, “Anak nen Apo Shiyos! Nganto may pesing mo son si-kami? Apay dimaw ka din jokami shosa-en, ey aneng nin i timpo to?”

³⁰ Nontan met laeng, wara iray eshakil la keshel la naybolos ja nay-esop nodtan.

³¹ Isonga sota ira dimonyo, ireka mekikaasi son Jesus ey, “No pebtik jokami shiya too, say piyan mi, on-etan kami shima eshakil la keshel.”

³² Jet si Jesus inpalobos to ja kowan to ey, “Ti daw kayo.”

Jet sota ira dimonyo, bimetik ira nodta too et pimeket ira nodta eshakil la keshel. Jet sota ira keshel, namtik iren nan-ekas shima shepdas et dimened ira shi baybay.

³³ Jet sota toon istay emanbantay ira niyay ya keshel, kinano-an shen inshamag shi siyodad sota emin na epasemak, tan angken pay sota edaga so nonta showen istay kawad-an ni dimonyo.

³⁴ Jet sota ira toon engitneng niyay ya shamag, dimaw ira di ja sha inon-an si Jesus. Idi simbira, ekikaasi ira son si-kato, ja kowan sha ey, “Pangaasim, ki-nan ked jay ya kad-an mi.”

9

Inpamapteng nen Jesus sota toon eg makakeykey i bakdang to

¹ Si Jesus, en nandogan nodta bangka et pati ira sota too to, jet dimaw ira shima siyodad ja ili to.

² Jet nontan, waray binangtal ali ni totoo jet sha in-ilaw son Jesus. Sotan na toon in-ilaw sha, eg makakeykey i bakdang to. Idi indasin nen Jesus ey ebadeg i pamatira, kowan to so nonta emansekit ey, “Pan-imdeng ka kajem ko. Ta sota basol mo, epakawan.”

³ Sota eshom so nonta ira mamaistoro ni dinteg ni Hodiyo, ja wara nodtan, kowan shed nemnem sha ey, “Sajay ya too, toka pa-so-i si Apo Shiyos!”

⁴ Nem si Jesus, amta toy wared nemnem sha et kowan to son si-kara ey, “Apay nga ngaaw i joka nemnemnema?”

⁵ Say kowan jo, inba-ngat kon memekawan ni emin na basol niyay ya too, ey ekak kabaalan? Nem iyay i dag-en kon pati-an jo so. Ikowan ko niyay ya too ey man-ekad,

⁶ jet no man-ekad, amta-en jo ey si-kak sota kowan nonta para padto nonta bayag da ey Anak ni Too. Amta-en jo pay ey waray kalintegan kod ja dabaw ni shaga ja memekawan ni basol ni too.” Jet si Jesus inkowan to nonta toon eg man-ekad ey, “Alam ita amakam, jet akad ka.”

⁷ Sota too, bimangon et imakad shi baley to.

⁸ Idi inon-an ira nonta totoo sotan na edaga, naykel-ewan ira, nem inshayaw shes Apo Shiyos, tep inewatan sha ey panakabalin nen Apo Shiyos

gayam sotan na inon-an shen edaga ja inpiyal nen Apo Shiyos so ni kait shen too.

Inodop nen Jesus si Mateo ja nanbalin ni too to

⁹ Idi naksheng iyay, si Jesus, eman-ekad say on-etan nodtan na dogad, jet inon-an to sota toon manngeshan ni Mateo ja para singil ni bowis ja eman-obded opisina to. Jet kowan nen Jesus son si-kato ey, “Kala, kay-olop ka son si-kak, et manbedin ka ni took.”

Jet si Mateo, dimayat et imonod son si-kato, ja nanbalin ni too to.

¹⁰ Jet nontan, engan si Jesus tan sota too to shi baley nen Mateo, jet dinikoban ira nonta kait nen Mateo ja para singil ni bowis, tan sota eshom ma kowan ni Hodiyo ey enshiy kenshat shen too.

¹¹ Jet sota ira eshom ma Parisiyo, inon-an sha iyay et kowan sha so nonta too nen Jesus ey, “Apay nga sama maistoro jo ket emekipengan so ira nima para singil ni bowis tan sama eshom ma toon enshiy kenshat sha, ja eshakil i basol sha?”

¹²⁻¹³ Nem idi intenengan nen Jesus iyay ja kowan sha, simongbat son si-kara ja kowan to ey, “Ekak ali dimaw ja mengewis ni toon maronong, nem dimawak ali ja mengewis ira nonta toon eshakil i basol sha. Mebedin na may-eshigak shi doktor. Eg bisita-en ni doktor i enshiy sakit to, no diket sota waray sakit to. Daw kayo et ashal jo no ngantoy olog niya esel nen Apo Shiyos ja naysolat nonta bayag da ja kowan to ey, ‘Ekak kostoy animal la maydeton son si-kak, nem eg say piyan ko, kaasi-an joy eshom ma too.’ ”

In-aknan to ira ni arig jet say olog to ket emankaisa-dat sota badon toro to

¹⁴ Nontan met laeng, dimaw ali son Jesus sota too nen Juan na para bonjag, jet kowan sha ey, “Si-kami tan sama ira Parisiyo ket kanayon na mika ibiyang i pangan mi no manngidin kami, nem apay nga sama toom ket eg sha ibiyang i pangan sha?”

¹⁵ Jet si Jesus, say songbat to son si-kara, in-arig toy bakdang to shi dakin engasewa. Isonga kowan to ey, “Piyon jon ikowan ey sota ira bisita shi kasal, eg ira mengan angken wára sota dakin engasewa? Enshi, kenshat ta mengan ira. Nem wára et mangoy timpon onmotok ali ja ma-enshi son si-kara sota dakin engasewa, jet si-katoy timpon ibiyang sha so ni pangan sha maypangkep ni daringit sha.”

¹⁶ Jet si Jesus inkowan to mowan i sakey ya arig son si-kara ja kowan to ey, “Na-alas no maysekab i badon abel shi shaan na baro. No maysekab sota bado, jey onkesen, a-naten to sota nayshaitan ton shaan; nakol ni mema-ma sota epi-kat.”

¹⁷ Tan wára pay i sakey ya inkowan ton arig, ja kowan to ey, “Na-alas no may-iyon i badon adak shi na-osal la inemag shen katat ja ijanan ni adak, ja kowan sha ey ‘wineskin’. No sotan i pesing jo, onpetjag sota nay-iyonan to et onkawas sota adak. Tan angken pay sota nay-iyonan to, mepilshi. Mesepol la no badon adak, bado ngoy kay-inan to, say eg onkawas iyay ya showa.”

Inpamapteng nen Jesus sota anak nonta pangolo ni Hodiyos, man sota eshom ma waray sakit sha

¹⁸ Idi maramen eman-a-sel pay laeng si Jesus, wara ngoy mimotok alin too ja pangolo ni Hodiyos. Nantalimokod shi sango-an nen Jesus ja kowan to ey, “No mebedin, kay-olop ka son si-kak shi baley ko, ta sota anak kon bii ket ena-bosan nonta ekay. Isonga pangaasim, mo isakpal i takday mo son si-kato. No sajay i dag-en mo, manbiyag mowan.”

¹⁹ Si Jesus, dima-jat ja ekidaw, jet angken sota too nen Jesus, nay-olop ngo ira.

²⁰ Eshakel i toon imonod son Jesus et wara ngoy sakey ya biin naydaok ja nanshala ni sampolo tan showen tawen. Ekisikil la imonod son Jesus et pinishat toy kajaran ni baro nen Jesus.

²¹ Tep sota bii, kowan tod nemnem to ey, “No pishaten kos Jesus, angken sama baro to bengat, onmaptengak ma.”

²² Jet si Jesus, nanposipos et idi inon-an to sota bii, kowan to ey, “Anak ko, say minaptengan mo, sota pamatim son si-kak.” Jet nontan sota bii, nay-inshas ja mimapteng.

²³ Idi mimotok si Jesus nodta baley nonta pangolo ja nay-olopan to, wara ira sota para mosiko ni etey, tan eshakel pay iray toon kaonnanangis ni makedsang.

²⁴ Jet si Jesus, kowan to son si-kara ey, “Ki-nan kayod jay, eg etey itan na nga-nga, na-ogip bengat.” Nem sota ira totoo, inbi-wisan sha si Jesus.

²⁵ Nem idi kimi-nan ira sota eshakil la too, simekep si Jesus et inegni-an to sota takday nonta biin nga-nga, jet nanbiyag mowan.

²⁶ Sajay ya dingka nen Jesus, eshamag shiman na kedogadogad.

²⁷ Idi eman-ekad si Jesus ja edapo nodtan na dogad, waray showen ekorab ja timened son si-kato. Kimeljaw ira ja kowan sha ey, "Apo, kaasi-i jokami! Waray namnama mi ey si-kam i mengi-odi nonta nantorayan da nen Ari David!" Kowan ira nonta ekorab.

²⁸ Jet idi simekep si Jesus nodta baley, dimaw ira di sota ekorab son si-kato. Jet kowan nen Jesus son si-kara ey, "Jet kayoka memati ey mebedin na pan-esas takejo?"

Simongbat ira ja kowan sha ey, "Owen apo, kamika memati."

²⁹ Jet si Jesus, pinishat toy matesha, ja kowan to ey, "Emati kayo et metongpal sota shawat jo."

³⁰ Jet nontan, nan-asas ma ira. Jet binidin ira nen Jesus ja pasiya, ja kowan to ey, "Eg jo pa-am-anta iyay shi eshom."

³¹ Nem sajay iren too, sha et inkokowan shi eshom sota dingka nen Jesus son si-kara; nakol ni inamta-an ni totoon emin nodtan na dogad i maypangkep so nen Jesus.

³² Idi dimaw da ira sota showen ekorab, waray toon omel ja in-ilaw ali ni kait to. Say kabol la eg pan-a-selan niyay, waray dimonyo ja pimeket son si-kato ni olay.

³³ Idi inpabtik nen Jesus sotan na dimonyo nodtan na too, nan-esel ma sota istay na-omel.

Sota ira eshakil la toon engasas niyay ya edaga, nasshaw ira ja kowan sha ey, “Angken nonta bayag da ingkato niman, enshiy inges niyay ya edaga shiya ilin Israel.”

³⁴ Nem sota ira Parisiyo, kowan sha ey, “Enshi kari! Sota apo ni dimonyo i toka osala ja mengipebtik so nonta ira dimonyo met laeng nga wared too.”

Naysemekan si Jesus nodta eshakil la too

³⁵ Jet si Jesus, pinasiyal ton emin sota siyodad tan eshom ma kawad-an ni totoo. Nantoro pay shima sa-nopan ira nonta Hodiyo, tan inpalewag to sota mapteng nga shamag maypangkep ni pantoshayan nen Apo Shiyos. Inpamapteng to pay ira sota totoon ekalkalasiy sakit sha.

³⁶ Idi inon-an nen Jesus ira sota eshakil la too, naysemekan, ta say inpangidmang to son si-kara, singa na-na-josan ira ja enshi malay namnama shen pansigshan. Singa sota kalniron ebaybay-an i kasesaad sha, ja enshiy emengajowan son si-kara.

³⁷ Isonga si Jesus, kowan to so nonta ira too to ey, “Eshakil iray toon may-eshig ey ma-epit nem kolang iray man-obda.

³⁸ Si Apo Shiyos i mengibetkag ni toon mengepit, isonga si-kato ngoy pengshawan jo say mengibetkag ali ni on-atang.”

10

Inbetkag nen Jesus sota sampolo tan showen id postol to shi eshom ma ili

¹ Si Jesus, sina-nop to ira sota pinidi ton too to ja sampolo tan showa. Jet kowan to son si-kara ey, “Ipiyal ko son si-kayo ey angken sama ira dimonyo ja pimeket shi totoo, mebedin na pebtik jo. Tan sota ira waray sakit to, mebedin ngon pemapteng jo ira.”

² Say ngaran ira nonta apostol ton sampolo tan showa, sajay. Say epateg son si-karen emin, si Simon ja say sakey ya ngaran to, si Pedro. Say eshom, si Andres ja agi nen Pedro, tan si Santiago nen Juan ja san-agin anak nen Sibidi,

³ si Felipe nen Bartolome; si Tomas, si Mateo ja istay para singil ni bowis; si Santiago ja anak nen Alpio, si Tadio,

⁴ sota si Simon ja bitarano, tan si Judas Iskariote ja mengileko ali so nen Jesus shi anongosto.

⁵ Sajay iren apostol to ja sampolo tan showa, inbetkag to ira, ja kowan to ey, “Karekayo ondaw shima angken towen kawad-an ira nonta aliwen kait tayon Hodiyo, ono shima angken towen ili ni i-Samaria,

⁶ no diket say dawán jo bengat, topog jon ondaw nodta kad-an ni kait tayon Hodiyo ja singa may-eshig ey kalniron imarawi.

⁷ Emin na dawdawan jo, ikowan jo son si-kara ey sota naysadton pantoshayan nen Apo Shiyos, shanshani may timpo to.

⁸ Jet angken sota ira emansekit nodtan, pamapteng jo ira, tan no waray sebi-en jon etey, panbiyag joy eshom. Pamapteng jo pay ira sota ebayabayang i bakdang sha. Sota ira toon eman-engaw ja waray dimonyon pimeket son si-kara, pabtik jo son si-kara sota dimonyon

pimeket. Sajay ya panakabalin, inewat jon enshiy bayad to son si-kak, isonga no i-osal jod eshom ma too, eg kayo mengshaw ni bayad to.

⁹ “Karekayo manbedon ni pilak, angken sota manintimos.

¹⁰ Eg mesepol la mengita-jon kayo ni bayong, ja pengi-iyanan jo ni mesepol jod shalan, ono baron pansa-datan jo, ono sinilas sa pansa-datan jo, ono sowan. Ta sota man-obda, nebeng ton may-aknan ni kompormin mesepol to.

¹¹ No waray motoken jon ili ono baryo, say enapen jo nodtan, sota toon emepiyal. Jet pan-iyon kayo nin nodtan na baley to ingkatod eg jo pay laeng idekjas sotan na dogad.

¹² Sotan na baley ja motoken jo, ikowan jo so nonta makabaley ey si Apo Shiyos, si-katoy onbindisiyon son si-kato.

¹³ Jet no satan na too ket anam toy inkowan mon bindisiyon ta maronong, sota inkowan jon bindisiyon nen Apo Shiyos, ontoloy son si-kato. Nem no eg to anam ta ngaaw wa too, bebawi jo sota bindisiyon nen Apo Shiyos ja inkowan jo son si-kato.

¹⁴ Jet no sotan iren too nodtan ket eg shakejo ewaten, ono eg sha pati-en i ikowan jo son si-kara, sota depok ja naypeket shi sediyoy, pokpok jo nin asan joka ilekjas sotan na baley ono ili. Ta si-katoy pengamta-an sha so ey enshi may biyang jo son si-kara.

¹⁵ Jet no timpo alin pengigsheng nen Apo Shiyos no sipay maysedakan, say podnon mepe-samak so nonta too nodtan na dogad, mas embel-at i keshosara nem say sota toon i-Sodoma,

tan i-Gomora.

¹⁶ “Tanshaaniyo ta ibetkag takejo ja singa kaln-iron naydaok shima atap pa aso. Isonga mesepol la mantanshaan kayo ja inges toy kepantanshaan ni oleg. Nem mesepol la say itsora ni ogadiyo met laeng, inges toy itsora ni kalopati ja eg meneshal.

¹⁷ Tanshaaniyo sotan na toon kaydaokan jo, ta sota eshom son si-kara, si-kara met laeng i mengidaw son si-kayo shi oskaro. Tan angken shima sa-nopan sha, sepsepdaten shakejod man pay.

¹⁸ Jet ikoyod shakejo pay shi sango-an nonta ira gobinarol, tan sango-an nonta ira ari, ta too takejo. Jet sotan i waya jon mengiringan na mengikowan son si-kara ni maypangkep son si-kak. Tan angken sota ira aliwen Hodiyo, waray waya jon mengikowan son si-kara.

¹⁹ Jet no i-awat shakejod man, karekayo meshanagan no ngarantoy isongbat jo son si-kara, ono ikowan jo, ta sota isongbat jo, maypa-amta met laeng son si-kayo nontan na oras ja shakejosoka pan-ibag-i.

²⁰ Ta aliwen si-kayon mismo i onsongbat so, no diket sota Ispirito nen Apo Shiyos ja Amejo, si-katoy mengitoshong son si-kayo.

²¹ “Jet sajay alin timpo, angken san-agin daki, ibaag nonta sakey i agi to shi eshom, ey eg et meshanagan ey angken bono-en sha. Inges niyay met laeng i pesing ni a-ama shi annak sha. Jet angken sota ira a-anak, kontra-en shay maka-anak son si-kara et pebonora pay ira.

²² Jet angken si-kayo, sota joka pematil son si-kak, si-katoy kabol la okesan shakejo so ni

karakdan na too. Nem sota mengitoded ni angken nganton digat ja onsabi son si-kato, si-katoy maysedakan.

²³ No pedigaten shakejo shi sakey ya ili, betik kayo shi eshom ma ili. Podno iyay ya ikowan ko son si-kayo. Mebedin na eg jo posposen na bebtikan na emin sota ili ni Israel ey onmotok ali sota kowan ni para padto ey Anak ni Too.

²⁴ “Iyay i nemnemen jo: sota man-ashal nin, eg ibaingan ni totoo nem say sota emengitosho son si-kato. Inges to met laeng sota baga-en, eg sha ibaingan nem say sota apo to.

²⁵ Sota man-ashal, mepnek koma no ingesen to sota emengitosho son si-kato; jet angken ngo sota baga-en, mepnek ngo koma no ingesen to sota apo to. Say olog niyay, no si-kak ka apo jo ket eg sha ibaingan, ja kowan sha ey apo sha-ak ni dimonyo, mas pay ya ngaaw i ikokowan sha maypangkep son si-kayon took.

²⁶ “Nem say kowan ko, karekayo ontakot son si-kara. Sota inkowan ko ni abos jo, ja singa esa-dinan ono nay-emot niman, mesepol la amta-an ni eshom.

²⁷ Sota inkowan ko son si-kayo ja sikrito, si-kato ngoy ikowan jo shima karakdan. Jet sota intenengan jon intetobok son si-kayo, si-kato ngoy ipalewag jod karakdan.

²⁸ Karekayo ontakot so nonta ira makakontra son si-katejo, tep bakdang bengat i kabaalan shen bono-en; eg sha mebedin na pilshi-en i dinawayo. Nem say mesepol la metekotan koma, si Apo Shiyos, ta waray kabedinan ton meneshal ni bakdang tan dinawa ni too shi impiyarno.

29 “Nem wára ngoy ebadeg ga semek nen Apo Shiyos. Nemnem jo kari sota titit. Emaydeko i showa ni sakey ya sintimos nem angken sanseskey so nonta titit ja singa enshiy banol sha, eg ibiyang nen Apo Shiyos. No wáray ma-kas sa angken sakey ya titit, amta nen Amejod dangit.

30 Angken pay sota bowek ni toktok jo, amta nen Apo Shiyos i kabebilang to.

31 Isonga karekayo ontakot tep mas ebadbadeg pay i semek to son si-kayo nem say sota eshakel la titit.

32 “Sota toon mengikowan so ni kait ton too ey si-kato ket took, ikowan ko ngo son Amak shi dangit ey sotan na too ket took ka emepiyal.

33 Nem sota toon mengikowan so ni too ey eg towak amta, ibiyang ko ngo shi sango-an nen Amak shi dangit.

34 “Aliwén jo ipangkep ey dimawak alin mengi-kan ni olnos shiya dobong. Aliwén sota maypangkep ni olnos i dinawan ko di, no diket say panbenagan ali ni indaw ko, eg man-i-inawatan i totoo.

35 Angken sota san-ama, eg ira man-inawatan, ono sota san-ina, eg ngo ira man-inawatan. Angken pay sota san-inepon bii, eg ira man-inawatan.

36 Jet say wa-wa-sha ja mengontra so ni too, sota wára met laeng nodta pamilja to.

37 Sota pipiyan toy ameto, ono ineto nem say si-kak, eg maykeshin took. Angken sota makapipiyan ni anak ton bii ono daki nem say si-kak, eg maykeshi ngo ey took.

³⁸ Jet sota toon eg to enosan i kaybebaing to ono kebitay to maypangkep son si-kak, eg maykeshin took, ta eg to onoran i inges ni pengenos ko.

³⁹ Sota mengawán ni biyag to, mepokaw son si-kato et ngo mowan. Nem sota mepokaw i biyag to maypangkep son si-kak, odi-en to met laeng sotan na biyag to ingkatod ingka.

⁴⁰ “Sota mengewát son si-kayo, may-eshig ey si-kak i inewát sha. Jet sota mengewát son si-kak, may-eshig ey say inewát sha, si Apo Shiyos ja engibetkag ali son si-kak.

⁴¹ Sota menintil ni para padto nen Apo Shiyos ta amta to ey sotan i mengipedawag ni esel nen Apo Shiyos, may-inges i kon-oren to nodta kon-oren nonta para padto ja i-akan nen Apo Shiyos son si-kato. Jet sota toon menintil ni toon maronong, ta amta to ey mapteng nga too, may-inges i kon-oren to nodta maronong nga too ja i-akan nen Apo Shiyos son si-kato.

⁴² Jet agpayso iyay. Sota toon mengi-kan ni angken shanom ma inomen nonta sakey ya kabeba-an na took, ta amta to ey si-kak i makatoo son si-kato, sotan na toon mengi-kan ni shanom, sigoradon waray kon-oren to ja i-akan nen Apo Shiyos son si-kato.”

11

¹ Idi naksheng nga intod-an nen Jesus sota sampolo tan showa ja apostol to ja inbetkag ton en mengitoshu, dimaw ngo nodta dogadogad ja nay-esop nodtan ja en nantoro so nonta totoo nodtan.

En inbag-an nonta too nen Juan ja para bonjag si Jesus

² Jet nontan, si Juan ja para bonjag, ja naybalod, shinemag to sota maypangkep ni dingdingka nen Cristo, jet say inpasing to, engibetkag ni totoo to son Jesus ja en mengibeka son si-kato,

³ no si-kato sota inkari nen Apo Shiyos nonta bayag da ey ibetkag to di ja mengisedakan. Jet inbaga sha pay ey, “Si-kam sota naypadton ibetkag ali nen Apo Shiyos, ono waray apil la seskeshen mi?”

⁴ Simongbat si Jesus ja kowan to so nonta inbetkag nen Juan ey, “Kay-oli kayo jet ikowan jo so nen Juan sota inon-an jo tan intenengan jo ni kawasha jod jay.

⁵ Ikowan jo ey sota ira nankekorab nan-asas ira, sota ira nankepilay nan-akad ira, sota nankebayang i bakdang sha mimapteng ira, sota ira nanketoleng emantetneng, sota eshom ma nanketey nanopawil ira, tan sota ira nankebiteg naytoro son si-kara i mapteng nga shamag maypangkep son Apo Shiyos.

⁶ Si Apo Shiyos i onbindisiyon so nonta enshiy showashowa to son si-kak.” Kowan nen Jesus so nonta ira inbetkag nen Juan.

⁷⁻⁹ Idi dimaw da sota inbetkag nen Juan, inkowan ma nen Jesus so nonta ira totoo ey, “Nonta dimaw kayo so nen Juan shima dogad ja kad-an ton nay-araWi shi ili, amtayo ey si-kato ket para padto nen Apo Shiyos. Isonga dimaw kayod man ja en mengesas ni toon para padto nen Apo Shiyos, aliwen say kayo mengesas ni

toon ekapoy ja singa bolong ni edet ja enam-ay ya iwágas ni shagem. Aliwá ngon say dinawán jod man ket say kayo mengesas ni toon nanbaro ni mapteng, ta say ka-asan ira niyay ket shi siyodad ja engkakembaleg i baley sha. Dimaw kayon en mengesas ni para padto et siya, inon-an joy toon engatngato pay nem say sota eshom ma para padto nen Apo Shiyos.

¹⁰ “Ta si Juan sota kaytoshongan nonta esel nen Apo Shiyos ja naysolat nonta bayag da, ja kowan to ey, ‘Waray ibetkag ko ja mepangdo ey say si-kam, jet to isagana ira sota totoo.’ Sajay i padto nonta bayag ja timorong son Juan.

¹¹ Jet ikowan ko et son si-kayo. Podno ey si Juan, enshiy to kay-ingesan so ni emin na toon nay-anak, andken sipa. Nem say sakey ya toon kabeba-an shi pantoshayan nen Apo Shiyos, si-katoy engatngato nem say si Juan.

¹² “Jet idi nonta inshogi nen Juan ja para bon-jag i obda to, ingkato niman, sota pantoshayan nen Apo Shiyos, eshakil la pasiya i makapiyan. Jet sota ira eshom, ireka emekisikil, ta piyan shen mayda-kam.

¹³ Ta sota emin na wáred bilin ja in-awat nen Moises nonta bayag da, tan emin sota inkowan ira nonta para padto, inpadtora sota maypangkep ali nonta pantoshayan nen Apo Shiyos. Si Juan i sakey ya engipadto et si-katoy ka-onoran.

¹⁴ Awatiyo koma iya naka pan-ikowan, ey si Juan, si-katoy tongpal nonta padto nonta bayag da ey si Elias, ja para padto nen Apo Shiyos nonta bayag da, ondaw mowan ali.

¹⁵ Niman i wáray wáya jon mengitneng niyay ya naka pan-ikowan, isonga itnengi jon pasiya.

¹⁶ “Ara kayon too niman! Sota pemedaw bengat i amtayo. Ikowan koy joka kay-eshigi. Singa a-anak kayon wáred ma malkaro, ja ensikshal la meki-asil.

¹⁷ Kowan ira nonta eshom ma a-anak ja ka-asil jo ey, ‘Nanmosiko kami para son si-kayo, nem eg kayo met edadsakan! Insa-dat min nimangis, nem eg kayo met ekinengis!’

¹⁸ Nonta timpon inpangitoro nen Juan, nagshengan i toka kena, eg menginom ni adak, jet kowan jo ey eman-engaw.

¹⁹ Jet si-kak niman na indaw ko di, enganak ni inges toy joka kena, tan enginomak, nem binedaw jowak met laeng, ja kowan jo ey, ‘Asas jo kari iman na too: makibel, ma-inom ni adak, tan say kajem to pay, sota ira para singil ni bowis, tan angken pay sota ira eshom ma toon enshiy kenshat sha ja eshakil i basol sha.’ Sotan i kowan jo, nem sota ira emati son Juan, tan emati son si-kak, si-karay ka-asan to ey say plano nen Apo Shiyos, podnon mapteng ni olay.” Kowan nen Jesus.

Kakaasi ali sota ira eg memati son Jesus

²⁰ Jet nontan si Jesus, wáray inkowan to maypangkep nonta dogad ja dingka-an to so ira nonta eshakil la milagro, jet inkowan toy basol ni totoo nodtan na dogad, ta eg sha inbebawi i basol sha.

²¹ Jet kowan to ey, “Kakaasi kayo di ja toon i-Korasin, tan si-kayon tood Bitsaida. Eshakil i dingkak ka milagro shi ili jo jet inon-an jo,

nem eg kayo nanbebawi. No sajay komen milagro ja inpa-sas ko son si-kayo ket inon-an ni tood Tira tan tood Sidon, angken aliwen too ira nen Apo Shiyos, sigoradon nanbebawi ira nonta mismon inon-an sha sota milagro, tan wára pay i ka-on-anan to ey ireka mandeshingit maypangkep ni basol sha.

²² Nem ikowan ko son si-kayo, no onsabi ali sota timpon pengigsheng nen Apo Shiyos no sipay maysedakan, mas embel-at i keshosayo nem say sota tood Tira, tan tood Sidon.

²³ “Tan si-kayo ngon tood Kapirnaom, kowan jo ey ingato jon shorog i bakdang jo ingkatod dangit, nem ayshi, eg mebedin! Maybeba kayod impiyarno. Ta no sota milagro ja edaga shita kad-an jo ket istay edaga koma shi Sodoma nonta bayag da, sigoradon nanbebawi komay tood man. Jet sotan na dogad, istay wára koma niman ja eg pinilshi nen Apo Shiyos.

²⁴ Nem iyay i ikowan kon podno son si-kayo. No onmotok ali sota akew wa pengigsheng nen Apo Shiyos no sipay maysedakan, mas embel-at i keshosayo nem say sota keshosa ni tood Sodoma.”

Nem sota ira toon piyan ton metod-an, i-aknan to ira ni pansigshan sha

²⁵ Nontan met laeng, si Jesus kowan to son Apo Shiyos ey, “Ama, apo ni dangit tan saja dobong, man-iyamanak son si-kam, tep say inpa-amta-an mo so maypangkep ni pantoshayan mo ket sota ira toon mapiyan na metod-an. Nem sota ira toon kowan sha ey eshakel i amta to, eg

mo ipalobos sa amta-an shay maypangkep ni pantoshayan mo.

²⁶ Owen Ama, edaga iyay tep si-katoy piyan mon medeka." Sajay i iyaman nen Jesus son Apo Shiyos.

²⁷ Jet inkowan to pay ey, "Si-kak bengat i inpiyalan so nen Amak ni emin. Si-kak bengat i maka-amta ni emin na maypangkep son si-kato, tan si-kato ngo bengat i maka-amta son si-kak ka Anak to. Isonga sota piyan kon pengitosho-an maypangkep ni pantoshayan nen Apo Shiyos, si-katoy itoro-an ko so."

²⁸ Jet kowan to pay ey, "Si-kayon nayda-karan ni toro ni eshom, daw kayo ali son si-kak ja manbedin ni took. May-eshig ey singa engaksiw kayo ni kalka ja eg jo posi-en. Daw kayo ali son si-kak et pan-ibdey takejo ni digat jo.

²⁹⁻³⁰ Si-kak i mengitosho son si-kayo et may-eshig ey engka-jas i kalken pa-aksiw ko son si-kayo, ja inam-ay ya ma-aksiw. Si-kak, na-anosak et no man-ashal kayo son si-kak, eg medikatan i nemnem jo." Kowan nen Jesus.

12

Eg nan-inawatan si Jesus tan sota ira toon mangidin

¹ Naytompong nontan ja nanshalan si Jesus nodta oma ja emola-an, jet sota too nen Jesus, ematod ira nonta naymola jet kinotim shen kinan, ta na-agang ira. Timpo ni ngilin ni Hodiyo nontan na akew,

² isonga idi inon-an ira nonta Parisiyo, kowan sha son Jesus ey, “Asas mo kari ira ma toom! Apay nga dingkara iman ey inparit ni dinteg tayon Hodiyo i mengetod no timpo ni akew wa ngilin?”

³ Si Jesus, simongbat ja kowan to son si-kara ey, “Arig to ngo sota inpasing nen Ari David nonta bayag da ni inka-ekang to, tan sota ira too to. Apay eg jo aya amtay dingka to?”

⁴ Dimaw shima tolshen baley ya inbilang sha ey para son Apo Shiyos et inda to sota tinapay ya naydaton son Apo Shiyos, jet kinan to. Jet in-aknan to pay ira sota too to. Sajay i inpasing to anta nga nayparit son si-kato tan sota ira kait to i pangan sha nontan na tinapay ya naydaton son Apo Shiyos. Ta sota pari bengat i palobos sa mengnan nontan na tinapay.

⁵ Jet say sakey pay, apay eg jo aya amtay dinteg tayon Hodiyo ja no timpo ni akew wa ngilin, sota ira pari shima Timplo ket mebedin na man-obda ira? Jet sotan na dag-en sha no akew ni ngilin, aliwen basol sha.

⁶ Isonga angken saja ira took, aliwen ngaaw sotan na dingkara, ta iyay niman na timpo shiya kad-an jo i toon eshayshayaw nem say Timplo.

⁷ Bimaki itan na kowan jo, ta eg jo inewatan i olog nonta esel nen Apo Shiyos ja naysolat nonta bayag da, ja kowan to ey eg to kostoy pengileton ni animal son si-kato, no diket say piyan to, sota pengaasi tayo ni kait tayon too. No istay inewatan jo iyay, eg jo inba-ngat i kowan ey waray basol ni enshiy basol to.

⁸ Si-kak ja kowan nonta para padto nonta

bayag da ey Anak ni Too, si-kak i mengikowan no ngantoy mebedin na dag-en no akew ni ngilin.” Kowan nen Jesus.

Inpamapteng nen Jesus sota toon eki-ngoy i takday to

⁹ Nontan met laeng nga akew ni ngilin ni Hodiyo, dimaw si Jesus shima sa-nopan ira nonta Hodiyo nodtan na dogad,

¹⁰ jet simbi tod man i too ja eki-ngoy i sakey ya takday to. Jet wára ngoy too nodtan ja makakontra son Jesus ja nansalodsod son si-kato ta piyan shen balang nem wáray isongbat to ja ibasalan sha so ey basol nen Jesus; isonga kowan sha ey, “Ngaaw aya i pemapteng so ni toon wáray sakit to no timpon akew ni ngilin tayon Hodiyo? Ngantoy moka pengi-odog ni dinteg tayo?”

¹¹ Simongbat si Jesus ja kowan to ey, “No kaspangarigan ey wáray sakey ya too son si-kayo ja sesakey bengat i kalniro to jet na-kas shi pel-og ni akew wa ngilin, apay baybay-an to aya? Kenshat ta to met laeng al-en nontan na akew shima pel-og.

¹² Jet say biyag ni too, mas pay ya epatpateg nem say sota kalniro. Isonga say kowan ko, eg maypeshit i pandeka ni mapteng no akew wa ngilin.”

¹³ Jet kowan to so nonta toon eki-ngoy i takday to ey, “Oyad mo ita takday mo.” Pinati to sota kowan nen Jesus et mimapteng nga agpayso, ja may-inges ma nodta sakey ya takday to.

¹⁴ Nem sota ira Parisiyo, bimo-day ira jet nantatabal ira no ngarantoy pesing shen memono son Jesus.

¹⁵ Nem si Jesus, amta toy pangkep sha, isonga indekjas to sotan na dogad. Nem eshakil iray imonod son si-kato, jet sota ira manpansekit, inpamapteng to iren emin.

¹⁶ Jet binidin to ira ey eg sha ikokowan i maypangkep son si-kato so ni angken sipa.

¹⁷ Saja eg kosto nen Jesus ey amta-an ni emin i maypangkep son si-kato, si-katoy tongpal nonta padton Isaias nonta bayag da ey ekombaba ali sota ibetkag nen Apo Shiyos ja mengisedakan. Say kowan nonta padton Isaias, ja esel nen Apo Shiyos met laeng, kowan to ey,

¹⁸ “Sajay sota mansilbi di son si-kak ja pinidik; si-katoy ensemblek ko, ja emengi-kan ni naka pan-imdengi. Sota Ispiritok, si-katoy mengitoshong son si-kato. Jet sajay alin mansilbi son si-kak i mengipa-amta nonta kosto ja piyan ko so nonta ira toon eg maka-amta son si-kak.

¹⁹ Sajay ali, eg mekibekal, ono onkeljaw, jet eg to ikedsang shi karakdan no waray ikowan to.

²⁰ Sota ira ekapoy, eg to ma-ma-en, no diket pekedsang to ira. Kaspangarigan ey sota singa silew wa emanko-ko-shep, eg to kolpi-en na a-shepen. Jet shi ka-onoran, isaad toy toray to jet poro mapteng i maysa-dat.

²¹ Si-kato pay i kawad-an ni namnama ira nonta too ja eg nin maka-amta son si-kak.” Sajay i padto nen Isaias ja esel nen Apo Shiyos.

Inba-ngat shen inkowan ey apo ni dimonyo i

ka-osala nen Jesus ja mengipebtik ni dimonyo

²² Waray toon ekorab tan eg maka-esel pay ja nan-inan ni dimonyo ja indaw sha son Jesus et inpamapteng to sotan na too et nan-esel ma, tan nan-asas.

²³ Jet sota ira eshakil la totoo, nasshaaw iren pasiya, jet kowan sha ey, "Sajay emo sota inpadtoren Anak nen Ari David, ja ibetkag kono di nen Apo Shiyos son si-katejo? Si-kato emo, ono apil?"

²⁴ Nem idi intenengan ira nonta Parisiyo sota kowan ira nonta totoo, dinamsis sha, ja kowan sha ey, "Say pan-osala niyay ya too ja mengipebtik ni dimonyon pimeket shi totoo, sota apo met laeng ni dimonyo ja si Bilsibol."

²⁵ Si Jesus, amta toy wared nemnem sha et kowan to son si-kara ey, "Dokodoko tan na inkowan jo. Apay nga inkowan jo ey sota apo ni dimonyo i naka osala? Eg towak todongan na mengipebtik ni kait to met laeng ja dimonyo, ta amta to ey sajay, arig toy ilin manshowa. No manshowen shorog i sakey ya ili asan ireka mankobat, kenshat ta mepilshi sotan na ili. Kasta met sota siyodad, ono pamilja, ja manshowa, mansisi-jan ira sota totoo.

²⁶ Eg mebedin na si Satanas, pebtik to met laeng i kait to, tep amta to ey no dag-en to iyay, eg onbayag i pansaad to.

²⁷ No kowan jo ey si-kak ket say naka osala ni naka pebtik so ni dimonyo ket sota apo met laeng ni dimonyo, kowan jo ey si-kato ngarod i ka-osala ni too jo ni shaka pebtik so ni dimonyo? No sotan i kowan jo, angken sota ira too jo, bedawen sha

ita kowan jo ey sota apo ni dimonyo i ema-osal ni pebtik so ni kait ton dimonyo.

²⁸ Nem enshi: say naka osalen pebtik so ni dimonyo, sota Ispirito Santo nen Apo Shiyos, jet sotan i amta-an jo so ey say pantoshayan nen Apo Shiyos, wára ma son si-kayo.

²⁹ “Say agpayso, inebak ko nin sota apo ni dimonyo, jet arig to sota matekal la too. Eg kabaalan ni sakey ya toon onsekep shi baley ni matekal la too ja kowan to ey al-en ton emin sota wára nodta naydaem ni baley. Ayshi, kenshat ta say pesing to nin, bedoren to sotan na too asan toka al-en emin sota wára nodta baley.

³⁰ “Sota toon eg on-onod son si-kak, wára ira son Satanas ja makakontra son si-kak. Jet sota eg ontolong son si-kak ja mengolnong ni too, singa shaka pansisi-jan ira sota toto.

³¹ Isonga ikowan ko son si-kayo ey emin na basol ni too, ono sota ngaaw ja shaka ikokowan, mebedin na mepekawanan. Nem sota ngaaw ja shaka ikokowan maypangkep nonta Ispirito Santo nen Apo Shiyos, eg mebedin na mepekawanan.

³² Angken sipen too ja ngaaw i toka ikokowan maypangkep nonta kowan sha ey Anak ni Too, mebedin na mepekawanan. Nem sota ngaaw i toka ikokowan maypangkep nonta Ispirito Santo nen Apo Shiyos, eg mebedin na mepekawanan niman, angken pay shi ma-onod alin timpo ingkatod ingka.

³³ “Ngaran ni kowan jo ey naykaitan ko so nen Satanas? Na-alas i joka ikowan ey maptengak nem sina-shom jet kowan jo mowan ey ngaawak.

Topog jon ikowan ey mapteng no mapteng; eg jo bedbediwan; jet no kowan jo ey ngaaw, topog jon ngaaw ngo ni olay. Arig toy mola: no mapteng nga mola, mapteng ngo ni olay i dames to, jet no ngaaw wa mola, ngaaw ngo ni olay i dames to. Say ka-amta-an ni itsora ni mola, no mapteng ono ngaaw ket, sota dames to.

³⁴ “Si-kayon singa oleg i ogadiyo, enshiy mapteng nga esel ja kaonbo-day shi bongot jo ta ngaaw i wared nemnem jo. Ta sota wared nemnem ni too, si-kato met laeng i kaonbo-day shi bongot to no waray ikowan to.

³⁵ Sota toon mapteng i wared nemnem to, mapteng ngoy toka ikowan ta si-katoy wara son si-kato. Nem sota toon ngaaw i wared nemnem to, ngaaw ngoy toka ikowan ta si-katoy wara son si-kato.

³⁶ Ikowan ko son si-kayo, no timpo alin pengigsheng nen Apo Shiyos no sipay maysedakan, emin sota esel la inba-ngat ni toon inkowan ja enshiy silbi to, songbatan sha son Apo Shiyos.

³⁷ Ta sota esel ja inkokowan mo, no mapteng, si-katoy kaybetayan to ey si-kam, maronong ka ja paboran toka so nen Apo Shiyos. Nem sota esel met laeng nga inkokowan mo, no ngaaw, si-katoy kaybetayan to ey si-kam meshosa ka.” Kowan nen Jesus.

Pan-ibaga ira nonta eshom ma too ey mandeka si Jesus ni milagro

³⁸ Sota eshom so nonta ira mamaistoro ni dinteg ni Hodiyo, tan sota ira Parisiyo, kowan

sha son Jesus ey, “Apo, piyan min wáray dag-en mon milagro say asen mi.”

³⁹ Nem si Jesus sinongbatan to ira ja kowan to son si-kara ey, “Ngaaw iray aramid ni too ma niman, eg sha nemnemen si Apo Shiyos! Say shaka pan-ibaga, sota milagro ta kowan sha ey si-katoy asanan sha so no agpayson si Apo Shiyos i engibetkag son si-kak. Nem enshiy milagro ja en maypa-sas son si-kara niman! Say pengamta-an jo ey inbetkag towak ali nen Apo Shiyos, no onsabi son si-kak sota inges toy epasemak so nen Jonas, ja para padto nonta bayag da.

⁴⁰ Ta si Jonas, tedon akew to, tan tedon dabi to shima ekes nonta ebadeg ga nigay shima baybay. Jet si-kak ja kowan sha ey Anak ni Too, iso met laeng ja metdon akew tan dabi shima nayshalem ni bo-day.

⁴¹ No timpo alin pengigsheng nen Apo Shiyos no sipay maysedakan, ondayat sota toon i-Niniba ja intod-an nen Jonas, jet si-karay mengikowan ey si-kayon too niman, kenshat ta meshosa kayo. Tep si-kara, nanbebawi ira nonta intenengan shay esel nen Apo Shiyos ja inkowan nen Jonas son si-kara. Nem ikowan ko son si-kayo ey iyay shiyay niman i engatngato nem say si Jonas jet eg jo pinati.

⁴² Say sakey mowan, sota arin bii ja edapod ma pesaw. Ondayat ali no timpon pengigsheng nen Apo Shiyos no sipay maysedakan jet ikowan to ey kenshat ta meshosa kayo. Tep si-kato, edapod arawin dogad ni indaw ton to itenengan i kalaing nen Ari Solomon ni toka pantosho. Jet niman,

asas jo ta wáred jay i engatngato ey say si Ari Solomon, jet eg jo mowan pinati.”

⁴³ Jet kowan pay nen Jesus ey, “No sota dimonyo ket onbetik shi too, eman-eka-ekad shima kamag-an ja eman-ena-enap ni pansalshengan to nem enshiy to sepolen.

⁴⁴ Jet nemnemnemen to ey on-oli mowan shima toon istay kawad-an to. Jet no may-odi, sebi-en ton enshiy nan-iyan et ikowan to ey, ‘Siya, mimapteng ma iya baley ko, edinisan.’

⁴⁵ Say pesing to, ondaw ja en mengodop ali ni piton kait to ja nankekedsel ey say si-kato, jet onsekep iren man-iyan nodtan na too. Jet sotan na too, mema-may kasesaad to nem say nonta pilmiro. Sajay i kay-eshigan ni si-kayon too niman ta nankekedsel kayo.”

Naysabi si ina nen Jesus tan sota ira a-aki to

⁴⁶ Nonta marama ja eman-a-sel si Jesus so nonta ira totoo, sota ineto tan sota ira a-aki to, dimaw ira di jet wára ira nodta bo-dayan, ja kowan sha ey mekitbal ira kono son si-kato.

⁴⁷ Isonga wáray sakey so nonta ira too ja engikowan son si-kato ey, “Wara si inam tan sota ira a-akim shi bo-dayan, ja piyan shen mekitbal kono son si-kam.”

⁴⁸ Nem si Jesus, kowan to so nonta too ja engikowan niyay ey, “Sipay ikarik ja inak, tan sipay ikarik ja a-akik?”

⁴⁹ Jet intoro nen Jesus sota too to, ja kowan to ey, “Sajay iray ikarik ja innak, tan ikarik ja a-akik.

⁵⁰ Tep say naka ikarin innak, tan a-akik, sota ira mandeka ni piyan nen Amak ja wáred dangit.”

13

In-arig nen Jesus sota kalasin bo-day ja nay-sepa-an ni botil

¹ Nontan met laeng nga akew, si Jesus, bimo-day nodtan na baley, jet dimaw nodta kilig ni baybay ja en mantosho.

² Eshakel ngo i toon imonod ja sha binongolan si Jesus, jet kasoreng si Jesus ma ey man-a-tan nodta bangka ja wára nodta shanom, jet timongaw nodtan. Sota ira too, wára iren esalpag nodta kilig ni shanom.

³ Eshakel i inkowan nen Jesus son si-kara, nem poro arig i inaspasing to.

Say sakey ya arig ga inkowan to son si-kara, sajay: “Waray too ja dimaw wa en nanbangkag shi oma.

⁴ Idi toka pan-iwáris sota botil, sota eshom, nayponta shi shalan, jet kinan ira ni titit.

⁵ Sota eshom ma botil nayponta ired kabato-an ja ma-ingpis i bo-day to, jet timemel la shagos, tep aliwén masshel i bo-day ja nayponta-an to.

⁶ Nem idi simekal i sekit, nakkit sota timemel la botil ta eg shimalem sota damot to.

⁷ Sota eshom ngon botil, nayponta ira shima similja ni sebit, jet idi bimengis iren showa, na-abak sota temel ni mola jet eg timoloy ya bima-deg.

⁸ Sota eshom ngon botil, nayponta shima mapteng nga bo-day. Jet sajay ira, wáray nandames ni sandasos, wáray nandames ni enem ma polo, tan wára pay i nandames ngo ni tedon polo.

⁹ Niman i wáray wáya jon mengitneng niyay ya naka pan-ikowan, isonga singpet jon itenengan.” Kowan nen Jesus.

¹⁰ Jet sota ira too met laeng nen Jesus, dimaw ira son si-kato et inbag-an sha, ja kowan sha ey, “Apay nga arig ga emin i moka pengitosho son si-kara?”

¹¹ Simongbat si Jesus ja kowan to son si-kara ey, “Si-kayo nin i naypalobos ja on-awat so ni maypangkep nonta pantoshayan nen Apo Shiyos, nem si-kara, enshi nin.

¹² Ta sota wáray amta to, si-kato pay i method-an, ingkatod eshakil i amta-an to. Nem sota enshiy am-amta to, angken sota ootik ja amta to, ma-kal son si-kato.

¹³ Isonga arig i naka pengitosho son si-kara, ta angken isi-ning sha, eg sha imatonan, tan angken itenengan sha, eg sha amtay olog to.

¹⁴ Si-karay kaytoshongan nonta padto nen Isaias nonta bayag da ja esel met laeng nen Apo Shiyos, ja kowan to ey, ‘Itenengan jo ali, nem eg jo ewatan! Tan asen jo ali nem eg jo idasin.

¹⁵ Ta say nemnem ira niyay ya too, timangken, nakol ni eg sha ewatan. Angken matesha, singa ekimit, nakol ni eg sha idasin. Jet eg ira ma ontorong son si-kak say pemapteng ko ira.’ Sajay i padto nen Isaias.

¹⁶ Nem si-kayo, pan-imdeng kayo, ta inewatan jo sota inon-an jo tan intenengan jo son si-kak.

¹⁷ Agpayso iya ikowan ko son si-kayo. Eshakel ira sota para padto tan sota eshom ma toon Apo Shiyos nonta bayag da, ja piyan shen on-an koma iyay ya inon-an jo niman na timpo, tan piyan shen itenengan koma iyay ya intenengan jo, nem eg sha sina-kop.

¹⁸ "Itnengi jo ngarod i olog niya arig may-pangkep nonta inkowan ko la ey en engiweshis ni botil shi oma.

¹⁹ No sota kompormin too ket itenengan to sota maypangkep ni pantoshayan nen Apo Shiyos, nem eg to ewatan, ondaw ali si Satanas et dingdingen to sotan na intenengan to la. Sotan i kay-eshigan nonta inkowan kon nayponta-an ni botil ja shalan.

²⁰⁻²¹ Sota nayponta-an ni botil la kabato-an, si-katoy kay-eshigan nonta toon engitneng ni esel nen Apo Shiyos ja emati ni sankatikan. No itenengan to, w'aren shagos i imdeng ton mengewat, nem eg may-a-det shi nemnem to. Isonga magenon ibi-jag to no onmotok ali sota digat to, ono okesen ni too maypangkep ni in-awat to so ni esel nen Apo Shiyos.

²² Sota nayponta-an ni botil ja simlja ni sebit, si-katoy kay-eshigan nonta toon engitneng ni esel nen Apo Shiyos met laeng, nem say toka nemnemnema, sota pesing ton manbiyag, tan sota ekanas sa biyag ni baknang. Jet anongosto ma ey medingding sota esel nen Apo Shiyos son si-kato, jet enshi may mapteng nga pantongpalan to.

²³ Sota nayponta-an ni botil ja mapteng nga bo-day, si-kato ngoy kay-eshigan nonta toon engitneng ni esel nen Apo Shiyos, ja imawat ni olog to. May-eshig ma ey sajay ira, waray dames sha: waray nandames ni eshakil, waray nandames ni kalaingan, tan waray nandames ni otik.”

In-arig nen Jesus sota edet ja naydaok shi pagey, tan wara pay i eshom ma arig ni pantoshayan nen Apo Shiyos

²⁴ Wara pay i sakey ya arig ja inkowan to son si-kara, ja kowan to ey, “Say kay-eshigan nonta pantoshayan nen Apo Shiyos, inges to iyay. Waray too ja en nanmola shi payew to, jet tima-nil la poron pagey i inmola to.

²⁵ Nem idi kalebi-an, nandibas ali sota makakontra son si-kato, jet en engilaok ni botil ni edet nodta nymolen pagey, asan kabetik.

²⁶ Idi kimabay sota pagey, jet bimosbos ma, wara gayam i apil la naydaok.

²⁷ Jet sota baga-en to, dimaw ira ja sha inkowan so nonta apo sha ey, ‘Apo, kowan ko nem poron pagey sota botil la inpaimolam shima payew mo. Apay nga idi bimosbos ira, waray edet gayam ma naydaok?’

²⁸ Kowan to son si-kara ey, ‘Sota makakontra son si-kak, si-katoy dimaga so nontan.’ Jet sota baga-en to, kowan sha so nonta apo sha ey, ‘Jet ngantoy kowan mo? Piyan mon mi demonen sota ira edet ja naydaok?’

29 Nem sota apo sha, kowan to ey, 'Enshi, bay-iyo, ta no demonen jo sotan na edet, mekige-bot da sota pagey.

30 Isonga bay-iyo nin ingkatod onsabi sota timpon pan-eni. Jet ikowan ko so nonta man-eni ey idasin sha nin sotan na edet ja bedbeshan shen para maypool. Nem sota pagey, sa-nopen sha et italo sha shima sarosal ko.' " Sajay i in-arig nen Jesus nonta pantoshayan nen Apo Shiyos.

31 Wara pay i sakey ya arig ja inkowan nen Jesus son si-kara ja kowan to ey, "Say pantoshayan nen Apo Shiyos, may-eshig nodta botil ni sakey ya kalasin mola ja ootilik.

32 Sajay ya botil, si-katoy ka-otikan na botil so ni emin na botil, nem no i-esek nonta too nodta gardin to, ey onba-deg, si-katoy kabalkan so ni emin na mola. Jet sota ira titit, mebedin na man-obong ira shima pangpanga to."

33 Wara pay i arig ja inkowan nen Jesus son si-kara ja kowan to ey, "Say pantoshayan nen Apo Shiyos, may-eshig pay nodta para debag ni tinapay ja inda ni bii, ja to indaok nodta eshakil la arina ingkatod inedinan ton emin."

34 Nontan na timpo, emin na inpantoro nen Jesus so nonta ira totoo, arig ni olay i inpangitoro to. Enshiy eshom ma inkowan to son si-kara, nem eg sajay.

35 Sajay i tongpal nonta inkowan nonta para padto nonta bayag da ey, "Say pengikowan ko so ni totoo, arig, jet ipa-amtak son si-kara sota sigod ja plano nen Apo Shiyos ja eg sha amta, ja plano to nonta eg pay laeng epalsowa iya dobong."

³⁶ Jet si Jesus, indekjas to ira sota totoo jet simekep nodta baley. Jet sota ira too nen Jesus, dimaw ira son si-kato jet kowan sha ey, “I-odog mo ga sota arig ja inkowan mo maypangkep nonta edet shi payew ja naydaok shi pagey.”

³⁷ Simongbat si Jesus ja kowan to ey, “Sajay i olog to: sota engimoda nonta tima-nil la botil ni pagey, sotan sota kowan sha ey Anak ni Too.

³⁸ Sota oma, si-katoy kay-eshigan niya dobong. Sota ira botil ni pagey, si-kara sota kay-eshigan ira nonta mayda-kam shi pantoshayan nen Apo Shiyos. Sota ira botil ni edet, si-kara sota kay-eshigan ira nonta toon wára son Satanas.

³⁹ Sota en engilaok nonta edet, si Satanas i kay-eshigan to. Sota pan-eni, say olog to, sota timpon pengigsheng nen Apo Shiyos no sipa shiya dobong i maysedakan. Sota ira man-eni, si-kara sota anghil nen Apo Shiyos.

⁴⁰ Sota edet, ma-olnong jet mepoolan. Sotan i kay-eshigan ni pesing nen Apo Shiyos no mengigsheng ey eg maysedakan sota nankeked-sel.

⁴¹ Si-kak sota inpadtora nonta bayag da ey Anak ni Too, jet ibetkag ko ali sota anghil ko jet si-karay mengkal ira nonta toon emengi-kan ni panbesolan ni kait sha, tan angken pay sota ira ngaaw i aramid sha, say eg ira mayda-kam nodta pantoshayan ko.

⁴² Jet say pesing ira nonta anghil, iteknal sha ira shima apoy ya empetang nga pasiya. Shiman, mannengnengis i totood man, tan panngedetngget shay sangi sha ni digat sha.

⁴³ Jet sotan alin timpo, sota ira too nen Apo

Shiyos, singa sekit iren menenili shima pantoshayan nen Apo Shiyos ja Amesha. Niman i wáray wáya jon mengitneng niyay ya naka pan-ikowan, isonga singpet jon itenengan.

⁴⁴ “Say pantoshayan nen Apo Shiyos, ebanol; isonga may-eshig ey singa sota pilak ja pino-jasan ni too shi payew. Say inpasing nonta too, tina-bokan to mowan et ebadeg i indeng to. To indako sota kokowa ton emin et tinongkal to sotan na payew, ta ebanol son si-kato sota simpol ton pilak nodtan.

⁴⁵ “Say kay-eshigan pay nonta pantoshayan nen Apo Shiyos, singa sota toon emanbiyaki ja say toka en-enapa, sota ebanol la bato ja kowan sha ey pirlas.

⁴⁶ Waray simpol ton sakey so nonta pirlas ja ebanol la pasiya. Jet say inpasing to, to indakon emin sota kokowa to et tinongkal to ma sotan na pirlas.

⁴⁷ “Say kay-eshigan pay nonta pantoshayan nen Apo Shiyos, singa sota inpasing ira nonta toon nannigay. Inteknal sha shima baybay sota embanaw wa balshew sha say mengna ira ni eshakel la nigay ya ekalkalasi.

⁴⁸ Jet idi enapno sotan na balshew sha, inkoyod ali nonta ira too shima naykilig. Pinispis sha sota mapteng, jet si-katoy in-iyen sha nodta ijanan. Nem sota ngaaw, in-ibong sha.

⁴⁹ Inges niyay i medeka no timpon pengigsheng ali nen Apo Shiyos no sipay maysedakan. Sota ira anghil, si-karay ondaw ali jet idasin sha sota ira toon ngaaw i aramid sha so nonta ira too nen Apo Shiyos.

⁵⁰ Sota ira toon ngaaw i aramid sha, iteknal sha ira shima apoy ya empetang nga pasiya. Shiman, mannengnengis i totood man, tan panngedetnget shay sangi sha ni digat sha.” Sajay iray arig ga inkowan nen Jesus.

⁵¹ Jet kowan ma nen Jesus son si-kara ey, “Jet inewatan jo ma i olog nonta arig ja inkowan ko la?”

Simongbat ira sota too to ey, “Owen.”

⁵² Jet kowan pay nen Jesus son si-kara ey, “No kasta, si-kayon maka-amta ni sigod ja bilin nen Apo Shiyos, no man-ashal kayo nonta maypangkep ni pantoshayan nen Apo Shiyos, komplito may amtayo. Jet may-eshig kayo so nonta toon waray baley to ja amta ton mengosal nonta kompormin shaan tan bado ja naytalo nodtan.”

Si Jesus, dinamsis ira nonta totoon kaidiyan to

⁵³ Jet si Jesus, idi naksheng nga inkowan to iyay ya arig, indekjas to sotan na dogad.

⁵⁴ Dimaw shima ili to, ja en nantoro shima sa-nopan ni si-karen Hodiyo. Jet sota ira too nodtan, ireka messhaaw nonta maypangkep ni toro to ja kowan sha ey, “Towa emoy inamta-an to so niman na daing to, tan towa emoy engal-an to niman na panakabalin ton milagro?”

⁵⁵ Sajay emo met sota anak nonta kalapintiro! Aliwa ayen si Maria i ineto? Amta tayo met sota ira a-aki to ja si Santiago, Jose, Simon, tan si Judas.

⁵⁶ Tan iyay pay ired jay sota bibiin a-aki to. Towa ngatay inashalan to so niman na amta to?”

⁵⁷ Jet sotan iren kaidiyan to, dinamsis sha si Jesus.

Nem si-kato, say kowan to son si-kara, “Emin ira sota toon inbetkag ali nen Apo Shiyos, mebedin na mayshedjaw shi emin na ili. Nem shi mismon ili to bengat i eg to kayshedjawan, tan angken pay sota mismon pamilja to, eg sha ishayaw.”

⁵⁸ Jet si Jesus, aliwén eshakil i dingka tod man ja milagro, ta eg ira memati son si-kato.

14

Sota maypangkep ni inkatey nen Juan ja para bonjag

¹ Nontan na timpo, si Ari Hirodis ja engitoshay ni Galilia, shinemag to sota maypangkep ni dingdingka nen Jesus.

² Jet kowan to so nonta baga-en to ey, “Sajay ya shinemag kon milagron toka dagdag-a, sigosho si-kato si Juan da ja para bonjag. Nanbiyag emo shi patey, isonga waray panakabalin ton mandeka ni milagro.”

³⁻⁴ Sajay i kowan nen Hirodis ta si-katoy inpabono so nen Juan. Inpa-shel to nontan et inpaibalod to ta inkowan nen Juan so nen Hirodis ey, “Parit shi bilin nen Apo Shiyos i pengesawam so nen Hirodiyas ja asewa nen Felipe ja agim!” Isonga inpa-shel nen Hirodis si Juan ta pipiyan tos Hirodiyas.

⁵ Nontan ma, si Hirodis, piyan ton pebono si Juan, nem entakot so nonta ira totoo, ta si Juan,

kaibilang ira nonta totoo ey para padto nen Apo Shiyos.

⁶ Nem idi nonta birthday nen Hirodis, eshakil i bisita to ja inewis to, jet nontan, sota anak nen Hirodiyas ja marikit, nansada shi sango-an shen emin et si Hirodis, eman-imdeng nontan na dingka nonta marikit.

⁷ Isonga inkari to ey no ngantoy kekshawen nontan na marikit ja anak nen Hirodiyas, i-akan to.

⁸ Jet sotan na anak nen Hirodiyas, to inbaga so nen ineto no ngantoy kekshawen to so nen Hirodis. Jet inkowan nen ineto ey sota toktok nen Juan ja para bonjag i kekshawen to. Isonga kowan nonta marikit ey, "I-ekan mo ali son si-kak sota toktok nen Juan ja para bonjag et ipingkan mo di shi embanaw wa pingkan."

⁹ Jet sota ari, naydaw-an nonta inkowan to so nonta kari to so nonta marikit. Nem mesepol la tongpalen to ta nankari ja intenengan ira nonta bisita to. Isonga si Hirodis, inkowan to ey metongpal ja may-ekan sota toktok nen Juan so nonta marikit.

¹⁰ Jet nontan ma, engibetkag si Hirodis ni en mengokdo so nen Juan ja wared badoran,

¹¹ jet sota toktok nen Juan, inpingkan sha et in-akan sha so nonta biin anak nen Hirodiyas et to ngo in-akan so nen ineto.

¹² Sota ngo ira too nen Juan, sha inday bakdang to jet sha inbeka. Jet dimaw ira so nen Jesus ja sha inkowan sotan na epasemak.

Pinekan nen Jesus sota dimen dibon motoo ja imonod son si-kato

¹³ Idi naksheng ja insodsod sha son Jesus iyay, en nandogan shi bangka et indekjas to sotan na dogad. Dimaw ma shima naydesin na dogad ja enshiy totoo. Nem idi inamta-an ira nonta toon wared ka-ili-ili sota dinawan to, nan-akad ira ngo ja imonod son si-kato.

¹⁴ Idi ondisaag si Jesus nodta bangka, inon-an to ira sota eshakil la toon nay-aspol et nayse-mekan na pasiya son si-kara. Isonga sota ira emanpansekit son si-kara, inpamapteng to ira.

¹⁵ Nonta enaswil malay akew, sota ira too nen Jesus, dimaw ira di son si-kato jet kowan sha ey, "Apo, arawi met iyay ya dogad shi kabalebaley, isonga pansisi-jan mo ira jay ya totoo say ira di koma mengenap ni tongkalen shen kenen sha shima kad-an ni totoo. Edabi met mala."

¹⁶ Nem si Jesus, kowan to son si-kara ey, "Angken eg ira ondaw. I-akniyo et ira ni kenen sha."

¹⁷ Nem kowan ira nonta too to ey, "Dimen boknol la tinapay met bengat iya wara, tan showen piskaw."

¹⁸ Si Jesus kowan to son si-kara ey, "Alejo did jay."

¹⁹ Jet nontan, inkowan to so nonta ira totoo ey ontongaw ira, tep mapteng i edet nodtan. Inda to sota tinapay tan sota showen piskaw, intangkak tod naykayang jet nan-iyaman son Apo Shiyos. Idi naksheng nga nan-iyaman, shinowashowa to asan toka i-kan so nodta too to, ja si-karay mengiweshis so nonta ira eshakil la totoo.

²⁰ Sota ira totoo, engan ira et napsel iren emin. Idi naksheng ira, inolnong ira nonta too nen

Jesus sota ebay-an ja eg kinan ira nonta totoo jet say na-olnong, sampolo tan showen basket, ja nankepno.

²¹ Jet say kabebilang ira nonta totoo ja engan, ondaw wa dimen dibo, powira ira sota bibii tan a-anak, ja eg naybilang.

Nan-akad si Jesus nodta tapew ni shanom

²² Idi naksheng iyay, inkowan to so nonta ira too to ey, “Pandogan kayod ma bangka et angken mepangdo kayon ondaw shima shemang ni baybay. Jet si-kak, pansisi-jan ko nin ira ja eshakil la totoo.”

²³ Jet idi naksheng nga inpansisi-jan to sota totoo ja kowan to ey angken on-akad ira, timiyed ngo shima shontog ni abos to say en manshewat so nen Apo Shiyos. Jet edabi-an nodtan ja a-abos to.

²⁴ Nem sota bangka ja nandoganan ira nonta too to, imarawi ma nodta kilig ni baybay. Jet nontan ma, makedsang i shadoyon ni shanom ta emansheshagem ja nay-aspol pay son si-kara.

²⁵ Jet idi daem, dimaw alis Jesus son si-kara ja nan-akad shima tapew ni shanom.

²⁶ Nem sota ira too to, inon-an sha ali ja eman-ekad shima tapew ni shanom, jet ireka mankel-ew wa pasiya ja kowan sha ey banig i inon-an sha. Jet kimeljaw ira ni takot sha.

²⁷ Nem si Jesus, imesel la shagos son si-kara ja kowan to ey, “Pesed! Karekayo ontakot, tep si-kak iyay!”

²⁸ Jet si Pedro, simongbat ja kowan to ey, “No agpayson si-kam, ipedobos mon ondawak da son si-kam!”

²⁹ Simongbat si Jesus ja kowan to ey, “Siya, kala.”

Jet si Pedro, jimapas nodta bangka, jet nan-akad nodta tapew ni shanom ja kowan to ey to sebi-en si Jesus.

³⁰ Nem idi dekna-en nen Pedro ey makedsang i shagem, timakot jet istay ya emanka-neng. Kimeljaw ja kowan to ey, “Apo atngimak!”

³¹ Shinewat shagos nen Jesus, ja kowan to ey, “Ootik eshan i pamatim. Apay nga wara eshan i showashowam?”

³² Jet idi nandogan iren showa nodta bangka, simalsheng ma sota shagem.

³³ Jet nontan, sota ira too to nodta bangka, nantalimokod ira ja nanshayaw son si-kato, jet kowan sha son si-kato ey, “Agpayson si-kam sota Anak nen Apo Shiyos!”

Inpamapteng nen Jesus sota emanpansekit shi Ginisarit

³⁴ Jet nontan, intoloy shen bimaliw et simabi ira nodta nayshemang nga dogad ja kowan sha ey Ginisarit.

³⁵ Jet idi inimatonan ira nonta totoo nodtan ey si Jesus, inshamag sha nodtan na dogad ja nay-esop, jet emin ira sota emansekit, indaw sha ali son si-kato.

³⁶ Jet sota ira totoo, kinshew sha son si-kato ey no mebedin, angken sota kajaran bengat ni baro to i pishaten sha say onmapteng ira. Jet emin sota ira emirat ni baro to, mimapteng ira.

15

Inkowan nen Jesus i ngaaw wa aramid ira nonta Parisiyo tan mamaistoro ni dinteg

¹ Sota ira Parisiyo tan sota mamaistoro ni dinteg ni Hodiyo ja edapod Jerusalem, dimaw ira so nen Jesus jet kowan sha ey,

² “Apay nga sama ira toom ket eg sha onoren sota sigod ja ogadi nonta bayag da? No mengan ira ket eg ira nin manbodo.”

³ Si Jesus, sinongbatan to ira ja kowan to ey, “Si-kayo, eg jo onoren sota bilin nen Apo Shiyos. Say joka et ngo mowan nemnemnema, sota ogadiyo.

⁴ Kaspangarigan say sakey ya bilin nen Apo Shiyos ja joka ibiyang, sota kowan to ey, ‘Shayaw mo si amam tan si inam’, tan sota kowan to pay ey, ‘Sota toon ngaaw i toka ikowan so nen ameto, ono si ineto, kenshat ta mebono.’

⁵ Nem si-kayo, say joka itoro, kowan jo ey angken ibiyang ni too si ameto ono ineto, basta ikowan nonta too so nodta maka-anak son si-kato ey, ‘Sota istay i-akan ko son si-kayo ja panbiyag jo koma, indasin kon maytodong shi Timplo.’

⁶ Isonga sajay ya joka pengonod ni ogadiyon joka itoro, inpaskit jo nodta koston bilin nen Apo Shiyos, ja singa enshiy silbi to.

⁷ Sesi-kayo ngon toon kowan to ey wára son Apo Shiyos ni emin na poso to nem waray pangkep jon ngaaw! Agpayso ey si-kayo sota kaytoshongan nonta padto nen Isaias nonta

bayag da ja esel nen Apo Shiyos met laeng, ja kowan to ey,

⁸ ‘Sajay iren too, shi bongot bengat i engintegan ni shaka panshedjaw son si-kak, nem shi nemnem sha, arawí son si-kak.

⁹ Enshiy silbi ni shaka panshedjaw son si-kak, tep say shaka itodtoro ni olay, sota edapo met laeng shi nemnem ni si-karen too, asan sha mango ikowan ey bilin kono nen Apo Shiyos.’ ”

¹⁰ Jet si Jesus, tina-wál to ira sota totoo jey ondaw ira di son si-kato jet kowan to son si-kara ey, “Itnengi jo iyay ya ikowan ko son si-kayo jet awatiyo.

¹¹ Kowan ira nonta Parisiyo ey basol kono no eg kito manbodo asan mangan ja si-katoy ondogit so ni nemnem. Nem aliwén sota ikem-ot jod bongot ja tetdenen jo i ondogit son si-kayo, no diket sota kaonbo-day ali shi bongot ja mandepod nemnem jo, si-katoy kaondogit son si-kayo.”

¹² Idi naksheng ja inkowan nen Jesus iyay, sota ira too to, dimaw ira di son si-kato jet kowan sha ey, “Amtam? Idi intenengan ira nonta Parisiyo sota inkowan mo, ngaaw i nemnem sha son si-kam.”

¹³ Jet si Jesus simongbat ni arig ja kowan to ey, “Emin na too, may-eshig ey singa mola jet sota aliwén mola nen Apo Shiyos, a-kalen to met laeng.

¹⁴ Isonga baybay-iyo ira ma Parisiyo; olay tos Apo Shiyos son si-kara. Si-kara sota may-eshig ey ekorab ja emengiredan ni kait ton ekorab. No kowan nonta sakey ya ekorab ey to ibalnay sota kait ton ekorab, ma-kas iren showa shi pel-og.”

¹⁵ Jet nontan met laeng, si Pedro kowan to son nen Jesus ey, “Ilewag mo ga i olog nita arig son si-kami.”

¹⁶ Jet si Jesus simongbat ja kowan to ey, “Apay angken si-kayo, eg kayo pay laeng maka-aw-awat?”

¹⁷ Apay eg jo amta ey sota maykem-ot shi bongot ket say dawán to, shi ekes, jet onbo-day met laeng? Eg to dokiten i nemnem.

¹⁸ Nem sota onbo-day ali shi bongot ja esel, si-katoy mandepo shi nemnem. Jet sotan na wáred nemnem, si-katoy ondogit so ni too.

¹⁹ Ta say kedepo-i ni ngaaw wa pangkep ni too, shi nemnem to. Isonga wáray ememono, wáray ememii tan emekileki, wáray emengibot, wáray emengi-owap, tan wáray emenomang ni kait ton too.

²⁰ Sajay iray kaondogit so ni too. Kowan ni Parisiyo ey sota mengan ja eg nin manbodo, sotan i ondogit so ni too ja panbesolan to. Nem enshi kari.”

Sota kaba-deg ni pamati nonta sakey ya biin aliwén Hodiyos

²¹ Nontan ma si Jesus indekjas to sotan na dogad jet dimaw shi nankinaw-an ni Tira tan Sidon.

²² Jet idi nonta wáres Jesus shiman, wáray biin dimaw ali son si-kato ja too nodtan na dogad. Aliwén Hodiyos tep poli nonta sigod ja too nodtan, nem kimeljaw ja kowan to ey, “Apo, naka memati ey si-kam aliy mengibengon son Ari David nonta bayag da! Kaasimak, ta wáray anak kon bii nem angsan i kepesing nonta

dimonyo ja pimeket son si-kato, toka pedigaten pasiya!”

²³ Nem si Jesus, eg to sinongsongbatan. Anongosto ma ey kowan nonta too nen Jesus son si-kato ey, “Pagi-nan mo ga et ita bii; aliwén en ontentened ali ja onkelkeljaw.”

²⁴ Si Jesus simongbat ja kowan to ey, “Say inbetkagan towak so bengat nen Apo Shiyos, sota ira Hodiyos ja may-eshig ey kalniron imarawi, jet enshiy biyang ko shiya tood jay ya aliwén Hodiyos.”

²⁵ Nem sota bii dimaw et ali ja en nantalimokod shi sango-an nen Jesus ja kowan to ey, “Apo, kaasi-imak.”

²⁶ Jet si Jesus simongbat ja kowan to ey, “Aliwén nebeng ja nak pekewas sota istay para a-anak ja i-akan ko so ni aso.”

²⁷ Nem sota bii simongbat ja kowan to ey, “Owen apo, amtak ita kowan mo, nem angken sota ira aso, mebedin met ja manbiyag ira nonta ema-kas shi damisaan nonta apo sha.”

²⁸ Simongbat si Jesus so nonta bii ja kowan to ey, “Agpayson ebadeg i pamatim! Isonga sota shawat mo, medeka.” Jet nontan met laeng, sota anak nontan na bii, mimapteng nga shagos, ja bimetik sota dimonyo son si-kato.

Inpamapteng nen Jesus sota eshaket la totoo

²⁹ Si Jesus, indekjas to mowan sotan na dogad, jet nanshalan shima kilig ni baybay shi Galilia, asan tomiyed shima shontog. Timongaw shiman ja mantosho,

³⁰ Jet eshakil la pasiyay totoon dimaw ali son si-kato. Jet sota ira epilay, ekorab, omel, tan sota ira eshom pay ya wáray sakit to, indaw sha son si-kato shima shontog a kawad-an to, jet inparokol sha shi kad-an ni sedi to. Jet si Jesus, inpamapteng to ira.

³¹ Jet sota ira eshakil la totoo, nasshaaw ira nonta in-asas sha so ey nan-esel ira sota istay eg maka-esel, nan-akad ira sota istay epilay, tan angken sota ira ekorab, nan-asas ira. Jet kowan sha ey, “Agpayso gayam noman na manakabalin i Shiyos ni Hodiyo!”

Sota maykepinshowen inparakel nen Jesus i ootik ka mekan

³² Si Jesus, tina-wál to ira sota too to jet kowan to son si-kara ey, “Naka kaasi-i ira ja totoo, ta tedon akew sha niman ja wáred jay son si-kak jet enshi may kenen sha. Ekak koston pa-ekad ira ja eg nin engan, say eg ira onkapoy shi shalan.”

³³ Jet sota ira too nen Jesus, kowan sha ey, “Toway pengal-an tayod jay ni kenen sha ey enshiy baley shiyay? Eshakil met iren pasiya.”

³⁴ Jet si Jesus, kowan to son si-kara ey, “Pigen boknol la tinapay sota wára son si-kayo?”

Simongbat ira ja kowan sha ey, “Piton boknol la tinapay, tan wára pay i piskaw, nem aliwén eshakil.”

³⁵ Jet si Jesus, inkowan to so nonta ira totoo ey ontongaw ira nodta bo-day.

³⁶ Inda nen Jesus sota piton boknol la tinapay tan sota piskaw jet nan-iyaman so nen Apo Shiyos asan toka showashowa-a. In-akan to so

nonta ira too to ja si-karay mengiweshis so nonta ira totoo, jet tinongpal sha.

³⁷ Jet emin ira sota eshakel la totoo, engan ira jet napsel iren emin. Idi naksheng ira, sina-nop sha sota ebay-an ja eg sha kinan et ondaw wa piton basket.

³⁸ Sota engan niyay ya tinapay, epat ta dibo ja daleki, powisha sota bibii tan a-anak, ja eg ekibidang.

³⁹ Jet nontan ma, inpa-ekad to ira sota totoo jet en nandogan nodta bangka jet dimaw shima dogad ja kowan sha ey Magadan.

16

Piyan nen Jesus ey eg onoran nonta ira too to sota Parisiyo tan Sadosiyo

¹ Sota ira Parisiyo tan sota Sadosiyo, dimaw ira so nen Jesus ja sha peshasen ni dedamsis sha. Isonga kowan sha son si-kato ey mandeka ni milagro ja kowan sha ey asanan sha so no podnon inbetkag ali nen Apo Shiyos.

² Nem si Jesus, sinongbatan to ira ni arig, ja kowan to ey, "No mama-shem mala, ey asen jon nandangidang, kowan jo ey, 'Siya, mapteng aliy timpo nem kabasan.'

³ Jet no agsapa ey asen jon engolpot shi naykayang, kowan jo ey, 'Ngaaw aliy timpo niman, on-oran.' Joka ewati met shi naykayang no on-oran ono enshi, nem apay nga eg jo ewatan ey emin sota emepespesamak niman na timpon kawashak son si-kayo ket asdeg to met i kay-odogan to!

⁴ Ngaaw iray aramid ni too ma niman, eg sha nemnemen si Apo Shiyos! Say shaka pan-ibaga et ngo mowan, sota kowan sha ey asanan sha so no si Apo Shiyos i podnon engibetkag son si-kak ali. Nem enshiy milagro ja en maypa-sas son si-kara niman. Say pengamta-an jo ey inbetkag towak ali nen Apo Shiyos, no onsabi son si-kak sota inges toy epasemak so nen Jonas, ja para padto nonta bayag da.” Sajay i kowan nen Jesus asan toka ira ilekjas.

⁵ Idi mimotok shi ira Jesus nodta piig ni baybay, dinibkan sha gayam ja engita-jon ni balon sha.

⁶ Jet si Jesus, kowan to son si-kara ey, “Tan-shaaniyo sota singa para debag ni tinapay ja wara so nonta Parisiyo tan Sadosiyo ta baka ma-edinan kayo.”

⁷ Nem sota ira too nen Jesus, ireka mansosongbat ni abos ja kowan sha ey, “Dinibkan tayo eshan ja engita-jon ni balon tayon tinapay.”

⁸ Si Jesus, indasin to ey sotan i shaka pansosongbati et kowan to son si-kara ey, “Apay nga kayoka mansosongbat ni ka-enshi ni balon jo? Ootik eshan i pamatiyo.

⁹ Apay eg jo aya ewatan? Dinibkan jo aya ey sota dimen boknol la tinapay i edapo-an nonta kinan ni toon dimen dibo? Istay nemnemen jo koma ey eshakil la baskit i sina-nop jon eg kinan ira nonta totoo.

¹⁰ Tan say sakey pay, sota piton boknol la tinapay, si-katoy edapo-an nonta kinan ira nonta epat ta dibon too. Jet eshakil mowan na baskit i inolnong jon eg sha kinan.

¹¹ Isonga ewatan jo koma ey aliwen sota maypangkep ni tinapay i naka pan-ikowan nonta inkowan ko so ey mantanshaan kayo nonta singa para debag ni tinapay ja wara so nonta ira Parisiyo tan Sadosiyo.”

¹² Jet nontan ma, sota ira too nen Jesus, inewatan sha ey aliwen to-to-wen para debag ni tinapay i toka pan-ikowan. No diket toka pan-ibanshaan sota maypangkep ni o-owap pa toro ira nonta Parisiyo, tan sota toro ni Sadosiyo ta maganon man-a-elbat ja inges toy para debag ni tinapay.

Inbolikas nen Pedro ey si Jesus i Anak nen Apo Shiyos

¹³ Idi simabi si Jesus nodta sakop ni Sisaria Pilipos, inbag-an to ira sota too to ja kowan to ey, “Ngarantoy kaikokowan ira ni totoo ni maypangkep so nonta naypadton Anak ni Too? Eg sha aya tabtabalen nem sipa-ak?”

¹⁴ Jet sota ira too to, simongbat ira ja kowan sha ey, “Eg met nan-i-inges i shaka ikowan. Say kowan ni eshom, si-kam kono si Juan ja para bonjag ja etey da, nem sota ira eshom, kowan sha ey si-kam si Elias ono si Jirimias, ono sakey so nonta ira eshom ma para padto nen Apo Shiyos nonta bayag da ja nan-ongal mowan ali.”

¹⁵ Jet si Jesus, inbag-an to mowan ira ja kowan to ey, “Jet si-kayo ngay? Ngaranto ngoy kowan jo ni maypangkep son si-kak?”

¹⁶ Si Simon Pedro, simongbat ja kowan to ey, “Si-kam sota inpadtora nonta bayag da ey ibetkag ali nen Apo Shiyos ja mengisedakan. Si

Apo Shiyos, wáray biyag to ingkatod ingka jet si-kam i Anak to.”

¹⁷ Jet si Jesus, kowan to so nen Pedro ey, “Si-kam Simon ja anak nen Jonas, si Apo Shiyos i onbindisiyon son si-kam tep si-kato, ja Amak shi dangit, si-kato i engipa-amta niyay son si-kam ja inkowan mo, aliwén kait mon too i engikowan.

¹⁸ Jet niman, iyay i ikowan ko son si-kam Pedro. Say olog ni ngaran mo, bato, jet sotan na bato, si-katoy na-det ja kaypirmi-an ira nonta eshakil la totoon memati son si-kak met laeng. Isonga angken ngantoy katekal ni patey, eg mebedin na ipeked to ni olay sota memati son si-kak.

¹⁹ Jet si-kam i ipiyalan ko so nonta may-eshig ey tolbec ni pantoshayan nen Apo Shiyos. No ngantoy iparit mo shiya dobong, ono ipalobos mo, itolok nen Apo Shiyos ja wáred dangit ja si-katoy medeka.” Kowan nen Jesus.

²⁰ Jet binidin to ira sota too to ey angken sipa, eg sha ikokowan ey si-kato sota naypadto nonta bayag da ey ibetkag ali nen Apo Shiyos ja mengisedakan.

Pan-idawag nen Jesus sota pandikat to ali

²¹ Jet manshoki ma nontan, kaipinpinshowa nen Jesus so nonta ira too to ey mesepol la ondaw shi Jerusalem, jet kowan to ey manda-kam shiman ni eshakil la digat, ta sota ira pangolo ni Hodiyos, tan sota ira apo ni papashi, tan mamaistoro ni dinteg, bedawen sha kono, et anongosto ma ey bono-en sha. Nem kowan to ey no maykatdon akew, manbiyag mowan.

²² Jet nontan ma, si Pedro, to indasin si Jesus et sinelkag to ja kowan to ey, “Enshi! Eg medeka itan son si-kam Apo! Eg itolok nen Apo Shiyos!”

²³ Nem si Jesus wíningi to si Pedro jet kowan to ey, “Betawimak si-kam ma Satanas! Karam tipeshen i mesepol la dag-en ko. Say nemnem mo, aliwén sota plano ja nemnem nen Apo Shiyos, no diket sota etoo-an na nemnem.”

Edigat met laeng i pengonod son si-kato, nem epateg i mekon-od ali shi ka-onoran

²⁴ Inkowan pay nen Jesus so nonta too to ey, “No sipay makapiyan ja on-onod son si-kak ja took ni olay, mesepol la si-kak bengat i nemnem-nemen to ja ibiyang ton emin i kompormi. Tan mesepol la enosan to pay ya angken maybebaing ono mebono ja inges to sota toon emasan ni koros ja kaydansa-an to.

²⁵ Sota toon entapi toy biyag to ja kowan to ey ensikshal la metey maypangkep son si-kak, si-kato et ngo mowan i mepokaw i biyag to. Nem sota toon eg to kawanan i bakdang to maypangkep son si-kak ja angken metey ni toka pansilbi, si-kato et ngo mowan i i-aknan nen Apo Shiyos ni biyag ja enshiy to engintegan.

²⁶ No kaspangarigan ey kinokowa ni sakey ya too i emin na wáred ja dobong, enshiy silbi nontan na kinokowa to, no eg to kon-oren sota biyag ja enshiy to engitegan. Enshiy silbi nontan na inpasing to, ta sotan na biyag i epateg ga pasiya, ja enshiy to kaysa-datan na angken nganto.

²⁷ Epateg, ta no sakey alin timpo, emin sota aramid ni too, si-kak met laeng i onsobadit son si-kara. Agpayson si-kak sota kowan nonta para padto nonta bayag da ey Anak ni Too, jet sota idaw ko ali mowan, say kasesaad ko, inges ko met laeng i kasesaad nen Apo Shiyos. Jet may-odop ali sota anghil ko son si-kak.

²⁸ “Agpayson waray eshom son si-kayod jay ja eg metey ingkatod asen sha sota kowan sha ey Anak ni Too ja isaad to sota pantoshayan to met laeng.” Kowan nen Jesus.

17

Nanbalin ni emenenili i bakdang nen Jesus nodta shontog

¹ Idi waray enem ma akew ja edabas da ni engikowanan nen Jesus niyay, inodop to si Pedro, tan si Santiago nen Juan ja san-agi, jet timiyed ira ni a-abos sha shima shontog ga ekayang.

² Jet idi mimotok ira nodtan, inon-an shen nanbaliw i itsora nen Jesus ja emenenili. Singa sekit i itsora ni dopa to jet sota baro to, empotin pasiya.

³ Jet nontan met laeng, inon-an sha si Moises nen Elias ja emekitbal so nen Jesus.

⁴ Jet si Pedro, kowan to so nen Jesus ey, “Apo, mapteng i kawasha tayod jay. No piyan mo, mengemagak ni tedon kampod jay: sota sakey para son si-kam, sota sakey para son Moises, tan sota sakey para so nen Elias.”

⁵ Jet nonta marama pay laeng ja eman-a-sel si Pedro, ebiglen waray kolpot ta emenenili ja

dimespag ali son si-kara ja dinikopan to ira. Jet wáray esel ja edapo nodtan ja intenengan sha ja kowan to ey, “Sajay i Anak ko jet ensemek ko. Si-katoy naka kosto-i, isonga patiyon emin i ikowan to.” Kowan nonta esel alid kolpot.

⁶ Jet idi intenengan ira nonta too nen Jesus iyay, nanshomog ira ja epaladoy takot sha.

⁷ Nem si Jesus, dimaw ali son si-kara jet to ira pinishat ja kowan to ey, “Ekwás kayo, karekayo ontakot.”

⁸ Jet idi onshemang ma ira, enshi met i eshom ma wára nodtan, no diket si Jesus bengat.

⁹ Jet idi ireka manshedong ja edapo nodta shontog, si Jesus binidin to ira sotan na too to ey eg sha ikokowan so ni eshom, ja angken sipa, sota inon-an sha nonta wára ired ma shontog. Jet inkowan to ey asan shaka ikowan iyay nem man-ongal ma ali sota kowan sha ey Anak ni Too.

¹⁰ Jet sota ira too to, inbag-an sha si Jesus ja kowan sha ey, “Jet ngantoy kabol la kaikowani so ni mamaistoro ni dinteg ey mesepol la mepangdo alis Elias asan sota naypadto nonta bayag da ey ibetkag ali nen Apo Shiyos ja mengisedakan?”

¹¹ Simongbat si Jesus ja kowan to ey, “Owen, agpayso ja si Elias nin aliy mepangdo jet si-katoy mengi-odi nonta kimapoy ya pamati ni totoo say onkedsang ma.

¹² Nem iyay i kowan ko son si-kayo. Si Elias, naksheng alin dimaw, nem eg indasin ni too ey si-kato. Jet dingkara son si-kato i kompormin kedsel la ninemnem sha. Jet iso met laeng nga sotan i dag-en sha so nonta kowan ni para padto ey Anak ni Too.” Kowan nen Jesus.

13 Jet sota ira too to, inewatan sha ey say toka pan-i-arig ja kowan to ey si Elias, si-kato sota si Juan ja para bonjag.

Inpamapteng nen Jesus sota nga-ngen mankelshas ja waray dimonyon pimeket son si-kato

14 Idi simabi ira nodta kad-an ni eshakil la totoo, waray toon en nantalimokod shi sango-an nen Jesus ja kowan to ey,

15 “Apo, kaasi-im sota anak ko, ta say sakit to, emankelshas. Kakaasin pasiya, ta kanayon na kaonkaro, nakol ni emetowang ni olay shi apoy, tan kanayon na emay-a-neng shi shanom.

16 Indaw ko so nonta ira toom nem eg sha met kabaalan.”

17 Jet si Jesus, kowan to ey, “Enshiy pamatiyo eshan, ap-apil kayon too! Ebayagak met shiyay ja eman-enos son si-kayo, nem eg jo pay laeng pati-en i panakabalin nen Apo Shiyos! Ilaw mo did jay son si-kak sota nga-nga.”

18 Indaw sha ali nontan met laeng jet si Jesus, inkowan to so nonta dimonyon pimeket so nonta nga-nga ey, “Betik ked ta nga-nga!” Jet bimetik nga agpayso sota dimonyo. Jet mimapteng nontan met laeng nga shagos sota nga-nga.

19 Idi abos sha, sota ira too nen Jesus, kowan sha ey, “Apay nga eg mi binaalan na inpabtik nontan sota dimonyo so nontan na nga-nga?”

20 Simongbat si Jesus ja kowan to son si-kara ey, “Ekolang eshan i pamatiyo. Agpayso iya ikowan ko son si-kayo. No wara koma i pamatiyo ja angken ootilik, ja inges toy kaba-deg nonta

botil nonta mola ja kowan sha ey mostasa, mebedin na ikowan jo so nima shontog ey on-etan shi apil la dogad jet ma-tan nga agpayso. Jet no inges nontan i pamatiyo, enshiy jo ikowan ey edigat son si-kayo.

²¹ Nem sajay ya kalasin dimonyo, eg mebedin na pebtik bengat nem eg kita nin mengshaw ni tolong son Apo Shiyos tan mengibiyang ni pangan tayo.”

Inpa-amta to mowan sota ketey to di

²² Idi sakey ya akew, nan-o-odop ira shi Galilia, jet si Jesus kowan to so nonta ira too to ey, “Si-kak sota kowan ni para padto nonta bayag da ey Anak ni Too, nem may-ewatak so nonta ira toon makakontra son si-kak,

²³ jet si-karay memono son si-kak. Nem no maykatdon akew, manbiyagak met laeng.”

Sajay ya inkowan nen Jesus son si-kara, ireka mandeshingit ta pasiya.

Nanbayad met laeng si Jesus ni alos ni Timplo

²⁴ Idi dimaw ired Kafirnaom, sota para singil ni alos ni Timplo shi Jerusalem, dimaw ira so nen Pedro jet kowan sha ey, “Sigosho sota apom, eg man-edos emo ni para so nonta Timplo shi Jerusalem?”

²⁵ Simongbat si Pedro ja kowan to ey, “Emengi-kan ngo ni alos to.”

Jet idi mimotok si Pedro nodta baley, si Jesus i epangdon imesel ja kowan to ey, “Simon, piyan kon amta-an i moka pannemnem niya ikowan ko son si-kam. Sipa iray kepansingili ira nonta

a-ashi? Sota ira annak sha, ono sota ira eshom ma totoo?"

²⁶ Simongbat si Pedro ja kowan to ey, "Sota ira eshom."

Jet si Jesus, kowan to ey, "No kasta, sota ira annak ni ari, dibshi mango ira.

²⁷ Isonga si-kak, mebedin na dibshi-ak ni alos ni Timplo nen Apo Shiyos ja Amak. Nem say kowan ko, say eg mesekitan i nemnem ira nonta totoo, daw ka shima baybay et mo ipekat sota bengwít mo. Jet sota pilmiron nigay ya mekna, si-katoy al-en mo. Panga-wab mo et waray on-an mon pilak nodta bongot to. Si-katoy al-en mo ja mo i-akan ja alos ten showa."

18

Sota mengibeba ni bakdang to, si-katoy engato ali shi pantoshayan Apo Shiyos

¹ Idi nontan met laeng, sota ira too nen Jesus, dimaw ira son si-kato jet sha inbag-an ja kowan sha son si-kato ey, "Sipa emoy engato ali i saad to shi pantoshayan nen Apo Shiyos?"

² Jet si Jesus, ena-wal ni nga-nga jet inpaledjat to nodta nankinaw-an ira nonta too to,

³ jet kowan to son si-kara ey, "Podno iya ikowan ko son si-kayo. No eg jo i-onod ja ingesen iya nga-nga, eg kayo mayda-kam shi pantoshayan nen Apo Shiyos.

⁴ Sota mengibeba ni bakdang to shorog ja inges toy kepesing niya nga-nga, si-katoy engato et ngo mowan i saad to shi pantoshayan nen Apo Shiyos.

⁵ “No sipa ken too ja mapteng i pesing mo so ni inges niyay ya nga-nga maypangkep ni semek mo son si-kak, si-kak met laeng i tinoshong nonta inpasing mo.

⁶ Nem sota istay mengi-kan ni panbesolan ira niya nankebaben emati son si-kak, say panmaptengan nontan na too ket ma-ono-an koma ni ebadeg ga bato jet en mayteb-ok shima debeng nga baybay. Sotan i panmaptengan to ta engka-jas sotan na keshosa to nem say sota penosa nen Apo Shiyos son si-kato ja pengikesho to no istay itoloy ton panbesol sota kait to.

⁷ Ara, ngaaw i itsora ni tood ja dobong ja emengi-kan ni panbesolan ni kait sha! Waren kenshat i onsabin panbesolan ni too, nem kakaasi sota toon mengi-kan ni panbesolan ni kait to.

⁸ “Isonga no bilang ey sota sakey ya takday mo, ono sota sakey ya sedim i mengi-kan ni panbesolan mo, potol mo et ibong mo. Ta no pa-onong mo, si-katoy kayteknalan mo shima apoy ya shosa-an ingkatod ingka. Mapmapteng sota ka-enshi ni sakey ya takday mo ono sakey ya sedim, no sotan i kesalbaran mo.

⁹ Kasta met sota sakey ya matam: no si-katoy mengi-kan ni panbesolan mo, okit mo jet ibong mo. Ta no pa-onong mo, si-katoy kayteknalan mod impiyarno ja kad-an ni apoy. Mapmapteng sota ka-enshi ni sakey ya matam, no si-katoy kesalbaran mo.

¹⁰ “Karejo damsisen ira ja toon nankebaba, ta si Apo Shiyos, eg to ira damsisen. Waray anghil

iren jay ya nankebaba jet kepatki ira nen Amak shi dangit.

¹¹ Ta si-kak ja naypadton Anak ni Too, say kabol la dinaŵan ko alid ja dobong ket nak ira isalakan sota imaraŵi son Apo Shiyos.

¹² “Piyon kon amta-an i joka pannemnem niya ikowan ko. No bilang ey wáray toon nankalniro ni sandasos, nem sota sakey imaraŵi, aliŵa ngaten sotan na too ket idekjas to sota siyam ma polo tan siyam shima shontog jet pilit ta to enapen sota sakey ya imaraŵi?

¹³ Jet no sepolen to, man-imdeng nga pasiya ni insapol to so nonta sakey ya istay imaraŵi, nem say sota siyam ma polo tan siyam ja eg imaraŵi ja wára ni olay.

¹⁴ Sajay i arig ni nemnem nen Amejo ja wáred dangit, ta eg to ngo kosto ja wáray angken sakey so nonta ira took ja nankebaba ja on-araŵi son si-kak.

Sota pesing no wáray nanbasol son si-kam

¹⁵ “No bilang ey wáray basol nonta kait mo son si-kam, mo ikowan son si-kato no abos jo. Jet no itenengan to sota ikowan mo son si-kato, may-odi mowan ma sota joka pesing nga singa san-agi ja istay esharal nonta inpanbasol to son si-kam.

¹⁶ Nem no eg toka itenengan, pangodop ka ni sakey ono showa ja kadwam jet daw kayo son si-kato, say emin na ikowan jon showa, wáray mengitneng. Ta say naysolat ja esel nen Apo Shiyos nonta bayag da, kowan to ey mesepol i showa ono tedo ja onpaneknek so.

¹⁷ Jet no eg to pay laeng itenengan ja eg memati son si-kara, ikowan mo ma so nonta ira emati no mesa-nop ira. No iso met laeng ja eg to itenengan sota ikowan sha son si-kato, say pesing mo ma son si-kato, aliwen mo i-inges so nonta ira eshom ma kait mod pamati, no diket passing mo son si-kato sota moka pesing so nonta ira eg maka-amta son Apo Shiyos, ono sota para singil ni bowis ja nankekedsel.

¹⁸ “Agpayso iya inkowan ko son si-kayo. No ngarantoy iparit jo ono ipalobos jo shiya dobong, itolok nen Apo Shiyos ja wared dangit ja si-katoy medeka.

¹⁹ “Iyay pay i ikowan ko son si-kayo. Sota showen too shiya dobong, no nan-inges i nem-nem sha maypangkep ni shaka pan-ishawat so nen Apo Shiyos ja Amak shi dangit, sota kekshawen sha, si-katoy medeka.

²⁰ Ta sota showa ono tedo ja esa-nop pangkep son si-kak, wara-ak son si-kara nontan na inkasa-nop sha.” Sajay den emin, inkowan nen Jesus.

In-arig nen Jesus sota baga-en ja eg to pinekawanen i kait ton baga-en

²¹ Si Pedro dimaw son Jesus et kowan to ey, “Apo, meminpiga ja pekawanen ko pay laeng sota kait ko no manbesol son si-kak? Angken meminpito?”

²² Simongbat si Jesus ja kowan to ey, “Aliwen meminpito bengat, no diket meminshakel ja eg mebidang: meminpiton polon pito i pemekawan mo ni kait mo.

²³ Ta say kay-eshigan ni kaasi nen Apo Shiyos shi pantoshayan to, sajay ya istoriya. Nontan da, wáray ari ja piyan ton tabtabalen sota ira baga-en to maypangkep nonta otang sha son si-kato say man-i-inawatan ira.

²⁴ Isonga sota ira baga-en to ja wáray otang sha son si-kato, inpa-odop to ira. Jet wáray sakey ali ja indaw sha son si-kato ja diniboy otang to.

²⁵ Nem sajay ya baga-en, eg to posi-en i bayad nonta otang to so nonta apo to. Isonga sota apo to, inkowan to ey maydeko iren san-asewá, pati sota ira annak sha, tan angken pay sota kokowa sha, say bayshan sha sota otang sha son si-kato.

²⁶ Nem sota baga-en, nantalimokod shi sango-an nonta apo to, ja ekikaasi son si-kato, ja kowan to ey, 'Kaasi-imak apo! Emin sota otang ko son si-kam, bayshan ko.'

²⁷ Jet nontan ma, kinaasi-an nonta apo to sotan na baga-en; isonga inkowan to ey angken ondaw ja angken eg to bayshan sotan na otang to.

²⁸ Nem sotan na baga-en, idi bimo-day, inapol to sota kait ton baga-en ja engotang ngo son si-kato ni otik ka pilak. Jet to inshel et sin-el to, ja kowan to ey, 'Bayshim niman sota inotang mo son si-kak!'

²⁹ Jet sotan na kait ton baga-en, nanshomog shi sango-an to ja ekikaasi son si-kato, ja kowan to ey, 'Kaasi-imak ta sota inotang ko son si-kam, bayshan ko!'

³⁰ Nem sotan na baga-en ja engotangan ni kait to, memasig, jet to et inbalod sota kait ton baga-en ja wáray otang to son si-kato ingkatod kowan to ey bayshan to sotan na otang to.

³¹ Idi inon-an ira nonta eshom ma baga-en nonta ari iyay ya inpasing nontan, ngaaw i deknara jet sha inkowan so nonta apo sha.

³² Jet sota apo sha, to inpa-odop sota baga-en ja engibedod ni kait ton baga-en jet kowan nonta apo to ey, 'Si-kam ma makedsel la baga-en! Pinekawanan taka ni emin na otang mo son si-kak ta ekikaasi ka son si-kak,

³³ jet istay pekawanan mo koma ngo sota kait mon baga-en ja engotang son si-kam, ja inges to ngoy inpasing ko son si-kam!'

³⁴ Isonga sota apo to, bimonget jet inkowan to so nonta emanbantay ni badoran ey ibalod sha sotan na baga-en to ingkatod eg to bayshan na emin sota otang to.

³⁵ "Sajay i arig ni kepesing nen Amak shi dangit son si-kayo no eg jo pekawanan sota kait jo ja manbesol son si-kayo. Jet mesepol pay ya podnoy pesing jon memekawan." Kowan nen Jesus.

19

Sota inpangitoto nen Jesus maypangkep ni pengisi-jan ni asewa

¹ Idi naksheng ja inkowan nen Jesus iyay, indekjas toy Galilia jet dimaw nodta sakop ni Jodia ja wared baliw ni ebadeg ga pa-dok ja kowan sha ey Jordan.

² Jet nontan, eshakel la pasiyay too ja imonod son si-kato, jet sota waray sakit to, inpamapteng to ira nodtan.

³ Idi nontan, wara ngo aliy dimaw son si-kato ja Parisiyo jet kowan sha ni dedamsis sha ey

peshasen sha. Isonga kowan sha ey, “Ngantoy moka pengi-odog ni dinteg tayon Hodiyo may-pangkep ni pengisi-jan ni asewa? Bolos aya i pengisi-jan ni daki so ni asewa to, angken enshiy kabol?”

⁴ Si Jesus, sinongbatan to ira ja kowan to ey, “Apay eg jo aya binasa sota esel nen Apo Shiyos ja naysolat nonta bayag da ja kowan to ey, ‘Manshoki nonta pilmiro, pinalsowa nen Apo Shiyos i daki tan bii.’

⁵ Tan waray inkowan to pay nonta bayag da ey ma-alsa sota daki so nen ameto nen ineto et may-a-shom so nen asewa to. Jet sota showen bakdang, may-eshig ma ey nansaksakey.

⁶ Isonga aliwen showa ma, no diket saksakey. Inpansaksakey nen Apo Shiyos i san-asewa, isonga enshiy nebeng ni toon mengisi-jan ni asewa to.”

⁷ Jet sota ira Parisiyo, kowan sha mowan so nen Jesus ey, “No kasta, apay nga wara ngarod i bilin nen Moises maypangkep ni pengisi-jan? Kowan to ey sota mengisi-jan ni asewa to, mesepol la i-amagan to ni solat ja isepa to so nonta asewa to asan toka tayni.”

⁸ Si Jesus, sinongbatan to mowan ira ja kowan to ey, “Say inpalobosan so nen Moises ey sotan i medeka ket kabol ni katangken ni nemnem jo. Nem nonta pinalsowa nen Apo Shiyos i too, enshiy to inkowan na satan.

⁹ Jet niman, ikowan ko son si-kayo ey sota dakin mengisi-jan ni asewa to, ey eg ekileki sota bii, nanbasol ja inges to sota emii no mengesawa mowan ni apil la bii.”

¹⁰ Jet sota too nen Jesus, kowan sha son si-kato ey, “No sotan i itsora ni pengesawa, pansigshan ngarod ni daki ey eg mengesawa.”

¹¹ Simongbat si Jesus ja kowan to ey, “Aliwén emin na too ket ewátan sha iyay ya inkowan ko ja onoren sha. Nem wáray eshom ma toon intolok nen Apo Shiyos ja on-awat so.

¹² Ta wára nga agpayso ira sota eshom ma eg mengesawa ta nay-anak iren sotan. Wara ira sota eshom ja eg mengesawa ta ekaponan, tan wára ngo ira sota eshom ma eg mengesawa say metopog i pansilbira shi pantoshayan nen Apo Shiyos. Sota toon mebedin na onoren to iya kowan ko, si-katoy dag-en to koma.”

Inpalobos nen Jesus ja ondaw ira di sota a-anak son si-kato

¹³ Jet sota ira a-anak, indaw ira di nonta maka-anak son si-kara, ta kowan sha ey say isakpal nen Jesus i takday to son si-kara ja ishawatan to ira son Apo Shiyos. Nem sota ira too nen Jesus, inseg-ang sha ira sota engidaw ali nonta a-anak.

¹⁴ Nem si Jesus, kowan to ey, “Baybay-iyo ira di sota a-anak ja ondaw ali son si-kak, karejo iparit. Tep inges iren jay ya a-anak ja ekombaba i mayda-kam shi pantoshayan nen Apo Shiyos.”

¹⁵ Jet si Jesus, insakpal toy takday to so nonta ira a-anak, asan toka ira ilekjas.

Sota balodakin entapi ton pasiya i kabaknang to

¹⁶ Jet nontan, wáray sakey ya toon dimaw ali son Jesus jet kowan to ey, “Maistoro, ngarantoy

dag-en ko ja mapteng say mewad-anak ni biyag ja enshiy to engintegan?”

¹⁷ Sinongbatan nen Jesus ja kowan to ey, “Apay nga mansedodsod ka son si-kak ni maypangkep ni mapteng? Amtam met ta saksakey ja si Apo Shiyos bengat i mapteng. Isonga no piyan mon mewad-an ni biyag ja enshiy to engintegan, patim sota bilin to.”

¹⁸ Jet sotan na too, kowan to so nen Jesus ey, “Towa nodtan na bilin to i pati-en ko?”

Jet si Jesus, kowan to ey, “Say kowan ni bilin to, kareka memono, kareka memii, kareka mengibot, aliwen mo ba-ngaten ja man-a-sel ni aliwen kosto.

¹⁹ Tan say bilin to pay, shayaw mos amam tan si inam, tan semek moy kait mo ja inges toy kasmek mo so ni bakdang mo.”

²⁰ Jet sota balodaki, simongbat ja kowan to ey, “Emin itan na bilin to, inonod ko ni olay. Jet nganto pay laeng i kolang ko?”

²¹ Simongbat si Jesus mowan ja kowan to ey, “No piyan mo ja enshiy mo pankodangan, ilekom ira sota kokowam jet sota dako to, i-kan mo so nonta ira nankebiteg. No sajay i pesing mo, say kawad-an ni kabaknang mo ma, naytalo shi dangit. Jet no meksheng nga sotan i pesing mo, kay-eshom ka di so ira niya took!”

²² Nem idi intenengan nonta balodaki iyay ya inkowan nen Jesus, namtik ja ensakit i nemnem to, tep toka tepi-en pasiya i kinabaknang to.

²³ Jet si Jesus, kowan to so nonta ira too to ey, “Edigat so ni baknang ja onsekep shi pantoshayan nen Apo Shiyos!

24 Sota animal ja kowan sha ey camel, no kas-anoy kalikat to ja on-osok shi ebot ni shakom, mas edigdigat pay ya onsekep i bebaknang shi pantoshayan nen Apo Shiyos!”

25 Idi intenengan ira nonta too nen Jesus iyay ya kowan to, nasshaaw iren pasiya jet kowan sha ey, “No kasta, enshi ngarod i maysedakan?”

26 Simongbat si Jesus ja kowan to ey, “Ag-payson eg kabaalan ni toon mengisedakan ni bakdang to shorog, nem si Apo Shiyos, mebedin to tep kabaalan ton emin.”

27 Simongbat ngo si Pedro ja kowan to ey, “Karam ngo dibdibkan ey si-kami, indekjas min emin i kokowa mi nonta nanbalinan mi ni toom. Jet ngaranto ngarod i konkona mi?”

28 Jet si Jesus, kowan to son si-kara ey, “Podno iya ikowan ko son si-kayo. No sota badon dobong ali ket sota kowan sha ey Anak ni Too, ipakat toy kina-Shiyos ton mantoshay, jet si-kayon took ja nay-ol-olop son si-kak, mekitoshay kayo. Si-kayoy mengigsheng ni panbenagan ni emin na Hodyos ja poli nonta sampolo tan showa ja annak nen Israel.

29 Jet ikowan ko son si-kayo, no sipay engilekjas ni baley to, a-aki to, annak to, bo-day to, ono sota maka-anak son si-kato, kabol ni inpamati to ni bilin ko, ebadbadeg ga pasiyay ewaten to ja angken mansandasos, tan kon-oren to pay i biyag ja enshiy to engintegan.

30 Nem eshakil ira sota kowan sha ey si-karay mandesin i ewaten sha, nem ootik kari. Nem wára et ngo mowan i kowan ni karakdan ey ootik i ewaten sha, nem eshakil kari.

20

In-arig nen Jesus ey nan-i-inges i dagbo ni man-obded gardin

¹ “Iyay mowan i kay-eshigan ni pantoshayan nen Apo Shiyos. Sota pesing nen Apo Shiyos ja menobalit ni too to, may-eshig so nonta toon emangardin ja engala ni obrantis to. Sotan na too, bimowas ja en mengenap ni toon dagbo-an to ja man-obda nodta gardin to.

² Jet idi waray simbi ton totoo, ekitodag son si-kara ey dagbo-an to ira ni kosto asan to ibetkag iren man-obda nodtan.

³ Idi nonta alas nowibi ni agsapa, dimaw mowan et waray inon-an to ja emandaydayat shima malkaro ja enshiy obdara.

⁴ Jet kowan to son si-kara ey, ‘Daw kayo ngo shima gardin ko jet kayo pan-obda. Dagbo-an takejo ni kosto.’ Jet sotan iren too, dimaw ira ja en nan-obda.

⁵ Idi alas dosi, tan alas tris mowan, dimaw mowan sota toon waray gardin to, jet sotan met laeng i inpasing to.

⁶ Nonta shanshanin alas singko ni mama-shem, dimaw mowan jet wara pay laeng i inon-an to ja toon emandaydayat, jet kowan to son si-kara ey, ‘Ngantoy? Wara kayod jay ni san-akew? Apay, enshiy obdayo aya?’

⁷ Simongbat ira ja kowan sha ey, ‘Enshi met i mengeda son si-kamin man-obda.’ Isonga simongbat sota waray gardin to ey, ‘Daw kayo ngarod shima gardin ko et kayo pan-obda.’

⁸ Idi mama-shem mala, sota makakokowa nonta gardin, inkowan to so nonta emengiman-shal nonta ira man-obda ey, 'Ta-wal mo di ira sota nan-obda et dagbo-im ira, manshoki nodta na-onod ja mimotok ingkato nodta epangdo.'

⁹ Isonga say pilmiron tina-wal to, sota ira engiroki ni obda ni alas singko ni mama-shem. Jet say inewat ni sakey tan sakey son si-kara, sota koston dagbo ni san-akew.

¹⁰ Idi tina-wal to ngo ira di sota epangdon nan-obda, say namnama sha, kowan sha nem mandesin ira. Nem iso met laeng nga say inewat ni sakey tan sakey son si-kara, sota koston dagbo ni san-akew.

¹¹ Idi inewat sha mala sota dagbora, pan-ikotot nonta ira epangdon nan-obda sota toon nan-obda-an sha,

¹² ja kowan sha ey 'Apay nga saja ira na-onod, ja nan-obda bengat ni sakey ya oras ket in-inges moy dagbora son si-kami ja nan-obda ni san-akew? Inen-enosan mi pay i embel-at ta obda, tan sakit ni sekit!'

¹³ Nem sota dimagbo son si-kara, sinongbatan toy sakey son si-kara ja kowan to ey, 'Kajem, enshiy ngaaw wa nak dingka son si-kayo. Timo-lok kayo met ey say idagbok son si-kayo ket sota koston dagbo ni san-akew.

¹⁴ I-ekad jo et ita dagboyo, kosto itan; angken ondaw kayo. Sota ira na-onod ja nay-inges i dagbora son si-kayo ja epangdon nan-obda, nemnem ko ngon may-inges ira son si-kayo.

¹⁵ Sota piyan kon penobalit ni took, si-kato, enshiy mengipeshit. Apay, kayoka aya ma-epal

ta ma-ekanak so ni eshom?’ ” Sajay i arig ga inkowan nen Jesus so nonta ira too to.

¹⁶ Jet si Jesus, intoloy ton kowan to ey, “Isonga sota toon namnama ni karakdan ey ootik i kon-oren to, si-kato et ngo mowan i mandesin aliy kon-oren to. Nem sota kowan ni karakdan ey ebadeg i ewaten to, si-kato et ngo mowan i ootik i kon-oren to ali.”

Sota maykepintedon engikowanan nen Jesus ni maypangkep ni ketey to

¹⁷ Idi nonta kepan-ekad ira nen Jesus ja ondaw shi Jerusalem, inpata-nil to ira sota sampolo tan showa ja apostol to et a-abos sha ma. Nonta wara ired ma shalan, kowan to son si-kara ey,

¹⁸ “Itnengi jo iya ikowan ko son si-kayo. Ag-payson si-kak sota kowan ira nonta para padto nonta bayag da ey Anak ni Too. Nem no onmotok kitod Jerusalem, may-ewatak ma so nonta ira apo ni papashi tan mamaistoro ni dinteg tayon Hodiyo ja makakontra son si-kak. Jet sotan may timpo ja pengikowanan sha ey mebono-ak koma.

¹⁹ I-awat sha-ak so nonta ira too ja aliwen kait tayon Hodiyo say si-karay memebaing son si-kak. Sepsepaten sha-ak pay, asan sha-ak ilansa ma shi koros. Nem no maykatdon akew, pan-ongal towak met laeng nen Apo Shiyos.”

Inshawat nonta asewa nen Sibidi ja al-en nen Jesus iray anak to ni toray

²⁰ Jet nontan, sota asewa nen Sibidi, dimaw ali so nen Jesus et pati sota showen anak to. En nantalimokod shi sango-an nen Jesus, ta waray ibaga to.

²¹ Jet si Jesus, kowan to son si-kato ey, “Ngantoy ibagam son si-kak?”

Simongbat sota bii ja kowan to ey, “Pangaasim, ikowan mo niman ey no mantoshay ka, meki-toshay ngo ira ja showen anak ko. Sota sakey, ontongaw shi petek ni kanawan mo et sota sakey, ontongaw shi petek ni kanigid mo.”

²² Simongbat si Jesus ja kowan to ey, “Joka ba-ngatay бага ey eg jo nin nemnemen. Wara aliy tasen napno ni digat jet mesepol la nak in-omen. Kabaalan jo ayen mengenos ja meki-inom nontan?”

²³ Jet simongbat mowan si Jesus ja kowan to ey, “Agpayson mekila-kam kayo nonta digat ja da-kaman ko. Nem sota itongaw jo shi petek ni kanawan ko, tan kanigid ko, aliwén si-kak i mengigsheng so. Sajay, para so nonta ira sigod ja insagana-an so nen Amak.”

²⁴ Idi intenengan ira nonta kait shen sampolo ja apostol nen Jesus iyay ya keshaw nonta san-agi, ngaaw i deknara son si-kara.

²⁵ Nem si Jesus, tina-wal to ira jet kowan to son si-kara ey, “Amtayo met i kepesing ira nonta mantoshay shima kompormin ili, tan sota eshom ma toon nankengatoy saad sha. Shaka ipakat i saad sha, ni shaka pengitoshay met laeng so ni sinekohan sha.

²⁶ Nem no si-kayo, aliwén inges nontan i pesing jo so ni sakey tan sakey son si-kayo. Sota kowan to ey si-katoy kangeto-an son si-kayo, mesepol la si-kato et ngo mowan i mengibeba ni bakdang to et si-katoy man-obda ni pansigshan ni kait to.

²⁷ Jet sota piyan ton si-katoy mandesin son si-kayo, mesepol la panbedin toy bakdang to ni baga-en jon emin.

²⁸ Ta angken si-kak ja naypadto nonta bayag da ey Anak ni Too, ekak dimaw ali ja pansilbi-an ni karakdan, no diket dimawak ali say mansilbi-ak son si-kara. Tan say sakey pay ya dinawan ko di, say itolok koy bakdang kon metey, tep si-katoy kaysedakan ni eshakil la totoo.”

Inpan-asas nen Jesus i showen ekorab

²⁹ Nonta shaka pan-idekjas i Jiriko, eshakil la pasiya ira sota toon imonod son si-kato.

³⁰ Jet nodta kalsara, waray showen toon ekorab ja timongaw nodta naykilig. Idi intenengan sha ey si Jesus i ondabas ali nodta kalsara, kimeljaw ira ja kowan sha ey, “Kaasi-i jokami, si-kam ma mengibengon son Ari David nonta bayag da!”

³¹ Nem sota ira eshakil la too, sinelkag sha ira, ja kowan sha ey, “Eka-eket kayo!”

Nem mina-mara et ja kimeljaw ja kowan sha ey, “Apo! Kaasi-i jokami, si-kam ma mengibengon son Ari David nonta bayag da!”

³² Kimi-neng si Jesus et tina-wal to ira ja kowan to ey, “Ngarantoy piyan jon itolong ko son si-kayo?”

³³ Simongbat ira ja kowan sha ey, “Apo, pan-asas jokami, say man-esas kami ngo.”

³⁴ Jet si Jesus, toka ira kaasi-i, isonga pinishat to i matesha. Jet mimapteng iren shagos ja nan-asas. Jet nay-eshom ira ma son Jesus.

21

Edadsak i totoo nonta mimotok si Jesus shi Jerusalem

¹ Nonta nay-esop ma shi Jesus shi Jerusalem ja wára ira shima dogad ja kowan sha ey Bitpag ja osshong ni shontog ja kowan sha ey Olibas, engibetkag ni showen too to,

² jet inbilin to son si-kara ey, “Daw kayod ma dogad ja naysongbob et nodtan na dogad, wáren shagos i asen jon naypagod ja animal la donkey et wára ngoy kilaw to. Okasiyo et alejo did jay sotan iren animal.

³ No wáray mengibeka son si-kayo no ngantoy joka pan-okasi so, ikowan jo ey, ‘Si Apo Jesus, mesepol to jet i-oli to met laeng alin shagos.’ Satan day ikowan jo son si-kara.”

⁴ Sajay ya inkowan nen Jesus, medeka say metongpal sota naypadto nonta bayag da, ja kowan to ey,

⁵ “Ikowan mo so nonta ira tood Jerusalem ey eg ira koma ontakot tep sota ari sha, ondaw alin mengi-kan ni talna. Isonga nankabajo ali shi kilaw ni donkey ja para obda.”

⁶ Jet sota ira too nen Jesus ja inbetkag to, dingkara sota inkowan to son si-kara.

⁷ Jet sota ta-kep ni baro sha, in-ap-ap sha nodta beneg ni donkey et nankabajo si Jesus.

⁸ Sota ira ngo eshom ma totoo, in-ap-ap sha ngoy baro sha nodta kalsaren panshalnan nen Jesus. Sota ira eshom, ira engala ngo ni emolong nga panga ni kadasan et in-ap-ap sha nodta kalsara.

⁹ Sota ira totoo ja epangdo ey si Jesus, tan sota ira na-onod, ireka onkaneljaw ja kowan sha ey, “Salamat son Apo Shiyos tep inbetkag to di iya mengibengon son Ari David nonta bayag da! Bindisiyonan to koma! Salamat son Apo Shiyos ja Kangeto-an!” Kowan ira nonta totoo.

¹⁰ Idi emanmotok ma si Jesus shi Jerusalem, emin ira sota too nodta siyodad, eg sha tongolan no ngantoy emankepasemak, isonga kowan sha ey, “Apay sipa aya itan na toon emanmotok?”

¹¹ Jet sota ira totoo ja nay-olop son si-kato, kowan sha ey, “Sajay sota para padto nen Apo Shiyos ja si Jesus i ngaran to. Too did Nasarit ja sakop ni Galilia!”

Shinagshag nen Jesus ira sota emandeko nodta Timplo

¹² Idi mimotok ma si Jesus, simekep shi Timplo, jet emin ira sota emandeko nodtan, tan emenongkal, shinagshag to iren inpabo-day. Jet tino-to-dang to pay ira sota damisaan ira nonta emena-dat ni pilak, tan sota tongawan ira nonta emandeko ni kalopati.

¹³ Jet kowan to son si-kara ey, “Say kowan ni esel nen Apo Shiyos ja naysolat nonta bayag da, kowan to ey sajay ya baley nen Apo Shiyos, nayngadnan ey si-katoy panshewatan ni totoo son si-kato, nem inpanbalin jo ni singa amotan ni tolisan!”

¹⁴ Jet sota ira epilay, tan sota ira ekorab, dimaw ira son si-kato shima Timplo jet inpamapteng to ira.

¹⁵ Nem inon-an ira nonta apo ni papashi ni Hodiyo tan sota ira mamaistoro ni dinteg ni Hodiyo sota kaskasshaaw wa dingka nen Jesus, tan intenengan sha sota keljaw ira nonta a-anak ja kowan sha ey, “Salamat son Apo Shiyos! Iyay ali sota mengibengon son Ari David!” Jet sotan na papashi tan mamaistoro ni dinteg, ngaaw i deknara.

¹⁶ Jet kowan sha so nen Jesus ey, “Apay nga eg mo selkagen ira ma a-anak? Apay eg mo aya itenengan ima kowan sha?”

Sinongbatan ira nen Jesus ja kowan to ey, “Owen, intenengan ko. Nem apay eg jo aya binasa sota esel nen Apo Shiyos ja naysolat nonta bayag da? Kowan to met ey, ‘Sota ira a-anak tan sota ira koyat, si-kara et ngo mowan i podno i shaka panshedjaw!’ ”

¹⁷ Nontan met laeng, indekjas to ira et dimaw ma shi Bitania, jet na-ogip shiman.

Sota inpasing nen Jesus so nonta kadasan na eg ondames

¹⁸ Idi agsapa, eman-ekad si Jesus say on-oli mowan shi siyodad ni Jerusalem et naytompong nga na-agang nontan.

¹⁹ Jet nodta toka pan-ekari, waray inon-an ton kadasan nodta kilig ni kalsara. To inon-an tep namnama to ey waray dames to, nem enshi gayam i dames to; bolong to bengat i wara. Jet si Jesus kowan to ey, “Si-kam ma kadasan, eg ka ma ondames, manipod niman ingkatod ingka!” Jet nontan met laeng, sota kadasan, nakkit ta shagos.

²⁰ Sota ira too to, idi inon-an sha iyay ya epasemak so nonta kadasan, nasshaaw ira jet kowan sha ey, “Nganto emoy nakkitan nima kadasan na shagos?”

²¹ Kowan ma nen Jesus ey, “Agpayso iya ikowan ko son si-kayo. No wáray pamatiyo ja enshiy showashowa to, aliwén sota dingkak so niya kadasan bengat i mebedin jon dag-en, no diket mebedin na ikowan jo pay niyay ya shontog ey ma-tan shorog ja ondaw shima baybay, jet mayto-to-wén medeka.

²² No ngantoy ibaga jo so nen Apo Shiyos, ewáten jo, no enshiy showashowa jo nonta panakabalin ton mengi-kan.”

Sinongbatan nen Jesus ira sota eg makakosto ni dingdingka tod Jerusalem

²³ Idi mimotok ma si Jesus shi Jerusalem, nantoro shima Timplo, jet sota ira apo ni papashi tan sota ira eshom ma pangolo ni Hodiyo, dimaw ira di son si-kato jet kowan sha son si-kato ey, “Sipay engikowan ey dag-en mo ira ta moka dagdag-a shiya Jerusalem? Sipay engibetkag son si-kam?”

²⁴ Simongbat si Jesus ja kowan to ey, “Ibag-an takejo ngo nin, jet no songbatan jo ni kosto iya salodsod ko, mebedin na ikowan ko son si-kayo no sipay engibetkag ali son si-kak ja mandeka niyay.

²⁵ Jet sipa ngarod i engibetkag so nen Juan ja en memonjag nontan — nemnem to ngo shorog ono si Apo Shiyos?”

Nem sota ira apo ni papashi tan sota eshom ma pangolo ni Hodiyo, nantatababal ira ja

kowan sha ey, “No ikowan tayo ey si Apo Shiyos, mesampolo kito tep ikowan to ey, ‘No kasta, apay nga eg jo ngarod pinati si Juan?’

²⁶ Nem no isongbat tayo ey nemnem ngo nen Juan, katetakot i pesing ni karakdan son si-katejo. Ta shaka pati-a ey si Juan, podnon inbetkag ali nen Apo Shiyos ja para padto.”

²⁷ Jet say songbat sha so nen Jesus, kowan sha ey, “Tawey, eg mi amta no sipay engibetkag so nen Juan ja memonjag.”

Jet kowan ma nen Jesus ngo son si-kara ey, “Angken ngon si-kak, ekak ikowan son si-kayo no sipay engibetkag son si-kak ja mandeka niya naka dagdag-a niman.”

²⁸ Jet wára pay i inkowan nen Jesus ja arig son si-kara, ja kowan to ey, “Nemnem jo kari iyay ya istoriya. Waray toon showay anak to; dimaw so nonta pangodowan et kowan to ey, ‘Anak ko, ka pan-obda shima gardin tayo niman.’

²⁹ Nem sotan na anak to, kowan to ey, ‘Ensik-shalak.’ Nem idi nannemnemnem, dimaw met laeng ja en nan-obda.

³⁰ Dimaw mowan sota amesha so nonta maykadwen anak to et iso met laeng i inkowan to. Jet say insongbat nontan na anak to, ‘Owen ama, ondawak.’ Nem enshi kari; eg dimaw.

³¹ Jet sipa so nonta ira showa i dimaga so nonta piyan nen amesha?”

Simongbat ira ey, “Sota pangodowan.”

Jet si Jesus, kowan to son si-kara ey, “Ikowan ko son si-kayo i podno. Sota ira para singil ni bowis ja makedsel, tan sota ira bibiin maleki,

si-karay epangdo et ngo mowan ja mayda-kam shi pantoshayan nen Apo Shiyos nem say si-kayo.

³² Ta dimaw alis Juan son si-kayo ja engipa-amta ni koston piyan nen Apo Shiyos ja dag-en jo, nem eg jo pinati. Sota ira para singil ni bowis tan sota bibiin maleki, emati ira et ngo mowan. Nem si-kayo, angken na inon-an jon mismo, eg kayo nanbebawi ni basol jo, tan eg kayo pay memati.” Kowan nen Jesus.

In-arig pay nen Jesus sota makedsel la inpan-gajowan ni makabo-day

³³ Wara pay i inkowan ton arig son si-kara, ja kowan to ey, “Itnengi jo pay iyay ya arig ja ikowan ko. Waray toon nanmola ni obas shi embanaw wa gardin to; inedad to, tan engamag ni shapidan nonta obas, tan engitowen pay ni baley ya kowadja-an. Inpa-ajowan to so ni eshom et dimaw ma shi arawin ili.

³⁴ Idi simabi sota timpon pekibingay to nonta obas, engibetkag ira nonta baga-en to ja en mengeda ali nonta bingay to so nonta ira engajowan.

³⁵ Nem sota ira inpan-gajowan to so nontan na bo-day to, sinepseptat sha et sota sakey ya baga-en, jet sota sakey, binonora. Jet sota maykatdo, kineskispigan sha ni bato.

³⁶ Sota makabo-day, engibetkag mowan ni eshakil la baga-en to jet iso met laeng i dingka ira nonta inpan-gajowan to nonta bo-day.

³⁷ Idi nonta anongosto, inbetkag nonta makabo-day sota anak ton mismo ja ondaw ta kowan to ey, ‘Mebedin emon ibaingan sha tep anak ko.’

³⁸ Nem idi inon-an ira nonta engajowan sota mismon anak nonta makabo-day, nantatabal ira ja kowan sha ey, 'Sajay sota anak nonta makakokowa niya gardin na tayoka pan-obda-i. Bono-en tayo et say saja bo-day ya tawid to, kokowa-en tayo ma.'

³⁹ Indara nga agpayso sota anak nonta makabo-day nontan et inkoyod shen inbo-day nodta alad et binonora." Kowan nen Jesus ni arig to.

⁴⁰ Jet nontan ma, inbag-an nen Jesus ira ja kowan to ey, "Jet no bilang ey ondaw ali sota makakokowa nontan na bo-day, ngantoy pesing to so nonta ira toon inpangajowan to?"

⁴¹ Jet kowan sha ni songbat sha son si-kato ey, "Simpri angja-en to ngo iren bono-en sotan na makedsel. Jet ipiyal to sota bo-day so ni eshom ma mengajowan say waray bingayen to no timpo ni apit."

⁴² Jet si Jesus, inbag-an to ira, ja kowan to ey, "Jet eg jo amten mengi-odog ngarod nonta esel nen Apo Shiyos ja naysolat nonta bayag da? Kowan to met ey, 'Sota baton binedaw ira nonta para amag ni baley, ja kowan sha ey enshiy silbi to, si-kato et ngo mowan gayam i epateg ga bato so ni emin. Si Apo Shiyos i makabaal niyay ya edaga jet kaskasshaaw i tayosoka pengidmang.'

⁴³ Sajay i naysolat nonta bayag da, jet ni-man ma, sota pantoshayan nen Apo Shiyos ja istay wara son si-kayo, ma-kal son si-kayo et may-ekan so ni eshom. Jet mapteng may panbenagan to.

⁴⁴ Jet angken sipen too ja maysokbab nodtan na bato, mekosot; tan no sipay tedteshan to,

memisit.”

⁴⁵ Idi intenengan ira nonta apo ni papashi ni Hodiyo tan Parisiyo ira jay ya arig nen Jesus, inewatan sha ey si-kara i kaytoshongan nontan na arig.

⁴⁶ Kowan sha ey seskelen sha si Jesus nontan, nem entakot sha ira sota totoo, tep sota ira totoo, ireka memati ey si Jesus, kowan sha ey para padton inbetkag ali nen Apo Shiyos.

22

In-arig nen Jesus sota kasal nonta anak nonta ari

¹ In-arigan nen Jesus mowan ira ja kowan to ey,

² “Say kay-eshigan mowan nonta pantoshayan nen Apo Shiyos, may-eshig so nonta ari ja nankastos ni ebadeg nonta inpangesawa nonta anak to.

³ Inbetkag nonta ari ira sota baga-en to ja sha odopen ira di sota inewis to nontan ja mekikan nodtan. Nem sota na-awis, ensikshal ira din ondaw.

⁴ Isonga engibetkag mowan ni eshom ma baga-en to ja kowan to son si-kara ey, ‘Kowan jo so nonta ira inewis ko nontan ey naksheng nga insaganak sota mekan ni mama-shem: sota bakak tan sota ira eshom ma animal la mateba, inpapaltik da. Esaganen emin, isonga mesepol la ondaw ira di koma.’

⁵ Dimaw da ira sota baga-en to ja sha inkowan sotan, nem sota ira toon na-awis sa mekikan, endedamsis sha. Sota ira eshom, dimaw ira et shi payew, jet sota ira eshom, ira nanbiyaki.

⁶ Sota ira eshom ngo so nonta ira na-awis, inshel sha et sota inbetkag nonta ari jet binebaingan sha ira, asan shaka ira bono-a.

⁷ Isonga sota ari, bimonget, jet engibetkag ni solsharo to jet sha ngo binono ira sota emono ni baga-en to, tan pinoolan sha pay sota siyodad ira nontan na totoo.

⁸ Jet inkowan to mowan ira nonta eshom ma baga-en to ey, 'Emin na mesepol shiya pengesawa ni anak ko, esagana, nem sota ira na-awis, ja istay mekikan koma, eg ira gayam maykeshi ja mekikan.

⁹ Daw kayo mowan et angken kompormin aspolen jon too shi shalan, awis jo ira did jay.'

¹⁰ Sota ira baga-en to, dimaw ira nga agpayso, jet emin sota simbira, inodop sha ira — angken sota ira nankekedsel ono sota ira maronong. Jet nontan ma, sota baley nonta ari, enapno ni toon mekikan.

¹¹ "Nem idi simekep ali sota ari ja to koma asen ira sota dimaw alin bisita, wáray inon-an ton toon ekiskep ali ja eg nanbaro ni para kasal.

¹² Jet sota ari, kowan to son si-kato ey, 'Kajem, ita et mangon wára ked jay, ey eg ka nanbaro ni para kasal?' Sotan na too, ebebaingan na imeg-eket.

¹³ Jet sota ari, kowan to so nonta toon emenintil ni toon onsekep ali ey, 'Balod joy takday nitan na too, pati sota sedi to, jet ipedaw jod ma embolinget. Shiman, mannengnengis i totoo, tan pannedetngget shay sangi sha ni digat sha.' " Sajay i arig ja inkowan nen Jesus, asan wáray inpan-onod ton esel ja kowan to ey,

14 “Eshakel i inewis nen Apo Shiyos, nem otik i mayda-kam shi pantoshayan to.”

Pineshas shen saolen si Jesus maypangkep nonta bayad ni bowis

15 Nontan ma, sota ira Parisiyo, dimaw ira ja en nantatabtabal no ngarantoy pesing shen menaol son Jesus say wára ikowan ton esel ja ikowanan sha so ey wáray basol to.

16 Jet say inpasing sha, engibetkag ira ni too sha ja nay-olopan ira nonta too nen Ari Hirodis, jet kowan sha so nen Jesus ey, “Maistoro, amta mi ey podnon emin sota kowan mo, tan sota torom ket si-katoy piyan nen Apo Shiyos ja dag-en ni totoo. Amta mi pay ey enshiy moka pabori, angken ngantoy katoo to.

17 Isonga iyay i ibaga mi son si-kam. Maypeshit aya shi dinteg tayon Hodiyo i panbedjad ni bowis so ni gobirnod Roma, ono enshi?”

18 Nem si Jesus, amta to ey ngaaw i pangkep sha jet kowan to son si-kara ey, “Si-kayon sinan maronong! Ngantoy jowaksoka pansaoli?”

19 Ipa-sasi jowak ni pilak ka joka ibayad ni bowis.” Inpa-sas sha son si-kato,

20 jet kowan to son si-kara ey, “Sipay makadopa niyay ya naymalked ja pilak? Tan sipay makangaran niya naysolat?”

21 Simongbat ira ja kowan sha son si-kato ey, “Sota ari shi Roma.”

Jet kowan ma nen Jesus son si-kara ey, “No kasta, sota pilak ja joka osala, edapod gobirno ni Roma, isonga mesepol met laeng nga pa-odiyo son si-kara. Sota kowan ni gobirno ey may-ekan

son si-kara, mesepol la maytongpal, jet sota kowan ngo nen Apo Shiyos ey may-ekan son si-kato, mesepol ngon mepati.”

²² Nem idi intenengan sha iyay ya songbat to son si-kara, ireka messhaaw jet indekjas sha si Jesus.

Pineshas sha mowan maypangkep nonta pan-biyag mowan ira nonta nanketey

²³ Nontan met laeng nga akew, dimaw ira di sota Sadosiyo. Say pamatira, kowan sha ey eg kono manbiyag mowan i etey, isonga inparas shen inbag-an si Jesus,

²⁴ ja kowan sha ey, “Maistoro, say insolat nen Moises nonta bayag da ja dinteg tayon Hodiyo, kowan to ey no sota dakin engasewa ket metey ja enshiy potot to nodta asewa to, sota agi nontan na dakin etey, si-katoy mengelbat nonta istay asewa to say balang nem waray enaken sha. Jet sota anak sha, maybidang ey singa potot nonta etey den agi to.

²⁵ Iyay i piyan min ibaga. Nontan da kono, waray piton san-a-aki shima kad-an mi, jet sota pangodowan, engasewa nem etey ya enshiy to inpotot. Inelbat nonta maykadwen agi to,

²⁶ nem etey mowan kono sotan na daki. Nan-i-inelbat ira sotan na san-a-aki ma ja engasewa nontan na bii, ingkato nodta maykepito.

²⁷ Jet shi ka-onoran, etey kono ngo sota bii.

²⁸ Sajay i piyan min ibaga son si-kam, ta no bilang ey onsabi ali sota timpon pan-ongal ira ni nanketey, sipa emoy koston maka-asewa ali

so nontan na bii? Ta nan-i-inelbat met ira sota piton san-a-aki ja engasewa son si-kato.”

²⁹ Simongbat si Jesus ja kowan to son si-kara ey, “Esama kayo, ta eg jo inewatan sota esel nen Apo Shiyos ja naysolat nonta bayag da, tan eg jo pay amta sota panakabalin to.

³⁰ Ta sota totoon pan-ongal ali nen Apo Shiyos, eg ma ira mengesawa ta ingesen sha ira sota anghil.

³¹ Nem sigosho eg jo pati-en ey manbiyag mowan i nanketey. Apay eg jo aya binasa sota kowan nen Apo Shiyos son si-kayo ja naysolat nonta bayag da ja kowan to ey,

³² ‘Si-kak si Apo Shiyos ja Shiyos shi Abraham, Isaac, tan si Jacob!’ Say olog niyay, angken etey mangon bayag i bakdang shi Abraham, kowan nen Apo Shiyos ey mabiday ired sango-an to. Ta no enshi koma, istay eg to inkowan ey si-katoy Shiyos sha.”

³³ Idi intenengan ira nonta totoo iyay ya inkowan nen Jesus, ireka messhaaw nontan na toro to.

³⁴ Nem idi inon-an ira nonta Parisiyo ey na-abak ira sota Sadosiyo ja enshiy isongbat sha ma so nen Jesus, nay-eshom ira di.

³⁵ Jet waray sakey son si-kara ja nan-ashal ni dinteg ja nansalodsod so nen Jesus, say balang nem waray apil la ikowan nen Jesus ja pebesolan sha so. Jet kowan to ey,

³⁶ “Maistoro, towa nodta bilin nen Apo Shiyos i kapatkan so ni emin?”

³⁷ Si Jesus, simongbat ja kowan to ey, “Say kapatkan so ni emin na bilin, sajay: ‘Si Apo

Shiyos i topogen mon sesmeken, ja si-katoy pengitoshongan mo ni emin na nemnem mo tan posom.'

³⁸ Sajay i kapatkan na bilin ja mesepol la pasiya ja onoren.

³⁹ Jet sota maykadwa ja bilin, kait to met laeng, isonga kowan to ey, 'Semek moy kait mon too ja inges toy moka penmek ni bakdang mo.'

⁴⁰ Sota emin na bilin ja naysolat nonta bayag da, tan sota kowan ira ni para padto nen Apo Shiyos, minongsan niya showen bilin ja si-katoy singa naynadnaran to."

⁴¹ Jet idi inon-an ton esa-nop ira di sota Parisiyo, inshingan ton nansalodsod ngo son si-kara,

⁴² ja kowan to ey, "Ngantoy joka pengi-odog nonta kowan ni padto nonta bayag da may-pangkep nonta inkari nen Apo Shiyos ey ibetkag to ali ja mengisedakan? Sipay makapoli son si-kato?"

Simongbat ira son si-kato ja kowan sha ey, "Poli ali kono nen Ari David nonta bayag da."

⁴³ Kowan mowan nen Jesus son si-kara ey, "No kasta, apay ngarod nga inkowan nen Ari David nonta bayag da ey sota naypadton mengisedakan ket apo to? Intorong met ni Ispirito Santo si David nonta engikowanan to ey,

⁴⁴ 'Si Apo Shiyos, inkowan to so nonta pangolok ey ontongaw si-kato shi apit ni kanawan to, ingkatod enshiy mebedin nonta kabakal to ja wara ma ired shalokap ni shapan to.'

⁴⁵ Jet no kowan nen Ari David ey pangolo to sota mengisedakan, toway inpasing to ja kowan jo ey poli ali nen Ari David?”

⁴⁶ Jet angken sakey son si-kara, enshiy mak-abaal la onsongbat son si-kato. Jet manipod ma nontan na akew, polos malen eg sha intoled ja nansalodsod son si-kato, ta inewatan sha ey eg sha kabaalan na ebaken.

23

Inkowan tod karakdan ni too sota ngaaw wa ogadi nonta ira Parisiyo tan sota kait sha

¹ Jet si Jesus, kowan to so nonta ira totoo ja naydaokan ni too to ey,

² “Sota ira mamaistoro ni dinteg tan sota ira Parisiyo, si-karay naysaad ja mengi-odog nonta dinteg ja in-akan nen Moises nonta bayag da.

³ Isonga sota kowan sha, si-kato komay onoren jon pati-en. Nem karejo onoran sota ogadira. Ta sotan na toro shen mismo, eg sha kari met laeng tongpalen.

⁴ Shaka ida-kariy too ni embel-at ta bilin shen eg sha iposi. May-eshig ey shaka ira bel-ati ni kalka ja eg sha iposi, nem si-karen mismo ket eg sha pay peshasen na angken sakey ya kalomot shay mandi-bit.

⁵ Emin na shaka dagdag-a, piyan shen asen ni totoo say i-etek sha ira. Singa agpayson epateg i pamatira son Apo Shiyos, ta waray shaka itaktakin ni olay ja papil la naysolatan ni esel nen Apo Shiyos, nem shaka peba-deg say on-an ni totoo. Tan shaka arti-i i kajaran ni baro sha

say ikowan ni too ey sota bilin nen Apo Shiyos noman i pipiyan sha.

⁶ Jet no timpo ni piyasta, pipiyan sha pay ja ontongaw shima naysaganen tongawan say mebigbig ira, tan angken pay shima sa-nopan, sotan i shaka pesing.

⁷ Pipiyan sha pay ya rispito-en ni totoo ira ja semsemano-an shima malkaro ja karakdan ni too, tan pipiyan shen ewagan ira ni too ni 'Maistoro'.

⁸ "Nem si-kayo, karejo itolok ja 'Maistoro' i awag sha son si-kayo, ta sakey bengat i maistoro jo, tan sakey pay, san-a-aki kayo shi pamati.

⁹ Jet angken sipen too shiya dobong, enshi komay jo ewagan ey amejo shi pamati ta sakey bengat i Amejod pamati, jet si-kato, wared dangit.

¹⁰ Karejo itolok ja ikowan ni too son si-kayo ey apo shakejo, ta sakey bengat i apo jo: si-kato si Cristo.

¹¹ "Jet sota kangeto-an son si-kayo, si-kato et ngo mowan i mansilbi son si-kayo.

¹² Sota mengingeto shorog ni bakdang to, maybeba et ngo mowan. Jet sota mengibeba ni bakdang to, si-katoy mayngeto.

¹³ "Nem kaasi kayo din mamaistoro ni dinte, tan si-kayon Parisiyo! Sinan maronong kayon too! Say keshosa-an jo, si-kayoy singa emengipeshit ni kait jon too ja mayda-kam shi pantoshayan nen Apo Shiyos. Jet angken si-kayon mismo, eg jo kosto. May-eshig ey si-kayoy mengilkeb ni sakepan ni pantoshayan

nen Apo Shiyos so nonta ira makapiyan na onsekep koma.

¹⁴ Kakaasi kayo di, si-kayon mamaistoro ni dinteg tan si-kayon Parisiyo, ta sinan maronong kayo! Manpa-otang kayo mango ira nonta bibiin nankebal; jet no enshiy ibayad sha, piditen jon angken sota baley sha i ibayad sha. Jet no ondaw kayod sa-nopan, say joka pesing nga mena-din ni kakedsel jo, joka ishokey i shawat jo son Apo Shiyos, say ikowan ni too ey maronong kayo. Jet sotan i keshosa-an jo ni ebadeg.

¹⁵ Kakaasi kayo di, si-kayon mamaistoro ni dinteg tan si-kayon Parisiyo! Sinan maronong kayo! Kaasi kayo di, ta epaladoy joka pesing: kayoka man-eka-ekad shi intiron dobong ja mengewis ni angken sakey ya too, nem no na-awis ja too jo mala, joka panbedin ni mas makedsel nem say si-kayo, isonga anam ton mandesin i shosa to shi impiyarno ey si-kayo.

¹⁶ “Kakaasi kayo di, ta si-kayoy may-eshig ey ekorab ba emengiredan ni kait ton ekorab. Say kowan jo, no sota Timplo i pansangba-an ni too, enshiy silbi to, nem no sota balitok shima Timplo i pansangba-an to, mesepol la tongpalen to sotan.

¹⁷ Singa ekorab kayo mowan ta eg jo amten mengilesin ni mapteng. Toway epatpateg — sota balitok, ono sota Timplo? Sota balitok, no enshid ma Timplo, balitok bengat; sota Timplo engi-kan ni pateg nontan ja pasiya, ta wára nodtan.

¹⁸ Jet say kowan jo pay, no sota wáred Timplo ja kowan sha ey altar i pansangba-an ni too, enshiy silbi to. Nem no sota too ket mansangba

so nonta wáred ma altar ja naydaton, mesepol la tongpalen to sotan.

¹⁹ Singa ekorab kayo! Ta say epatpateg, sota altar, aliwén sota wára nodtan ja naydaton. Sota altar met i kabol la kapatkan nonta naydaton.

²⁰ Isonga sota mansangba ja i-esel to sota altar, sota altar i nankari-an to, tan sota emin pay ya wára nodtan.

²¹ Jet sota mansangba ja i-esel to sota Timplo, sotan i nankari-an to, tan angken pay si Apo Shiyos ja may-eshig ey nanbaley nodtan.

²² Jet sota mansangba ja i-esel toy dangit, say nansangba-an to kari, sota tongawan nen Apo Shiyos, tan angken pay si Apo Shiyos.

²³ “Kaasi kayo di, si-kayon mamaistoro ni dinteg tan si-kayon Parisiyo, ta sinan maronong kayo! Joka tongtongpala sota bilin na ootik i pateg to, nem joka et ngo mowan ibiyang sota bilin na epateg ga pasiya. Joka idaton so nen Apo Shiyos ja singa bingay to sota maykesampolo nonta emin na apit jo, angken pay sota molejo ja para seng-ew ni sira. Nem joka diwayi sota wa-wa-shen piyan nen Apo Shiyos, ta piyan ton mapteng i pesing jo ni kait jon too: piyan ton kaasi-an jo ira, ja eg jo ira i-owapan. Sajay ya joka pesing nga mengi-kan ni singa bingay nen Apo Shiyos, mapteng, nem mesepol la eg jo diwayan iya wa-wa-shen piyan to.

²⁴ Isonga may-eshig ey joka sekatay imok shi inomen jo, nem sota animal la camel i joka tetdena. Apaw kayon Parisiyo! Singa ekorab kayon emengiredan ni kait ton ekorab!

²⁵ “Kaasi kayo di, si-kayon mamaistoro ni

dinteg, tan si-kayon Parisiyo, ta sinan maronong kayo! Say itsora ni ogadiyo, singa sota tasa ono malokong ja showal to bengat i eki-wanan, nem sota dikong to, edogit ta pasiya. Sotan i kay-eshigan jo tep say joka ipa-sas shi karakdan, singa maronong kayo, nem say joka dagdag-a, sota penikap ni kokowa ni eshom, tan sota pingit jo bengat i joka nemnemnema.

²⁶ Si-kayon Parisiyo, singa ekorab kayo, ta eg jo idasin sota mapteng. Say pilmiron dag-en jo koma, dinisiyo nin sota dikong ni tasa ono pingkan, say sota showal ja asen ni too, medinisan ngo.

²⁷ “Kaasi kayo di, si-kayon mamaistoro ni dinteg tan si-kayon Parisiyo, ta sinan maronong kayo! Si-kayo, may-eshig ey say ogadiyo, singa sota naydiyangan ni toon etey, ja epintolan ni empoti, say mapteng i boya to. Nem shi naydaem to, napno ni ensekig, pati sota pokel ni toon etey.

²⁸ Sajay i sakey mowan na kay-eshigan jo, ta singa maronong i kepengidmang ni kait jon too son si-kayo, nem shi nemnem jo, napno ni o-owap, tan ngaaw wa pangkep.

²⁹ “Kaasi kayo di, si-kayon mamaistoro ni dinteg tan si-kayon Parisiyo, ta sinan maronong kayo! Si-kayo i nandaga ni monyominto ira nonta para padto nonta bayag da, jet inalkosan jo pay sota naybeka-an ira nonta eshom ma too nen Apo Shiyos nonta bayag da.

³⁰ Jet say kowan jo pay, ‘No wára kami koma nonta timpo nen apo mi, arawin kami may-a-shom son si-kara ja memono ira nonta para padto nen Apo Shiyos.’

³¹ Sajay den inkowan jo, si-kayo met laeng i kaonpaneknek so ey annak shakejo nonta emono so ira nonta para padto, jet tinewid jo may ogadira ngo.

³² Eti, itodoy jon dag-en ja kekshengen sota dingka ira nonta apo jo la!

³³ Si-kayo, singa oleg i ogadiyo! Isonga eg mebedin na disi-an jon meshosa shi impiyarno!

³⁴ Jet niman, mengibetkagak da ngo son si-kayo ni toon mengikowan ni esel nen Apo Shiyos, tan mengibetkagak ni eshom ma toon edaing nga mantosho ja ondaw son si-kayo. Nem bono-en jo ira sota eshom ja idansa shi koros, jet sota eshom son si-kara, sepsepdaten jo ira shima sa-nopan jo. Jet emin sota mebay-an ja eg jo bono-en, osilen jo pay ira shi ka-ili-ili.

³⁵ Isonga meshosa kayo di ja ikaro jo sota inkabono ira nonta emin na maronong nga too ja naybokbok i shalesha shi intiron dobong manshoki so nen Abel ja mapteng nga too, ingkato so nen Sakarias ja anak nen Barakias, ja binono ni too nonta bayag da ja kait jon Hodiyo shima naydaem ni Timplo, ja nay-esop shima kowan sha ey altar.

³⁶ Ikowan ko son si-kayo ey emin iyay ya dingdingka ni apo jo nontan da, si-kayon too niman i mengikesho.

³⁷ “Si-kayon tood Jerusalem! Manshoki nonta bayag da ingkato niman, joka bono-a ni olay ja kespigan ni bato iray inbetkag nen Apo Shiyos son si-kayo, pati sota ira para padto. Ara! Piga mangoy pesing ko son si-kayo! Eminshakel la piyan kon i-okong takejon i-Jerusalem ja inges

to sota kepengi-okong ni manok ira ni kipkip to. Nem en-asneng kayo!

³⁸ Niman ma, olay to kayo ngo, tep enshis Apo Shiyos shi Timplo ja mengibediw son si-kayo.

³⁹ Jet ikowan ko ey si-kayon i-Jerusalem, waray timpon imotok ko son si-kayo ja asen jowak et ikowan jo ey 'Bindisiyonan koma nen Apo Shiyos iya toon inbetkag to di!' "

24

Indawag nen Jesus sota maypangkep ni pan-tepos ni dobong

¹ Si Jesus, bimo-day nodta Timplo jet nan-akad ja idekjas to koma sota Timplo. Nem sota ira too to, dimaw ira di son si-kato, jet intoro sha sota itsora ni ekalkalasin baley nodta kad-an ni Timplo.

² Nem si Jesus, simongbat son si-kara ja kowan to ey, "Owen, bisnayo niman. Tep ikowan ko son si-kayo ey wara aliy timpon onsabi ja sajay ya Timplon joka i-et-etek ey mapteng, mesheshal, jet angken sakey so ira nima baton mapteng i inkay-amag to, enshiy en mebay-an shima nay-amagan to; mesheshal la emin."

³ Idi pinsak ja wares Jesus ja timongaw shima shontog ja kowan sha ey Olibas, jet dimaw ira di sota too to ni abos sha, jet kowan sha son si-kato ey, "Piyen min amta-an no pigan ali ita kowan mo. Jet nganto pay i amta-an mi so nem pigan aliy idaw mo mowan ja mo pengisaad ni pantoshayan mo? Tan nganto pay i amta-an mi so ey shanshanin mantepos i dobong?"

⁴ Simongbat si Jesus ja kowan to son si-kara ey, “Nemnememen jo koma iyay. Karekayo pa-olbod so ni angken sipa,

⁵ ta eshakel aliy toon mengosal ni ngaran ko, ja ikowan sha ey si-kara si Cristo, jet eshakel noman i toon may-owapan.

⁶ Jet wára pay i mismon mankokobat ja ite-nengan jo, tan wáray shemagen jon kobat shi eshom ma ili. Nem karekayo meshanagan. Tep kenshat ta mepesamak ira jay, nem aliwén sotan i ka-amta-an to ey shanshani may pantepos ni dobong.

⁷ Angken ili tan ili, mankobat ira, jet angken pay sota ka-ili-ilin intorayan ni a-ashi, mankokobat ngo ira. Wara pay i epaladon bitil tan jegjeg shi kedogadogad.

⁸ Nem emin iyay ya mepesamak, sajay i pan-shoki-an bengat ni digat.

⁹ “Jet si-kayo, i-awat shakejo shi toray jet pedigaten shakejo asan shakejo bono-a. Karakdan ni tood ka-ili-ili, okesen shakejo maypangkep ni joka pemat son si-kak.

¹⁰ Jet eshakel ma i took ja mengi-ibjag ni pamatira tan mengibaag ni kait sha so ni makakontra son si-kara, tan asdeg to so ni took ja emati i mankokontra.

¹¹ Wara pay iray ondaw ali ja kowan sha ey para padto ira nen Apo Shiyos, nem o-owap kariy toro sha, jet eshakel noman i on-onod son si-kara ja may-owapan.

¹² Jet sajay alin timpon onmotok, mema-ma may ogadi ni toon ngaaw, jet nakol ni wá-wá-sha

so ira nonta took i ootik may semek sha so ni kait sha.

¹³ Nem sota mengitoded niyay ya digat ingkatod meksheng, si-katoy maysedakan.

¹⁴ “Jet sota mapteng nga shamag maypangkep ni pantoshayan nen Apo Shiyos, maypedawag nin shi intiron dobong, say amta-an ni emin na tood ja ka-ili-ili, asan kesabi may pantepos ni dobong.

¹⁵ “Jet on-an jon mepesamak sota inpadto nen Daniel nonta bayag da, ja ‘kataktakot alin ondogit’. Jet isaad toy toray to nodta Timplo. (Sota memasa niyay, ewatan to komay kaytoshongan niya kowan nen Jesus.)

¹⁶ No on-an jo iyay, say pesing sha koma nonta ira wared Jodia ket onbetik ira et ja manbakwit shi shonshontog.

¹⁷ Sota toon maytompong nga man-adibay shi bo-dayan, eg to koma nemnemen ja onsekep shima baley to ja en mengeda nonta kompormin wara nodta naydaem ni baley.

¹⁸ Kasta met sota wared payew, eg koma mesiwat ni aleto nonta insepa ton baro to.

¹⁹ Sajay alin mepesamak, kakaasi ira din pasiya sota bibiin malokon, tan sota bibiin waray anak shen emenoso.

²⁰ Irewat jo son Apo Shiyos ey eg koma mepesamak iyay ni timpon powek, ono timpo ni akew ni ngilin, say mariwes i pentik jo.

²¹ Ta sotan alin digat ja onsabi, enshiy to kay-ingesan nodta ira digat ja epaspasamak, manipod nonta epalsowa iya dobong ingkato

niman. Jet sajay ya digat ja mepesamak, enshiy kay-ingesan to di.

²² No eg ninemnem nen Apo Shiyos ey tikeyen to iyay alin digat, istay angken sipen too, enshiy mebay-an na mebiyag. Nem si Apo Shiyos, tikeyen to iyay ya digat ta toka isakit ira sota too ton pinidi to.

²³ “Sotan alin akew, no wáray mengikowan son si-kayo ey amtaray kad-an nen Cristo, ja kowan sha ey jo asen, karejo patpati-en.

²⁴ Ta eshakil aliy toon kowan sha ey si-kara si Cristo, ono kowan sha ey si-karay para padto nen Apo Shiyos, jet eshakil i dag-en shen kaskasshaaw wa aramid ono milagro. Jet no mebedin, kowan sha pay ey i-owapan sha ira sota too nen Apo Shiyos ja pinidi to.

²⁵ Naka pan-isigod i banshaan son si-kayo say amta-en joy mepesamak ali.

²⁶ “Isonga no ikowan sha son si-kayo ey wára si Cristo shima dogad ja naybetaw shi ili, karekayo ondaw; ono no ikowan sha ey nan-emot si Cristo shi naydaem ni baley, karejo kari patpati-en.

²⁷ Ta say itsora ni idaw ali mowan nonta kowan ni padto ey Anak ni Too, inges toy bagidat ja silwán to shagos i emin na naykayang.

²⁸ “No toway kad-an ni etey ya bangkay, si-kato ngoy kesa-nopan ira ni kawáng.

²⁹ “Jet sotan alin timpo ja kekshengan nonta digat, ma-shep shagos sota niyal ni sekit tan bolan, jet sama talaw, mepedaspas ira, jet sama naykayang, mebediwan i itsora to.

³⁰ Sajay nin i mepesamak, asan wára ma ali sota amta-an jo so ey emanmotok sota kowan sha ey Anak ni Too ja medepo alid dangit. Jet emin na kilasin too shiya dobong, mandeshingit ira, ta mismon asen sha-ak ja ma-odopan ali ni kolpot, tan asen sha pay i itsora ni bakdang kon emenenilin pasiya, tan asen sha ngo sota podnon panakabalin ko.

³¹ Jet sotan alin imotok ko, waray makedsang nga janget ni trompita jet ibetkag ko iray anghil ko ja mengolnong ira nonta pinidik ja took shi emin na sakop niya dobong.”

³² Jet si Jesus, arig mowan i inpasing ton engilewag nonta idaw to mowan ali, ja kowan to ey, “Nemnem jo kari sota kadasan na kowan sha ey higos. Shiya kad-an tayo, no asen jon ondongkey sota panga to, asan somimit mowan i bolong to, amtayo ma ey shanshani sota timpo ni petang.

³³ Inges niyay aliy i-olik. No asen jon eman- ketongpal ira ja inkowan ko la, amtayo ma ey sota timpon idaw ko ali, shanshani ma, ja singa wára-ak nodta pasbol.

³⁴ Podno iyay ya ikowan ko son si-kayo. Saja ira too niman, eg ira nin metey, no diket sa-kopen shen emin ira jay ya mepesamak ali.

³⁵ Sama naykayang tan saja dobong, mebedin na ma-enshi, nem saja esel la inkowan ko, kenshat ta metongpal, ja eg ma-enshi.

³⁶ “Nem si Apo Shiyos bengat i maka-amta ni timpo ja ketongpal niyay ya inkowan ko. Angken sama anghil shi dangit, tan si-kak ja Anak nen Apo Shiyos, eg mi ngo amta.

³⁷ Arig to sota timpo nen Noe. Ta sota aramid ni totoo nontan den timpo to, inges to met laeng i aramid ni too ni imotok mowan ali nonta kowan ni para padto nonta bayag da ey Anak ni Too, jet inges to mowan i idibag sha.

³⁸ Ta nonta aneng pay laeng sota dayos, enshiy shaka panshanagi ni inakew: ireka mengan, ireka menginom, ireka man-a-asawa — ingkato nonta simabi sota timpon simekep ma si Noe nodta barko to.

³⁹ Jet sotan iren too, dimibag ira ni insabi ali nonta dayos, jet dinedjos to iren emin. Jet angken ngon sota idaw mowan ali nonta kowan ni para padto ey Anak ni Too, inges niyay ja palibdibag.

⁴⁰ Jet sota timpon idaw ko ali, odopen koy eshom ma too, nem sota eshom, bay-an ko. Et no kaspangarigan sota showen daki ja maytompong ja wared payew, sota sakey, may-odop son si-kak, nem sota sakey, mebay-an.

⁴¹ Angken ngon sota showen biin maytompong nga emengiding, sota sakey may-odop son si-kak, nem sota sakey, mebay-an.

⁴² “Pansagana kayo, ta eg jo amta no nganton timpo i idaw ali nen Apo jo.

⁴³ Sajay i nemnemen jo: say imotok ko ali, kompormin oras ja inges toy kaidaw ali nonta mengibot shi baley. Jet no sota makabaley ket amta to koma no nganton oras ni edabi i idaw ali nonta mengibot, kenshat ta mansekana, eg to itolok ka onsekep sota mengibot shi baley to.

⁴⁴ Isonga angken si-kayo, mesepol la mansekana kayo, ta si-kak ja kowan ni para

padto ey Anak ni Too, ondawak alin palibdibag.” Kowan nen Jesus.

⁴⁵ Jet wára pay i arig ja inkowan to, ja kowan to ey, “Sota baga-en ja mepiyal ja amta toy toka dagdag-a, si-katoy piyalen nonta apo ton mengimanshal ni kokowa to, tan no timpo ni pengi-idaw ni balon ira nonta kait ton baga-en, si-katoy kaipiyal nen apo to.

⁴⁶ Jet no sotan na baga-en ket maramen eman-obda ey onmotok ali sota apo to, mapteng i konkona ton i-akan nonta apo to.

⁴⁷ Agpayso iya ikowan ko son si-kayo. Sotan na baga-en, no sebi-en nen apo ton eman-obda, si-katoy piyalen nen apo to ja en mengimanshal nonta emin na kokowa to.

⁴⁸ Nem apil i pesing to so nonta sakey ya baga-en ja maledamsis, ja makakowan ey, ‘Angkena, ta sota apok, metaktak alin onmotok’,

⁴⁹ isonga ishogi ton sepsepdaten ira sota kait ton baga-en, tan mesiwat ja mekiladdadsak so nonta ira nankeboteng.

⁵⁰ Kakaasi sotan na baga-en, ta sota apo to, on-oli alin palibdibag, jet ondibag sota baga-en tep eg to amta sotan na i-oli ali nonta apo to.

⁵¹ Jet sotan na baga-en, pekishosa to so nonta ira kait ton o-owap i shaka pansilbi. Jet shiman, mannengnengis i totoo tan pannedetnget sha i sangi sha ni digat sha.” Kowan nen Jesus.

25

¹ In-arig pay nen Jesus i timpon idaw to ali, ja kowan to ey, “Say arig ni pesing nen Apo Shiyos shi pantoshayan to, sajay ya istoriya. Wára

konoy sampolon memeshikit ja engita-jon ni kingkira ja sha seskeshen sota dakin mengesawa, say mekidaw ira son si-kato shi kasal.

² Sota dima so nonta ira memeshikit, waray nemnem sha, isonga nansagana ira; nem sota dima, enshi.

³⁻⁴ Sota ira nansagana, engita-jon ira ni silew shen kingki jet engita-jon ngo pay ira ni maykalka nodtan say eg ma-shep. Nem sota eg nansagana, engita-jon bengat ira ni kingkira.

⁵ Idi etaktak sota daki ja eg dimaw alin shagos, jimo-kew ira sota memeshikit jet na-ogip ira.

⁶ Nem idi kawa ni dabi, waray kimeljaw ja kowan to ey, 'Bangon kayo! Ma-ali sota daki! Jo aspol!'

⁷ Jet emin ira sota memeshikit, bimangon ira, jet tinotongan sha sota kingkira.

⁸ Sota ira memeshikit ta eg nansagana, kowan sha so nonta ira kait sha ey, 'Pangi-kan kayo ka di ni maykalka shiya kingki mi tep emanka-shep.'

⁹ Nem sota ira memeshikit ta nansagana, kowan sha ey, 'Enshi, ta baka et ey eg on-anay iyay ja para son si-kami no i-aknan mikejo. Daw kayo et shima kantina jet kayo panongkal ni osalen jo ngo.'

¹⁰ Nem idi dimaw da iren en menongkal, mimotok ali sota dakin mengesawa, jet sota ira memeshikit ta nansagana, si-karay ekidaw so nonta daki shima pankasalan to. Jet idi simekep ma ira nodta baley, naydekeb ngo mala sota sakepan.

¹¹ Idi naksheng ma iyay, sota ira memeshikit ta eg nansagana, mimotok ngo ma ira di, jet kowan

sha ey, 'Apo! Apo! Ilo-kati jokami!'

¹² Nem kowan nonta dakin mengesawa son si-kara ey, 'Say agpayso, enshiy biyang ko son si-kayo.' " Sajay i arig ga inkowan nen Jesus jet intoloy ton kowan to ey,

¹³ "Isonga say kowan ko son si-kayo, mesepol la esagana kayo ni olay, ta eg jo amta sotan alin akew ja idaw ko di."

¹⁴ Wara pay i inkowan ton arig say man-edisto sota ira too to ni eg to pay laeng ali imotok, ja kowan to ey, "Waray sakey ya baknang ja waray dawán ton nay-arawin ili, isonga inpa-odop to ira di sota baga-en to jet inpiyal to sota ira kokowa to son si-kara.

¹⁵ Sota sakey, in-aknan to ni dimen dibo, jet sota maykadwa, in-aknan to ni showen dibo, jet sota maykatdo, in-aknan to ngo ni sandibo, ta say in-akan to son si-kara, sota mebedin na kabaalan shen ibiyaki, asan ka-edaw shi dawán to.

¹⁶ Jet sota in-aknan to ni dimen dibo, dimaw wa shagos ja to inbiyaki, jet nandobli sotan na pilak.

¹⁷ Sota showen diboy inewat to, to inbiyaki ngo jet nandobli sotan na pilak.

¹⁸ Nem sota sandiboy inewat to, to in-emot ja inbeka sotan na pilak ni apo to.

¹⁹ Idi edabas day ebayag ga timpo, sota apo ira nonta baga-en, mimotok ali jet to tinonton sota pilak ja inpiyal to so nonta ira baga-en to.

²⁰ Jet sota in-awatan to so ni dimen dibo, dimaw ali ja inta-jon to sota dimen dibo ja inbiyaki-an to, jet kowan to so nonta apo to ey,

'Apo, sota dimen dibo ja in-awat mo son si-kak, nak inbiyaki jet nandobli.'

²¹ Jet sota apo to, kowan to ey, 'Siya, mapteng i dingkam; mebedin ken mepiyal la baga-en ko. Kaka mepiyal la mengimanshal ni otik ka banag, isonga niman, ebadeg i ipiyal ko son si-kam ma imanshal mo. Kala, mayda-kam ka ja meki-imdeng son si-kak shi baley ko.'

²² Jet sota showen dibo i inewat to, dimaw ngo ali, jet kowan to son apo to ey, 'Apo, sota in-awat mo son si-kak ja showen dibo, nak inbiyaki jet nandobli.'

²³ Jet kowan nonta apo to ey, 'Siya, mapteng i dingkam; mebedin ken mepiyal la baga-en ko. Kaka mepiyal la mengimanshal ni otik ka banag, isonga niman, ebadeg i ipiyal ko son si-kam ja imanshal mo. Kala, mayda-kam ka ja meki-imdeng son si-kak shi baley ko.'

²⁴ Sota sandibo ngoy inewat to, dimaw ngo ali jet kowan to son apo to ey, 'Apo, amtak ey si-kam ket palado ken too, ta angken sota aliwen molam, moka pan-epita, jet angken sota in-obda-an ni eshom, moka pay kepan-al-a.

²⁵ Isonga etakotak jet nak inbeka ja in-emot sota pilak ka inpiyal mo son si-kak. Iyay, jet alam ta kokowam.'

²⁶ Nem sota apo to, sinongbatan to ja kowan to ey, 'Si-kam, enshiy am-amtam, esarot ka! Amtam met gayam ey naka pan-epita i angken aliwen molak, tan naka pan-al-a i in-obda-an ni eshom.

²⁷ Jet apay nga eg mo inbangko itan na pilak, say niman alin inmotok ko, waray ewaten kon patang to?

²⁸ Alejo ita pilak ka inpiyal ko son si-kato, jet i-kan jo so nonta toon kawad-an ni dimen dibo!

²⁹ Ta sota ira wa-wa-sha-anan, may-aknan pay, say eshakel la pasiya i si-kato. Nem sota ootik anan, angken sota oltimon wara son si-kato, ma-da pay.

³⁰ Jet sotan na baga-en ja enshiy silbi to, iteknal jo shima embolinget, jet shiman, mannengnengis i totoo, tan panngedetnget shay sangi sha ni digat sha!' " Sajay i arig ga inkowan nen Jesus.

³¹ Kowan to pay ey, "Sota timpon idaw mowan ali nonta kowan ni para padto ey Anak ni Too, ondaw ali ja inges tos Apo Shiyos. Emin sota anghil, may-odop ali son si-kato, jet isaad toy pantoshay to ja enshiy to kay-ingesan.

³² Sotan alin timpo, emin na totood ka-ili-ili, mesa-nop ired sango-an to, jet pandinasin to ira, ja inges toy kepesing nonta emanbantay ni kalniro, ja toka idasin ira sota kanshing so nonta ira kalniro to.

³³ Jet say pesing nonta kowan ni para padto ey Anak ni Too, isingpet ton ipiig sota kalniro to shima petek ni kanawan to, nem sota kanshing, ibiyang ton idasin shima petek ni kanigid to.

³⁴ Jet sota ari, ikowan to so nonta ira insingpet ton wara nodta petek ni kanawan to ey, 'Kalejo, si-kayon kinaasi-an nen Amak! Si-kayoy mayda-kam ja mekitewid shima pantoshayan nen Apo Shiyos; naysagana ngo eshan para son si-kayo nonta eg pay laeng epalsowa iya dobong.

³⁵ Kaasi-an tokejo, ta nonta naka man-ekang, pinekan jowak, tan nonta na-kewak ni shanom, inpan-inom jowak; nonta dimawak shi ili jo ja

enshiy amtak ja pan-iyanan ko, sinintil jowak;

³⁶ jet nonta enshiy barok, binesho-an jowak; nonta nansakitak, jowak binisita, asan nonta naybaloshak, jowak inon-an.'

³⁷ Jet sotan iren inewat ni ari, onsongbat ira ja kowan sha son si-kato ey, 'Apo, enshi met i amta min mi dingka so ira niya kowan mo ey pinekan mika nonta na-agang ka, ono inpan-inom mika nonta na-kew ka ni shanom.

³⁸ Enshi met i amta min misoka sinintilan, ono misoka binesho-an.

³⁹ Enshi met i amta min misoka binisita-an ni insakit mo ono inkabedod mo.'

⁴⁰ Jet onsongbat sota ari ja kowan to ey, 'Podno iya ikowan ko son si-kayo. Sajay den inkowan ko, dingkayo so ira nonta kabeba-an na kait ko, jet maybidang ey si-kak i dingka-an jo so nontan.'

⁴¹ Jet ikowan nonta ari ngo so nonta ira in-biyang ton wared petek ni kanigid to ey, 'Ki-nan kayod ja kad-an ko! Meshosa kayo shima apoy ya shalang to ni olay ingkatod ingka! Sajay i naysagana para so nen Satanas, pati sota ira betkag ton anghil.

⁴² Sajay i pesing ko ta eg jowak kinaasi-an. Nonta naka man-ekang eg jowak pinekan, nonta na-kewak ni shanom eg jowak inpan-inom,

⁴³ nonta dimawak shi ili jo, ja enshiy amtak ja nak pan-iyanan eg jowak sinintil, nonta enshiy barok eg jowak binesho-an, nonta naka mansekit tan nonta naybaloshak, eg jowak binisita.'

⁴⁴ Jet onsongbat ngo ira ja kowan sha ey, 'Apo, enshi met i amta min mi so in-owayan son si-kam ni inka-akang mo, ono inka-kew

mo ni shanom, ono sota kowan mo ey enshiy amtam ma pan-iyanan mo, ono enshiy barom, ono insakit mo, ono inkabedod mo!’

⁴⁵ Jet songbatan to ngo ira ja kowan to ey, ‘Agpayso iya ikowan ko son si-kayo. Sota eg jo so insintil so ira niya kabeba-an na kait ko, maybidang ey si-kak i eg jo sinintil.’

⁴⁶ Jet sajay ira, meshosa ira shima shosa-an ingkatod ingka. Nem sota ira inewat to, may-aknan ira ni biyag ja enshiy to engintegan.” Kowan nen Jesus.

26

Nantatabalan nonta makakontra son Jesus i pesing shen memono son si-kato

¹ Idi enaksheng nga inkowan nen Jesus iyay ya emin, waray inkowan to so nonta ira too to, ja kowan to ey,

² “Amtayo, no ondabas i showen akew, medeka sota piyasta tayon Hodiyo ja kowan tayo ey Paskowa, jet si-kak ja kowan ni para padto ey Anak ni Too, may-ewatak so ni toray say maydansa shi koros.”

³ Jet nontan met laeng nga akew, sota ira apo ni papashi, tan sota ira pangolo ni Hodiyo, esa-nop ira shima ebadeg ga baley nonta kangeto-an na pari, ja si Kaypas.

⁴ Jet nantatabal ira no ngantoy pesing shen memono son Jesus, jet ninemnem sha ey alboren sha kono say ma-shel et mebono.

5 Nem say kowan sha, “Aliwén tayo itompong no timpon piyasta, ta baka et ey mankodo ira sota eshakel la totoo.”

Shino-jagan ni sakey ya bii i toktok nen Jesus ni emanseng-ew wa dana

6 Jet nontan na akew, wares Jesus shi Bitania, shima baley nen Simon ja istay ebaybayang i bakdang to.

7 Wara ngoy biin dimaw ali son si-kato nontan na baley, ja engita-jon ni palit ta danen emanseng-ew, ja nay-iyen shi botilja. Jet insho-jag to iyay shi toktok nen Jesus nonta maramen emengan si Jesus nodta damisaan.

8 Nem idi inon-an ira nonta too to, ireka mankotot ja kowan sha ey, “Ngantoy in-pakewasan to so emo nima dana?”

9 No istay indako to koma sotan na dana, istay asdeg to komay tongkal to jet mebedin na may-ekan so ni nankebiteg.”

10 Nem si Jesus, amta toy wared nemnem sha jet kowan to ey, “Baybay-iyo ita bii; karejo bedawen. Ta mapteng ita dingka to son si-kak.

11 Sota ira nankebiteg, wara ni olay son si-kayo, isonga mebedin na todongan jo; nem si-kak, eg mebedjag i pekikadwak son si-kayo.

12 Jet saja dana ja insho-jag to son si-kak, singa toka pan-isagana i kaybebka niya bakdang ko.

13 Jet agpayso iya ikowan ko son si-kayo. Shiya intiron dobong, no maytoshosota mapteng nga shamag maypangkep son si-kak, sajay ya dingka niyay ya bii, pekipedawag sha jet eg medibdibkan.” Kowan nen Jesus.

*Bimaki si Judas ta ekitodag so nodta makakon-
tra son Jesus*

¹⁴ Sota sakey so nonta sampolo tan showen apostol nen Jesus, ja si Judas Iskariote i ngaran to, dimaw so nonta ira apo ni papashi ni Hodiyo,

¹⁵ jet kowan to son si-kara ey, “Ngarantoy i-akan jo son si-kak no itorok son si-kayo i kad-an nen Jesus?” Jet binayshan sha ni tedon polon palata.

¹⁶ Jet nontan ma, wára ni olay shi nemnem nen Judas Iskariote no toway pesing ton mengibaag so nen Jesus son si-kara.

*Sota ka-onoran na pekipengan nen Jesus so
nonta ira apostol to*

¹⁷ Idi shimanon sota pilmiron akew ni piyasta, ja shaka pengan nonta tinapay ya enshiy daok ton para debag, dimaw ira di sota apostol nen Jesus son si-kato, jet kowan sha ey, “Toway piyan mon mi pansekana-an ni penganan mo nem ma-shem, tep Paskowa ma?”

¹⁸ Simongbat si Jesus ja kowan to son si-kara ey, “Daw kayo so nen iman na polano shi Jerusalem jet no sebi-en jo, ikowan jo son si-kato ey, ‘Kowan ali nen Maistoro ey mengan konod ja baley mo niman na piyasta, pati si-kamin too to, tep shanshani kono sota timpo to.’ ”

¹⁹ Jet sota ira too to, pinatira sota kowan nen Jesus jet dimaw ira ja sha insagana sota kenen sha ni mama-shem nontan na Paskowa.

²⁰ Idi mama-shem mala, si Jesus tan sota sampolo tan showen apostol to, dimaw iren mengan nodtan, jet nansasango ired damisaan.

²¹ Idi maramen ireka emengan, kowan nen Jesus ey, “Agpayso iya ikowan ko son si-kayo. Waray sakey son si-kayo ja mengibaag son si-kak so nonta ira makakontra son si-kak!”

²² Jet sota ira too to, ensakit ta pasiya i nemnem sha, jet kowan ni sakey tan sakey son si-kato ey, “Sipa apo? Aliwén si-kak emo?”

²³ Simongbat si Jesus ja kowan to ey, “Sota nay-okob son si-kak shi sakey ya pingkan, si-katoy mengibaag son si-kak.

²⁴ Si-kak sota kowan ni para padto ey Anak ni Too jet kenshat ta metongpal sota padto ja naysolat nonta bayag da ni maypangkep son si-kak. Nem kaasi met laeng sotan na toon mengibaag son si-kak, ta meshosen pasiya! No da-kaman to sotan na shosa, ikowan to shorog shi bakdang to ey, ‘Agpos et nem ekak koma nay-anak!’ ”

²⁵ Jet si Judas Iskariote ja mengibaag ali so nen Jesus, kowan to ey, “Sipa apo? Aliwén si-kak emo?”

Jet si Jesus, simongbat ja kowan to ey, “Siya, si-kam. Si-katoy inkowan mo.”

²⁶ Nontan na maramen ireka ma emengan, inda nen Jesus sota tinapay et nan-iyaman son Apo Shiyos, asan toka showashowa-a. Jet in-akan to nodta ira apostol to, ja kowan to ey, “Iya, kan jo iyay. Sajay i bakdang ko.”

²⁷ Jet idi naksheng, inda to sota tasa et nan-iyaman son Apo Shiyos, asan toka i-kan mowan son si-kara, ja kowan to ey, “Pan-i-inelbati jon inomen.

²⁸ Ta sajay i shalak ja on-ayos ja pansigshan ni eshakel la totoo. Ta sota ketey ko di, si-katoy kepekawanan ni basol ni totoo, tan si-katoy panshoki-an nonta badon bilin nen Apo Shiyos so ni totoo.

²⁹ Iyay i ikowan ko son si-kayo. Sajay i ka-onoran na penginom ko ni shanom niya obas, jet ekak nin menginom ingkatod onsabi sota penginom ko nonta badon shanom ni obas shima pantoshayan nen Apo Shiyos ja Amak; jet meki-inom kayo ngo.”

Naysigod ja inkowan nen Jesus sota ngaaw wa pesing ali nen Pedro

³⁰ Nankansiyon ira ni maypangkep ni panshedjaw sha son Apo Shiyos, jet idi naksheng, bimo-day ira nodtan na baley jet dimaw ired ma shontog ga kowan sha ey Olibas.

³¹ Jet si Jesus, kowan to so nonta ira too to ey, “Niman na dabi, ibaing jowak ka emin jet onbetik kayo, ta si-katoy ketongpal nonta padton naysolat nonta bayag da, ja kowan to ey, ‘Bono-en ko sota para bantay ni kalniro, jet sota eman-o-odop ja kalniro, mebodak ira.’

³² Nem no meksheng i pan-ongal ko, mepangdo-ak ja ondaw shi Galilia ey si-kayo.”

³³ Nem si Pedro, kowan to ey, “Angken ibaing shaka ni emin na kait ko, eg taka mango ibaing.”

³⁴ Simongbat si Jesus ja kowan to ey, “Podno iya ikowan ko son si-kam Pedro: niman na dabi, isaot mowak ni memintedo ja ikowan mo ey eg mowak am-amta. Jet no meksheng iyay, wára ngoy ontekok ja kawitan.”

³⁵ Nem si Pedro, kowan to ey, “Angken na pekibono sha-ak son si-kam, ekak ikowan ey eg taka am-amta!” Jet sota ira kait to, sotan ngoy inonoran shen inkowan.

³⁶ Jet si Jesus, inodop to sota ira apostol to shima dogad ja kowan sha ey Gitsimani jet kowan to son si-kara ey, “Tongaw kayod jay, ta ondawak shima a-adaw ja nak nin manshewat son Apo Shiyos.”

³⁷ Inodop tos Pedro tan sota showen anak nen Sibidi, jet nontan ma, emankaikelkel-ewi.

³⁸ Jet kowan to son si-kara ey, “Singa meteyak ni daringit ko! Shiyay kayo nin, eg kito ma-okip.”

³⁹ Idi naksheng nga inkowan to iyay, bintawan to ira ni ootik, jet nanshomog ja nanshawats son Apo Shiyos, ja kowan to ey, “Ama, no mebedin koma, karam ipalobos iyay ya pandikat ko di. Nem say kowan ko, sota piyan mo, si-katoy metongpal; aliwén sota kostok.”

⁴⁰ Idi imekwás, dimaw ja to inon-an sota too to jet simbi to iren na-ogip. Jet kowan to so nen Pedro ey, “Ngantoy? Na-ogip kayo. Apay, eg mebedin ja itoled joy jo-kew jo ni angken sakey ya oras bengat, ja kadwa-an jowak?”

⁴¹ Panmolakat kayo jet panshawats kayo ngo so nen Apo Shiyos ni kedsang say eg shakejo ebaken ni ngaaw wa onsabi son si-kayo. Sota nemnem jo, makedsang niman, nem baka et ey ma-ebak kayo tep ekapoy i bakdang jon ontongpal nonta wared nemnem jo met laeng.”

⁴² Jet nonta maykepinshowa, dimaw mowan na en nanshawats son Apo Shiyos et kowan to ey,

“Ama, no kenshat ta ipalobos mon mandikatak, i-onod ko sota piyan mon dag-en ko!”

⁴³ Jet nay-oli mowan ali jet simbi to ira sota too to ja na-ogip, ta epaladoy jo-kew sha.

⁴⁴ Jet indekjas to mowan ira ja en nanshawat ni maykepintedo, jet iso met laeng i inkowan to ni shawat to son Apo Shiyos.

⁴⁵ Idi naksheng, dimaw mowan ali so nonta too to, jet kowan to son si-kara ey, “Ngantoy? Piyan jon ma-okip ni olay? Edabas mala sota oras ja panshewat jo koma. Simabi ma sota timpo, jet si-kak ja kowan ni para padto ey Anak ni Too, may-ewatak ma so nonta ira toon nankekedsel.

⁴⁶ Eti, ondaw kito. Iyay ma ali sota mengibaag son si-kak.”

Si Jesus, inshel ma nonta makakontra son si-kato

⁴⁷ Idi maramen eman-a-sel si Jesus, si Judas Iskariote ja sakey so nonta ira sampolo tan showa ja apostol nen Jesus, engolop ali ni eshakil la too. Sota eshom, nan-etak ira, tan sota ira eshom, waray peg-as sha. Sajay iren too, inbetkag ira nonta apo ni papashi tan pangolo ni Hodiyo.

⁴⁸ Si Judas Iskariote, insigod ton inkowan so niya ira inodop to ey, “Say pengimatonan jo son Jesus, ongo-an ko; jet tengel jo.”

⁴⁹ Isonga dimaw alin shagos si Judas so nen Jesus jet kowan to ey, “Apo, iyay ka gayam shiyay!” Jet inongo-an to ja singa agpayson ensemek to noman.

⁵⁰ Jet si Jesus, kowan to son Judas ey, “Kajem, ita et mangon wara ked jay?” Jet sota ira inodop

ali nen Judas Iskariote, dimaw ira di jet tinngel shen shagos si Jesus ja a-shelen sha ma.

⁵¹ Jet nontan, sota sakey so nonta ira too nen Jesus, inokbos ton shagos i kampilan to jet kin-impas toy tangida nonta baga-en ni kangeto-an na pari.

⁵² Jet si Jesus, kowan to so nonta engimpas ey, “I-odim ita kampilan mo shita atip to, ta sota mengosal ni kampilan, kampilan met laeng i ipatey to.

⁵³ Say kowan mo emo, eg mebedin na mengshawak so nen Amak ni tolong? Say agpayso, no mengshawak son si-kato, mengibetkag alin shagos ni dinibon anghil.

⁵⁴ Nem no sotan i dag-en ko, eg metongpal sota esel nen Apo Shiyos ja naysolat nonta bayag da ja nappadto. Isonga sajay niman i medeka.”

⁵⁵ Jet nontan met laeng, kowan nen Jesus so nonta ira eshakil la totoo ey, “No si-kak i kowan jo ey a-shelen jo, apay nga nan-etak kayo tan waray peg-as jo? Apay tolisanak? Inakew met ja wara-ak shima Timplo ja emantosho, ket apay nga eg jowak inshel nontan?

⁵⁶ Nem mesepol la sajay i medeka ta say metongpal sota insolat ni para padto nonta bayag da.” Kowan nen Jesus.

Jet emin ira sota too to, namtik ira jet indekjas shes Jesus.

Indaw shes Jesus nodta totoon pangolo ni Hodiyo

⁵⁷ Jet si Jesus, indaw sha shi baley nen Kaypas ja kangeto-an na pari, tep shiman i na-olnongan

ira nonta mamaistoro ni dinteg tan sota ira pangolo ni Hodiyo.

⁵⁸ Jet si Pedro, tinned to ira nem bimetaw, ingkatod simabi nodta bo-dayan ni kangeto-an na pari jet simekep nodtan. Ekitongaw so nonta ira kowadja ta piyan ton asen no ngantoy pesing sha son Jesus.

⁵⁹ Nontan, sota ira apo ni papashi tan sota ira esa-nop pa toray, ireka mengenap ni ikowan shen basol nen Jesus, angken o-owap koma, say waray kabol la ikowanan sha so ey si-katoy kebono-an to.

⁶⁰ Nem enshiy shaka sepolen koston basol to. Angken eshakel sota sistigon dimaw ali ja o-owap i kowan sha, enshiy eki-det kari. Nem shi ka-onoran, waray showen dimaw ali,

⁶¹ jet kowan sha ey, "Sajay ya too, kowan to ey mebedin ton sheshalen kono ima Timplo nen Apo Shiyos jet i-oli to kono mowan na dag-en ni tedon akew."

⁶² Jet sota kangeto-an na pari, dimayat et kowan to son Jesus ey, "Jet enshiy isongbat mo? Sajay met i kowan ira niya too ey basol mo!"

⁶³ Nem si Jesus, imeg-eket. Jet sota kangeto-an na pari, kowan to ey, "Ipodnom no agpayson si-kam sota Anak nen Apo Shiyos ja inkari to nonta bayag da ey ibetkag to alin mengisedakan! Si Apo Shiyos, wara ni olay ingkatod ingka jet si-katoy pansangba-an mo!"

⁶⁴ Simongbat si Jesus ja kowan to ey, "Sota inkowan mo, si-kato. Nem say kowan ko ngo, si-kak sota kowan ni para padto ey Anak ni Too, jet no ekay ali, ontongawak shi apit ni kanawan

nen Apo Shiyos ja Manakabalin, jet asen jowak ali mowan ja metaksholan ni kolpot.”

⁶⁵ Jet sota kangeto-an na pari, bini-nik to sota baro to shorog ni bonget to, jet kowan to ey, “Eg mesepol la wára pay i sistigo! Intenengan jo met i inkowan to! Toka pa-so-is Apo Shiyos!

⁶⁶ Jet ngarantoy piyan jon pesing son si-kato?” Simongbat sota kait ton toray, ja kowan sha ey, “Anam ton mebono!”

⁶⁷ Jet tinopsha-an shay dopa to. Shinengpel sha, tan wára pay aliy eshom ma enedpak son si-kato,

⁶⁸ ja kowan sha ey, “Tiga, si-kam ma inbebetkag kono nen Apo Shiyos ali, ikowan mo ga no moka idasin met laeng sota enengpel son si-kam?”

Indibak nen Pedro ey am-amta to si Jesus

⁶⁹ Nontan met laeng, emantetongaw si Pedro nodta bo-dayan ni baley nonta kangeto-an na pari, jet wáray biin бага-en nonta kangeto-an na pari ja dimaw ali son Pedro, jet kowan to ey, “Angken si-kam met, eki-od-odop ka son Jesus ja i-Galilia.”

⁷⁰ Nem si Pedro, indibak to son si-karen emin, ja kowan to ey, “Enshiy am-amtak shita moka pan-ikowan!”

⁷¹ Jet idi dimaw si Pedro nodta pasbol, wára mowan i biin kowan to so nonta ira toon wára nodtan ey, “Sajay ya too, eki-od-odop met so nen Jesus ja i-Nasarit!”

⁷² Nem insaot nen Pedro mowan ja tinaksholan to ni sangba ja kowan to ey, “Angken pansangba-an ko, ekak am-amta itan na too!”

⁷³ Idi ekay, sota ira toon wára nodtan, dimaw ira di son Pedro jet kowan sha ey, “Ayshiy showashowa! Kenshat ta si-kam i sakey ya kait to did Galilia! Ma-imaton shi moka pengibodikas ni esel!”

⁷⁴ Nem si Pedro, nansangba mowan ja kowan to ey, “Angken shosa-en towak nen Apo Shiyos, no o-owap iyay ya inkowan ko la! Ekak am-amta itan na too!”

Jet nontan, timekok nga agpayso sota kawitan.

⁷⁵ Jet idi intenengan nen Pedro, ninemnem to ma sota inkowan nen Jesus ey, “Isaot mowak ni memintedo, ja kowan mo ey eg mowak am-amta, jet no meksheng, wára ngoy ontekok ja kawitan.” Jet si Pedro, dimaw shima powisha ja epaladoy nangis to tep naydaw-an.

27

In-awat sha mowan si Jesus so nen Gobinarol Pilato

¹ Idi nonta emankewa-wa ma, emin ira sota apo ni papashi tan sota ira pangolo ni Hodiyo, nantatababal ira ni pesing shen pebono so nen Jesus.

² Jet say inpasing sha, binedod sha et inpaidaw sha so nen Pilato ja gobinarol.

Nanposos ma si Judas Iskariote

³ Jet idi inamta-an nen Judas Iskariote ey pebonora gayam si Jesus, emanbebawi ta naydaw-an na pasiya, isonga to in-oli sota pilak ka tedon polon palata so nonta ira toray ni Hodiyo,

⁴ Jet kowan to ey, “Nanbasolak ka pasiya! Ta inbaag ko sota toon enshiy basol to son si-kayo jet niman pebonoyo gayam!”

Nem kowan sha son si-kato ey, “Enshiy mi naybiyangan nitan; olay toka ngo.”

⁵ Jet inkespig to sota pilak ka palata shima naydaem ni Timplo jet bimo-day. Jet say inpasing to, dimaw ja en nanposos.

⁶ Nem sota ira apo ni papashi, indara sota palata, jet kowan sha ey, “Ngantoy pesing tayo niyay ya pilak? Parit shi dinteg ja may-a-shom iyay ya pilak shima tado-an ni alos, ta sajay, tongkal ni biyag ni too.”

⁷ Jet ninemnem sha ey sotan na pilak, itongkal sha nonta bo-day ya sigod ja kepengeda-i ni ma-emag ni banga, jet inpanbalin shen kamposanto ja kaybebka-an ni bisita shi Jerusalem ja metey shiman.

⁸ Isonga sotan na bo-day ja intongkalan sha so nonta pilak, inpanngaran ni totoo ma ni “Baley ni shala”, jet ingkato niman, si-katoy ngaran to.

⁹ Sajay i tongpal nonta padto nen Jirimias nonta bayag da, ja kowan to ey, “Say kowan nonta totohay ni Israel ey koston tongkal nontan na too, tedon polon palata. Jet idi al-en sha,

¹⁰ inbayad sha nonta bo-day ja kokowa nonta para amag ni banga, ta si-katoy bilin nen Apo Shiyos son si-kak.”

Binistigal nen Gobinarol Pilato si Jesus

¹¹ Jet nonta wares Jesus shima sango-an nen Gobinarol Pilato, sota gobinarol, inbag-an tos

Jesus ja kowan to ey, “Jet agpayso ja si-kam sota ari ni Hodiyo?”

Simongbat si Jesus ja kowan to ey, “Sota inkowan mo, si-kato.”

¹² Nem idi wáray inkowan ira nonta apo ni papashi, tan sota ira pangolo ni Hodiyo ja kowan sha ey basol to, eg simongsongbat.

¹³ Jet si Pilato, kowan to so nen Jesus ey, “Apay eg mo aya itenengan ima kowan sha ey eshakil la basol mo? Apay nga eg ka simongsongbat?”

¹⁴ Nem si Jesus, angken sakey so nonta kowan sha ey basol to, eg to sinongsongbatan. Jet sota gobinarol, emesshaaw wa pasiya.

¹⁵⁻¹⁹ Amta nen Gobinarol Pilato ey apal ira nonta pangolo ni Hodiyo son Jesus i in-awatan sha son si-kato, isonga piyan ton ibolos si Jesus. Tan sakey pay ya kabol la ibolosan to so koma, wáray inbetkag nonta asewa to ja en engikowan son si-kato ey, “Si asewam, kowan to ey kareka kono mandeka ni kompormi so nitan na too, ta enshiy basol to. Nandigat pay kono si asewam nonta edabi ta asdeg toy kinokokip to ni maypangkep nitan na too, jet emankaikelkel-ewi kono pay.” Isonga ninemnem nen Pilato so-taapal ira nonta pangolo ni Hodiyo son Jesus i in-awatan sha son si-kato, isonga piyan ton ibolos si Jesus. Tan sakey pay ya kabol la ibolosan to so koma, wáray inbetkag nonta asewa to ja en engikowan son si toka pesing ni olay no timpon piyasta ni Paskowa, ja wáray sakey ya pirison toka ibolos ja piyan ira nonta totoon ibolos to. Isonga idi na-olnong ira sota totoo, kowan nen Pilato son si-kara ey, “Sipay

piyan jon ibolos ko? Si Barabas, ono si Jesus ja inbetkag kono nen Apo Shiyos son si-kayon Hodiyo?” (Jet saja si Barabas ja inngadnan nen Pilato ja panpidi-an ni totoo, si-katoy sakey ya kakedselan na balod nontan.)

²⁰ Nem sota ira apo ngo ni papashi tan sota ira pangolo ira ni Hodiyo, intod-an sha sota eshakil la totoo ey say ikowan sha so nen Pilato ja ibolos to, si Barabas; jet si Jesus, angken ikowan sha ey si-katoy mebono kono.

²¹ Jet sota gobinarol, pininshowa ton inbag-an ira mowan sota totoo, ja kowan to ey, “Jet sipa so ira niya showen too i piyan jon ibolos ko?”

Simongbat ira sota totoo, ja kowan sha ey, “Si Barabas!”

²² Jet si Pilato, kowan to son si-kara ey, “Jet no sotan i kowan jo, ngaranto ma i dag-en ko so nen Jesus ja inbetkag kono nen Apo Shiyos son si-kayo?”

Jet emin ira sota totoo, kowan sha ey, “Paidansam shi koros!”

²³ Kowan mowan nen Pilato son si-kara ey, “Ngantoy? Ngaran ni dingka ton ngaaw aya?”

Nem ema-ma et i keljaw sha ja kowan sha ey, “Paidansam shi koros!”

²⁴ Idi indasin ma nen Pilato ey enshiy pesing ton mengibediw son Jesus, tan ninamnama to pay ey wara aliy kolo ja medeka, en nanbolo shi sango-an ira nonta totoo, ta si-katoy ogadira nontan da no piyan shen ipa-sas ey enshi may kaybibiyangan sha shi dag-en ni eshom ma too. Isonga inkowan to ey, “Enshiy basol ko no mebono iyay ya too; olay tokajo ngo!”

²⁵ Jet emin ira sota totoo, kowan sha ey, “Owen, si-kamiy maka-amta, tan saja annak mi di!”

²⁶ Jet nontan ma, si Pilato, say inbolos to, si Barabas. Jet inpasepdad to nin si Jesus asan toka i-wat so nonta ira solsharo ja sha idansa shi koros.

Dedamsis i inaspasing ira nonta solsharo son Jesus

²⁷ Sota ngo ira solsharo nen gobinarol, indara si Jesus jet indaw sha shima mismon baley nen gobinarol. Inolnong shen emin sota kait shen solsharo jet dini-mot shes Jesus.

²⁸ Sina-datan shay baro to ni singa baro ni ari ni Roma, ja say kolor to, sota kowan sha ey violet.

²⁹ Tan say inpasing sha pay ni dedamsis sha, in-inges sha ni singa ari. Isonga engosikos ira ni wákal la nasbitan ja inpaidnget sha son si-kato, ja singa korona to. Engala pay ira ni pating, ja inpa-egnira shi kanawan to, asan ma ira nantalimokod shi sango-an to, ja kowan sha ey, “Onpalapalad ka koma, ari ni Hodyos!”

³⁰ Tinopsha-an sha pay jet indara sota pating ja inegshi-an to et inpeg-as shed toktok to.

³¹ Jet idi naksheng sota inpasing shen dedamsis, dinosora sota istay inpaibaro sha, jet in-oli sha met laeng sota sigod ja baro to. Jet inbo-day sha ma ja sha idansa shi koros.

Indansara si Jesus shi koros

³² Idi maramen ireka man-ekad, naytompong nga inapol sha sota toon si Simon i ngaran to, ja i-Sirini, jet inpasakbat sha et son si-kato sota koros ja kaydansa-an nen Jesus.

³³ Jet nan-akad ira ingkatod simbira sota dogad ja kowan sha ey Golgota. (Jet say olog niya Golgota shi esel sha, toktok.)

³⁴ Idi mimotok ired man, in-aknan sha ni adak ja edaokan ni empait ta agas ja eg to so dekna-an ni ensakit. Nem idi ninamtan to, eg to koston inomen.

³⁵ Jet indansara ma shi koros. Idi indansara ma, nanbobonot ira sota solsharo no sipay on-tompong so nonta baro nen Jesus, asan shaka panbibingayi.

³⁶ Idi naksheng ma, timongaw iren nanbantay son si-kato.

³⁷ Nodta koros to ja petek ni toktok to, wáray naysolat ja kowan sha ey si-katoy kabol ni naydansa-an tod koros, jet say olog nonta naysolat, kowan to ey: “Sajay si Jesus ja ari ni Hodiyos.”

³⁸ Jet wáray showen tolisan ja inpakibitay sha son si-kato shi sanseskey ya koros. Sota sakey, wára nodta petek ni kanawan nen Jesus, jet sota sakey, wára nodta petek ngo ni kanigid to.

³⁹ Sotan ngo ira toon emandebas ja man-ekad nodtan, ngini-ngi-ngi-an sha, tan inbi-bi-wisan sha pay,

⁴⁰ ja kowan sha ey, “Towa! Kowan mo ey Anak toka nen Apo Shiyos, tan kowan mo pay ey sheshalen moy Timplo jet bengonen mo mowan ni tedon akew! Apay nga eg mo isalakan i bakdang mo shorog ja ondespag alid ta koros mo?”

⁴¹ Jet angken sota ira apo ni papashi ni Hodiyos, tan sota ira mamaistoro ni dinteg, tan

sota ira eshom ma pangolo ni Hodiyo, shaka sengsengkita,

⁴² ja kowan sha ey, “Insalakan to konoy eshom nem eg to met isalakan i bakdang to shorog! Kowan to ey si-kato kono sota ari ni Israel. Tiga, asen tayo noman no ondespag alid ma koros to say memati kito son si-kato!

⁴³ Si Apo Shiyos konoy toka pashindi, jet asen tayo noman ka, no isalakan nen Apo Shiyos niman? Kowan to ey Anak nen Apo Shiyos, jet ma-sas ka no ensemek nen Apo Shiyos!”

⁴⁴ Jet sota kait ton naykoros, ja tolisan, sajay met laeng i kowan sha ni dedamsis sha.

Etey si Jesus

⁴⁵ Idi nonta alas dosi ni ka-akawan, nambolinget nodtan na dogad ingkato nonta alas tris ni mama-shem.

⁴⁶ Jet idi nonta alas tris ni mama-shem, si Jesus kimeljaw ni makedsang, ja kowan to ey, “Eli, Eli, lama sabaktani!” Say olog niya kowan to, “Shiyos ko, Shiyos ko, ngantoy in-owayan mowak so?”

⁴⁷ Nem sota eshom ma toon wára nodtan, idi intenengan sha sota kowan nen Jesus, kowan sha ey, “Toka emo panta-wála ali si Elias shi dangit.”

⁴⁸ Jet sota sakey so nonta ira toon wára nodtan, kinano-an ton en engi-neng nonta singa bonot ja masbet ni shanom nodta empait ta tapey asan toka ipi-ket shi pating. Jet in-awat tod sobil nen Jesus.

⁴⁹ Nem sota eshom, kowan sha ey, “Ekanin! Asen tayo ka no ondaw ali si Elias ja en mengisedakan son si-kato!”

⁵⁰ Jet si Jesus, inkedsang toy keljaw to mowan, asan ma ma-bosi.

⁵¹ Jet nontan ma, sota masshel la kortina ja naysa-din nodta Kapatkan na kowadto shima naydaem ni Timplo, epi-kat ta nanshowa, manipod nodta naytapew ingkatod ma despag. Nanjegjeg pay jet angken sota engkakembaleg ga bato, nankepesjang ira,

⁵² tan angken sota ira naydiyangan ni etey, edo-katan ira. Jet nanbiyag ngo ira sota eshakil la too nen Apo Shiyos ja nanketey.

⁵³ Idi nan-ongal ma ngo si Jesus ni maykatdon akew, bimo-day ngo ira sotan shima naydiyangan sha, jet dimaw ired ma Jerusalem ja en nanpa-sas so ira nonta eshakil la totoo.

⁵⁴ Sota kapitan ni solsharo, tan sota kait ton emanbantay son Jesus ja naykoros, dineknara sota jegjeg jet mismon inon-an shay epasemak. Eta-kot iren pasiya jet kowan sha ey, "Agpayso gayam ey sajay ya too ket anak ni Shiyos!"

⁵⁵ Eshakil ira sota bibiin wára nodta naybabetaw ja engikadmang niyay ya epasemak. Sajay iren bibii, tinodongan shes Jesus alid Galilia.

⁵⁶ Jet say ngaran ira nonta eshom ma bibii ja wára nodtan, sajay: si Maria Magdalena, si Maria ja ina nen Santiago nen Jose, tan sota asewa nen Sibidi ja ina nen Santiago nen Juan.

Indiyang sha si Jesus

⁵⁷ Idi mama-shem mala, waray dimaw alin baknang nga too ja manngeshan ni Jose ja edapod ili ni Jodia ja kowan sha ey Arimatia. Sajay ya too, emati met laeng so nen Jesus.

⁵⁸ Dimaw so nen Pilato ja to kinshaw i bakdang nen Jesus, jet nontan si Pilato, inbilin to ey itolok ira nonta solsharo sota bakdang nen Jesus son si-kato.

⁵⁹ Jet si Jose, impas toy bakdang nen Jesus nodta koros jet dinibotan to ni badon dopot ja empoti.

⁶⁰ Saja si Jose, waray badon inpaliyang ton bato ja kowan to ey kaydiyangan to kono nem metey. Shiyay i in-ilawan to so ni bakdang nen Jesus. Inodin to sota ebadeg ga baton tangeb nonta diyang, jet inpokit to nodta sakepan, asan toka ilekjas.

⁶¹ Jet si Maria Magdalena, tan sota sakey ya si Maria, timongaw ira nin nodta mamang ni diyang.

⁶² Idi nonta maykadwen akew, ja naksheng ma sota akew ni shaka pansekana ni piyasta ni Paskowa, sota ira apo ni papashi, tan sota ira Parisiyo, nan-o-odop iren dimaw so nen Pilato,

⁶³ jet kowan sha ey, “Apo, eg mi dibkan sota inkowan niman na toon ma-owap nonta mabiday pay laeng, ja kowan to ey no maykatdon akew, manbiyag mowan kono.

⁶⁴ Isonga pabantay mon pasiya ima naydiyangan to ingkatod maykatdon akew, ta baka sota ira too to, ondaw iren sha ibetik ima bakdang to, asan sha ikowan mango ni totoo ey nan-ongal. Nakol ni mema-ma ja eshakel i may-owapan ey say nonta pilmiro.” Kowan sha son Pilato.

⁶⁵ Jet si Pilato, kowan to son si-kara ey, “Eti, daw kayo, et pangodop kayo ni solsharo. Ipeshas joy kabaalan jon memantay ja pasiya.”

⁶⁶ Jet dimaw ira nodta diyang et sha pinokit ja siningpetan na pasiya sota tangeb to, tan inpabantay sha pay ni solsharo sota diyang.

28

Nan-ongal si Jesus

¹ Nem idi agsapen pasiya ni Domingko, si Maria Magdalena tan sota sakey ya Maria, dimaw ira ja sha on-an sota naydiyangan nen Jesus.

² Jet nontan, ebigla ja waray makedsang nga jegjeg, ta waray anghil nen Apo Shiyos ja dimespag alid dangit, jet to pinodig sota baton naytangeb nodta diyang, jet si-katoy tinongawan to.

³ Say itsora ni dopa nonta anghil, singa bagidat, tan say baro to, empotin pasiya.

⁴ Isonga sota solsharon emanbantay, ireka manbebayedbed ni takot sha et singa etey ira.

⁵ Nem sota anghil, kowan to so nonta bibii ey, "Karekayo ontakot; amtak ey say piyan jon on-an, si Jesus ja naydansa shi koros.

⁶ Nem enshid jay, nan-ongal da! Nemnem jo kari: inkowan to met nontan da. Kalejo, jo asas sota istay inparokolan sha so.

⁷ Jet no asen jon enshi, daw kayon shagos, jet jo ikowan so nonta ira too to ey nanbiyag mowan da, jet niman, ondaw den mepangdo ey si-kayo shi Galilia, jet shiman i asanan jo so! Karejo dibdibkan iyay ya inkowan ko son si-kayo." Kowan nonta anghil so nonta bibii.

⁸ Jet nontan met laeng, indekjas ira nonta bibiin shagos sota diyang, jet nanbetik iren

sha ikowan so nonta ira too nen Jesus. Ireka mankel-ew, nem ebadeg ngoy imdeng sha nonta ireka mandaw.

⁹ Idi nonta wara ired shalan, ebiglen nay-aspol si Jesus son si-kara jet kowan to ey, “Siya, talna i mewesha son si-kayo!” Jet sota ira bibii, nanshomog ira ja inegshi-an sha sota sedi to, jet nanshayaw ira son si-kato.

¹⁰ Jet kowan nen Jesus son si-kara ey, “Karekayo ontakot. Daw kayo, jo ikowan so nonta ira took ja naka ikarin a-akik ey ondaw ired Galilia, jet ikowan jo ey shiman i asanan sha-ak so.” Kowan nen Jesus.

¹¹ Idi nontan na emandaw ira jay ya bibii, sota eshom ma solsharo ja istay emanbantay nonta diyang, dimaw ira ngo shima siyodad jet sha inkowan so nonta ira apo ni papashi sota emin na epasemak.

¹² Jet esa-nop ira sota apo ni papashi, tan sota ira eshom ma pangolo ni Hodiyo, jet nantatabtabal ira ni pesing sha. Jet nontan ma, ninemnem sha ey i-aknan sha ira sota solsharon nanbantay nonta diyang ni ebadeg ga pilak,

¹³ asan shaka ira bilina, ja kowan sha ey, “Ikowan jo so ni totoo ey sota ira too nen Jesus, dimaw ira di nonta edabin nasjep kayo ni ogip, jet kinibot sha sota bakdang to.

¹⁴ Jet no bilang ey amta-an nen gobinarol iyay, si-kamiy mismon mekitbal son si-kato; enshiy jo panshanagan.”

¹⁵ Jet sota ira solsharo, indara sota pilak jet pinatiren inkowan sotan na inbilin ni pangolo ni Hodiyo son si-kara. Jet ingkato niman, sotan i

kaikokowan ni eshom ma Hodiyo maypangkep ni inka-enshi nen Jesus shima diyang.

In-awat ma nen Jesus sota ka-onoran na bilin ton epateg so nonta ira apostol to

¹⁶ Jet sota ira sampolo tan sakey ya apostol nen Jesus, dimaw ira nodta shontog shi Galilia ja inkowan nen Jesus son si-kara ey dawán sha.

¹⁷ Jet idi inon-an sha si Jesus nodtan, nantolimokod iren emin ja nanshayaw son si-kato, nem sota eshom, wáray showashowa sha.

¹⁸ Jet si Jesus, imesop son si-kara, jet kowan to ey, “Say inkowan nen Apo Shiyos, si-kak i mengitoshay ni emin na wáred dangit tan shiya dobong.

¹⁹ Isonga ikowan ko son si-kayo ey daw kayo shi emin na ili shiya dobong, jet itoshoyo i maypangkep son si-kak say memati ira. Bonjagi jo ira shi ngaran nen Apo Shiyos ja Amak, shi ngaran ko ja Anak to, tan shi ngaran ni Ispirito Santo.

²⁰ Jet itod-iyo pay ira say emin sota inbilin ko son si-kayo, si-kato ngoy pati-en sha. Jet nemnemnem jo ey wára-ak ni olay son si-kayo, ingkatod pantepos niya dobong.” Kowan nen Jesus.

clvi

**Dibshon Mengi-kan Ni Pansigshan
Ibaloi: Dibshon Mengi-kan Ni Pansigshan (New
Testament)**

copyright © 1978 Wycliffe Bible Translators, Inc.

Language: Ibaloi

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 2 May 2025 from source files
dated 3 May 2025

6f85e932-8eee-5911-b890-a31a1da75d8c